

Ipampoyeaventeetiri Tasorentsi

SALMOS

Oca sanquenarentsi oamejeitiri ishanincajeitaniri Israel ipampoyeacoventiri Tasorentsi, aisati iquenquetsatacairi.

Jaoca icantari quemisantasanotiriri Tasorentsi

- 1** ¹ Inquimoshirejeite yora cameetsajeitatsiri,
caari quemisanterone icantayevetariri caari cameetsatatsi,
aisati caari anterone yantayetiri iriori,
aisati caari carajeiterine tseenquiriri Tasorentsi.
- ² Inintasanotiro irointi irineane Tasorentsi
aisati iquenqueshiretapinitiro quitaiteriqui aisati tsiteniriqui.
- ³ Iquempetacaro inchato catiachari otsapijaqui nija,
otimapiniti oitsoqui omoncaratapinitarica,
te catsini ojireashiteji oshi.
¡Ocameetsataque maaroni yantayetiri!
- ⁴ Irintiquea caari cameetsajeitatsi impeajea,
iquempetacaro osaventairoqui ovarairo tampea.
- ⁵ Irotaque incantacoventanteariri Tasorentsi coajica,
tecatsi avisacotajantsine;
eiro icarajeitiritsi cameetsajeitatsiri.
- ⁶ Yora Tasorentsi iquempoyeacoventiri cameetsajeitatsiri.
Irintiquea caari cameetsajeitatsi, impeajeitajea.

Ishanincatacari Tasorentsi Itomi, pincatsaritatsineri

- 2** ¹ ¿Paita icantimentavacaajeitari pincatsatashitariri ijitasorentsiyetiri?
¿Paita yatsipetantarori iquenqueshireashiyetaro iranteri?
- ² Yora pincatsariyetatsiri nampitsipeequi yapatojeitaca,
icoajeitaque impiatsateari Tasorentsi

- aisati yora pincatsari icoyeaqueri.
 3 Icajemajeitaque icanti: “¡Te ancoajeiteji impincatsariventee!
 ¡Tsame ajocajeiterita!”
 4 Yora Tasorentsi, pincatsaritatsiri anta inquitequi,
 ishirontimentacari;
 5 impoiiji iquisasanotanaca catsini,
 yoimintsaroajeitaqueri, icantaqueri:
 6 “Nomataquero nonashitacaacari nopeaqueri pincatsari.
 Iriotaque pincatsaritatsineri nonampiqui Sión, noameetsataqueri.”
 7 Meeca noncamantempiro icoasanotaqueri Tasorentsi.
 Icantaquena: “Avirotaque notomi,
 meeca notomintaquempi.
 8 Pincantena, nompempirota nampitsipee
 irosati overapaaca quipatsi,
 irotaque pashiteari, aitaque nompaquempiro.
 9 Pintsoncasanoteri maaroni pincatsariyevetachari.
 ¡Poashinoncayeri, pinquempetacanteri coviti iporoqueetiri!”
 10 ¡Avirojei pincatsariyetatsiri quipatsipeequi,
 piotasanojeitero oca noamejeitempiri!
 11 Pimpincatsajeiteri Tasorentsi,
 pinquimoshireventeri, pineacameetsatateri
 12 Poivotashijeiteari, pintsaroacayeari,
 eiroquea iquisantimpitsi, picamajeiticari;
 tempa intsipaite iquisasanota.
 ¡Inquimoshirejeite aventajeitariri, inquempoyeacoventeri!

Iquenquetsatacairi Tasorentsi iramitacotanteariri

(Isanquenataquero David ishiapitsatantacariri itomi, yora Absalón)

- 3** 1 Notasorentsite, oshequi catsini quisanari,
 oshequi coatsiri irimanajeitena.
 2 ¡Oshequi cantanari:
 “Eiro yoavisaacotiritsi Tasorentsi!”
 3 Iro cantaincha avirotaque Notasorentsite, ticaacoventanari.
 Avirotaque matakaanari nanaacotanti,
 avirotaque veshireacaanari.
 4 Shintsijenca nocantasanotimpi:
 “¡Notasorentsite, pamitacotena!”
 Ari iponeaca toncaariqui yoameetsatiri, yamitacotaquena.
 5 Ari nonareanaja, nomaanaji, aisati notinaanaja;
 tempa yamitacotaquena Tasorentsi.
 6 Eiro notsaroacaaritsi yoshequiasanojeivetea manajeitenanemeri,
 ishoncajeivetena, icoajeiti irimanatena.

- 7 ¡Intsipaiite pamitacotena, Notasorents site, poavisaacotena!
 Pimpiajeiteari avinti quisajeitaquenari.
 ¡Pintsoncajeiteri caari cameetsajeitatsi!
- 8 Avirotaque Notasorents site, oavisaacotantatsiri.
 ¡Pintasoncacoventeri pishanincajeitacari!

Ashiretasanoteari Tasorentsi

(Ivampoyeane David)

- 4 ¹ ¡Notasorents site jocaacoventanari,
 pamitacotena ariorica naventimpi!
 Tempa avirotaque oimoshirencanari ariorica opomerentsitimotana.
 ¡Pincavintsayena, pinquemisantero noquenquetsatacainpiri!
- 2 Avirojei jitacantashitachari pineaprojeita,
 ¿irosatimpa pincantajeitea pantanatena aisati pintseencanatena?
 ¿Irosatimpa pincantajeitea pincoashiyetearo
 pantayetero caariperotatsiri, tseyantsi?
- 3 Piotasanojeitero oca:
 icoasanotiri Tasorentsi quemisantiriri;
 aisati piojeitero iquemaquena ariorica naventari.
- 4 ¡Pintsaroacayeari, eiro pantajirotsi aisati caari cameetsatsi!
 Ariorica pinarempa pimaantariqui, pimajerete,
 pinquenqueshiretasanotea jaoca picanta.
- 5 Pimatasanoteneri cameetsa icoiri Tasorentsi,
 aisati pishiretasanoteari.
- 6 Ainiro oshequi cantajeitatsiri:
 “¿Jaanica nijayeeroneri asavicajeitanteari cameetsa?”
 ¡Notasorents site, nocoaque pineacameetsajeitena!
- 7 Piquimoshiretacaasanotaquena,
 nanaacotaqueri aasanovetachari oshequi tirico aisati ovaja.
- 8 Ariorica nonareanaca, cameetsa nomaasanoti;
 tempa avirotaque Notasorents site, timacaanari cameetsa.

Inquempoyeacoventanteariri Tasorentsi

(Ivampoyeane David)

- 5 ¹ Novincatsarite, avirotaque Notasorents site,
 pinquemenoncantempiri,
 pineaquena nocavintsaapinita.
- 2 Pinquemero nocoacotimpiri;
 tempa avirotaque noquenquetsatacairi.
- 3 Ariorica oquitaiteamani, piquemana;
 capichaji quitaite nocamantimpiro pomerentsitimotanari,
 aisati noyeacotempiro pimatenaro nocantimpiri.

- 4 Tempa aviro Tasorentsi,
caari onimoti caari cameetsatatsi;
yora caari cameetsajeitatsi, eiro isaviquimotimpitsi.
- 5 Aisati eiro isaviquimotimpitsi shemetatsiri;
oshequi piquishiri caari cameetsajeitatsi.
- 6 Pitsonquiri tseyajeitachari,
te paacameetsateri aacantajeitantatsiri
aisati oantajeitatsiri.
- 7 Irompa nainti, ari nomataquea nonquee Pivancoqui
cameetsatasanotatsiri;
tempa pinintasanotana.
¡Ari nomataquea nompincatsatemi, noneacameetsatimpi,
nameniniro Pivancoqui poameetsatiri!
- 8 Notasorentsite, ainiro oshequi quisajeitanari,
poametenaro cameetsatatsiri picoacaanari
nosavicanteari cameetsa.
- 9 Te iriojeitero irineanate cameetsa.
¡Yashi yoiro te incameetsajeiteji catsini!
Irointi iquenqueshireti intsoncajeitena.
Yashi yoiro ineanatantaro tseyantsi.
- 10 ¡Notasorentsite, poasanquetayeri!
¡Pincomitacaayeari paitapeerica iquenqueshirevetari!
Eiro paacameetsatimentiritsi caari cameetsatatsi yantaqueri;
tempa avirotaque ipiatsajeitacari.
- 11 Inquimoshirejeite maaroni aventimpiri pojocaacoventeri,
incanteani impampoyeaventemi;
tempa piquempoyeacoventiri.
Yora nintajeitimpiri inquimoshireventasanotemi.
- 12 Tempa Notasorentsite, pitasoncaventiri quemisantimpiri,
piticaacoventaqueri; tempa pineshinocatasanotaqueri.

Iquenquetsatacairi Tasorentsi ariorica ineiro pomerentsitimotariri

(Ivampoyeane David)

- 6 1 Notasorentsite, eiro piquisatsatanatsi;
eiro poasanquetaanatsi piquisasanotarica catsini.
- 2 Notasorentsite, pincavintsayena,
te noshintsitajeji, pintecatsitacaajena,
nopioncaque maaroni novatsapeequi.
- 3 ¡Oshequi notsaroaque!
Notasorentsite, ¿jaoca oncarate, pamitacotena?
- 4 ¡Intsipaute, Notasorentsite, poavisaacotena!
¡Tempa pinintasanotana!

- 5 Tecatsi irimate camatsiri inquenqueshiretajero pimataqueri.
¿Jaanica materone incantempi: Picameetsati, ariorica intijaquea?
- 6 Maotapaaquena niraaca.
Nocantani tsiteniripeequi niraapinitaca;
oshequi nojaquitasanotaca, cajatanaque notiinaro.
- 7 Oshequi nocatsitaque noquiqui, ocamaraitacotanaquena;
¡Irio cantacaacarori quisajeitaquenari!
- 8-9 ¡Pinijantareena, avirojei caari cameetsajeitatsi,
iquemaquena Tasorensi niraaca!
Aisati iquemaquero nocoacotiriri.
¡Aitaque iramitacotaquena!
- 10 Maaroni quisajeitanari, itsaroasanojeitanaque catsini,
¡intsipaite irishiajeitanaque, impashiventanaquea!

Icantacoventasanotanti Tasorensi

(Ivampoyeane David)

- 7** 1 Notasorensite, aviro naventari jocaacoventanari;
¡Poavisaacotena, eiro yoantanatsi oijanajeitaquenari!
- 2 ¡Pojocaacoventena; tempa iquempejeitacari anteariite manitipee,
ipichareanacari!
¡Tecatsi oavisaacotenane!
- 3 Notasorensite, ¿jaoca otimiri oca nantayetaqueri?
¿Noantaquempa?
- 4 ¿Nopiatacarimpa notsipavintsatari noashinoncaaqueri
aacameetsavetanari?
¿Aisati noashinoncaaquerimpa quisaquenari, tecatsirica
incantavetena?
- 5 Ariome nanterome oca,
oncameetsateme irojjanatename, iraantavaquenari,
irinoshiquena quipatsiqui, iroashiventayename.
- 6 ¡Notasorensite, pinquisacoventenata!
¡Pimplateari avinti quisajeitaquenari!
¡Avirotaque, coacairiri incantacoventante cameetsa,
meca pamicotena!
- 7 Pampatojeiteri maaroni nampitsipeequiniri, irishoncajeitempita,
impoji pisavique pivincatsarimentoqui jenoqui,
pimpincatsariventajeiteri maaroni.
- 8 Notasorensite, avirotaque cantacoventiriri maaroni atiripee;
pincantacoventena meeca;
tempa nosaviqui cameetsa,
aisati tecatsi nante.
- 9 Tasorensi, aviro cameetsatatsiri,

- iotasanotirori catsini quenqueshiretantsipee
aisati paitarica iquemashireyetiri atiri.
¡Pintsoncajeitajeri antayetirori caari cameetsatsi,
irintiquea savicatsiri cameetsa, pamitacoteri; eiro yojocantimpitsi!
10 Yora Tasorentsi Inquitequiniri, iriotaque ticaacoventanari,
aisati yoavisaacotiri maaroni cameetsashiretatsiri.
11 Iriotaque cantacoventantatsiri cameetsa,
aisati oashinoncaimentantirori caari cameetsatsi, icantatiani.
12-13 Eirorica iquenqueshireajatsi atiripee, inquemisantajeri Tasorentsi,
irovetsicashiteari inquempeteari nontsiacotirori iveane, ichacopite
morecatsiri tsoncantatsiri.
14 ¡Pameneri yora caari cameetsatsi,
icoasanotiro catsini irantero caari cameetsatsi;
impoiiji iramatavitante!
15 Iquempetacari quianontachari omoro tsoompoina,
impariantajeari irisati.
16 ¡Maaroni yantayetiri caari cameetsatsi,
irisati ashinoncaimentajearone!
17 Naroquea cantacoterine Tasorentsi: icameetsataque;
tempa itampaticataque.
Aisati nompampoyeacoventeri pampoyeantsiqui;
tempa iriotaque savicatsiri inquitequi.

Ipincatsaritasanoti Tasorentsi yanaaquero imayetiri atiri

(Ivampoyeane David)

- 8** 1 Notasorentsite, pincatsariventanari maaroni.
¡Pipincatsaritasanotaque, pitsoteaquero maaroni quipatsi!
¡Pipincatsaritasanoti catsini, panaaquero inquite!
2 Ariorica incantacojeitempi jananequipee: Picameetsati,
aisati atsotatsiri itsomi,
irotaque poimajerentantariri quisajeitimpiri,
jeri aisati pintsoncajeitantariri piatsajeitimpiri.
3 Ariorica nameniro inquite povetsicaqueri
aisati cashiri jeri impoquiropee,
4 noquenqueshireti: ¿Jaoca ijitari atiripee?
¿Paitampa piquenqueshireantariri?
¿Paitampa pintacotantariri?
5 Povetsicantacariri iro pinquempetacanterime tasorentsitatsiri.
Pineacameetsataqueri pipeaqueri pincatsariventantatsiri.
6 Pishinetaqueri impincatsariventajeiteri maaroni povetsicayetaqueri:
7 ovishapee, vacapee, aisati poshiniripee
jeri covencayetatsiri,

- 8 aisati vanquiyetachari jeri nijaasatipee.
¡Impincatsariventajeiteri maaroni timayetatsiri incajarequi!
9 ¡Notasorents site, pincatsariventanari maaroni,
pipincatsaritanotaque, pitsoteaquero maaroni quipatsi!

Ipampoyeacoventiro yantaqueri Tasorentsi cameetsatsiri

(Ivampoyeane David)

- 9 ¹Notasorents site,
nocoashiretsanotaque noncantempi: Picameetsati;
aisati noncamantacotero pimayetaqueri cameetsayetatsiri.
² ¡Aviro Jenoisati, nocol nonquimoshirementempi,
antearojenca nonpampoyeaventempi!
³ Yora quisajeivetaquenari ishiapitsajeitanaquempi
ipariajeitaque, icamajeitaque maaroni.
⁴ Avirotaque cantacoventantatsiri cameetsa,
pisavicaque pivincatsarimentoqui
pincantacoventantenari cameetsa.
⁵ Pishintsijencataqueri pincatsatashitariri ijitasorentsiyetiri;
pitsoncaqueri caari cameetsajeitatsi.
¡Incanteani tecatsi quenqueshireacojeitajerine!
⁶ Icamajeitaque quisajeitanari;
tecatsi savicantajeitajearone inampipeeni.
Pitsoncajeitaqueri, tecatsi quenqueshireacojeitajerine.
⁷ Iro cantaincha irinti Tasorentsi
iriotaque pincatsari incantaitatitempani,
isavicaque ivincatsarimentoqui, incantacoventante.
⁸ Incantacoventeri cameetsa maaroni atiripee;
queario incantacoventasanojeiteri.
⁹ Yora Tasorentsi iticaacoventiri yoashinonqueeyetiri
ariorica opomerentsitomotari.
¹⁰ Notasorents site, ishiretimpi yora iojeitimpiri;
eiro pojocajeitiritsi aventimpiri.
¹¹ Pimpampoyeneri Tasorentsi pampoyeantsipee,
yora pincatsaritatsiri anta nampitsiqui Sión.
Pincamantajeiteri atiri maaroni imayetaqueri.
¹² Iquenqueshireacotiri Tasorentsi yoashinonqueetiri,
te impeacotearoji ariorica yashinoncaa,
yoasanquetairi jaanicaica oashinoncairiri.
¹³ Notasorents site, pincavintsayena,
pamene, oshequi yoashinoncaaquena quisajeitanari.
¡Eiro pishinetiritsi iroyena!

- 14 Aitaque noncamantaqueri maaroni savicajeitatsiri nampitsiqui
Jerusalén,
ocameetsati incantacotempi maaroni atiripee: Picameetsati,
Aisati oshequi noquimoshiretaque;
tempa poavisaacotaquena.
- 15 Yora pincatsatashijeitariri ijitasorensiyetiri,
irisati ashinoncaimentajearone yantayetiri;
inquempeteari oashitachari icharijarequi,
irisati pariantajearone.
- 16 ¡Yonijantaquero Tasorensi icantacoventanti cameetsa!
Irintiquea caari cameetsajeitatsi
irosati incantea irashinoncaimentajearo yantayetaqueri.
- 17 Yora caari cameetsajeitatsi, pincatsatashijeitariri ijitasorensiyetiri,
jeri peacojeitariri Tasorensi,
intsoncajeitea, irijate Sharincaveniqui.
- 18 Tempa eiro icantani impeacoyeeteari coiteaveetatsiri,
aisati eiro icantani impeero yoyeacotiri Tasorensi iroavisaacoteri.
- 19 Notasorensite, pishintsite,
eiro pishinetiritsi irishemejeite atiripee.
¡Anta pitiminta pincantacoventeri,
pincatsatashijeitariri ijitasorensiyetiri!
- 20 Notasorensite, pincantashireacaajeiteari intsaroajeitanaqueta.
¡Piotacaajeiteri atiri inaveta, tecatsi irimajeite!

Icantiri Tasorensi iramitacoteri

(Ivampoyeane David)

- 10** 1 Notasorensite, ¿Paitampa pareejitantari?
¿Paitampa pimanantari
ariorica opomerentsitimotana?
- 2 Ishemetaque caari cameetsajeitatsi iquisasanotaqueri,
icoaque iroashinoncayeri caari shemetatsi.
Iro cantaincha irisati ashinoncaimentajearone
icoavetari iroashinoncayeri itsipa.
- 3 Yora caari cameetsajeitatsi ishemetimentiro icoiri iranteri.
Yora coasanotatsiri irashitaarantea, yoamaimatanti
aisati itseencaqueri Tasorensi.
- 4 Ishemetasanoti, icanti:
“Te aneeriji Tasorensi. Tecatsi cantimentenarone.”
Irotaque iquenqueshirejeitiri.
- 5 Icantani imatapiniyetiro paitapeerica yantayetiri,
te inquenqueshireteroji poasanquetaimentero yantaqueri.
Ishirontimentari quisajeitaqueriri.

- 6 Ijjeivetaca tecatsi anaacoterine
aisati ijiti eiro catsini opomerentsitimotaritsi.
- 7 Oshequi ineaveetantayetaro caari cameetsatatsi,
itseeyashiyeta aisati icantimatanti;
ariorica ineaveeti, imanaquero iroashinoncante
jero caari cameetsatatsi.
- 8 Iquenayeti nampitsijaniquipeequi,
yamenayetiri caari timatsi piacoventearine,
itsititashitari iroanteariri;
te irineashiteariji caari piatantacha.
- 9-10 Iquempetacari anteariite maniti imana omoroqui,
aitaque yamenacotiriri caari otimimoti
impiacoventanteari yoyeaqueri.
Imiriashitiri irantavaqueariri, iroanteariri,
ariorica iravaqueri irinoshicanaqueri inantariqui.
- 11 Yora caari cameetsatatsi
ijitashivetaca ipeacotaro Tasorentsi
aisati te irineeroji yantaqueri.
- 12 ¡Notasorentsite, intsipaite poasanquetayeri!
¡Eiro pipeacotaritsi irinti ashinoncaincari!
- 13 Notasorentsite, ¿paitampa itseencantaquempiri caari
cameetsajeitatsi,
ijitashivetaca eiro picantimentiritsi?
- 14 Tempa pineaqueri yantanatantaquempiro caari cameetsatatsi.
¡Aitaque poasanquetaimentajeitaqueri!
Irintiquea caari matiro impiacoventempa,
yaventajeitaquempi;
avirotaque amitacotiriri camayetatsiri iriripee.
- 15 ¡Poashinoncayeri caari cameetsajeitatsi;
eiro imatantajarotsi paitapeerica!
¡Pincantimentasanoteri yantaqueri,
irosati irashinoncaimentantearori!
- 16 Icantatiani ipincatsariti Tasorentsi;
yora pincatsatashjeitariri ijitasorentsiyetiri
irojocajeiteri iipatsitequi.
- 17 Notasorentsite, piquemaquero iquenquetsatacaimpiri caari
shemantacha;
piveshireacaari aisati pamitacotiri.
- 18 Pintacotari camayetatsiri iriri jero iriniro aisati
yoashinonqueetiri,
¡eiroquea imatantajatsi atiripee iroashinoncantaje;
tempa caamaneri ini!

Yaventasanotari Tasorentsi

(Ivampoyeane David)

- 11** ¹ Naventasanotari Tasorentsi iriotaque jocaacoventanari.
Yatsipetashita icantana:
“Pishianaque anta toncaariqui
pinquempeteari tsimeripee”
- ² Pameneri caari cameetsajeitatsi,
iquempetacari nontsiirori iveane,
yovetsicaca imanashitacari atiripee cameetsayetatsiri, iroanteari.
- ³ Terica irimoncaratacayeri jivatacantatsiri
ocantayetiri cameetsatsiri,
¿jaocame incanteari iriori cameetsatsiri irimatantearori?
- ⁴ Ainiro Tasorentsi Ivancoqui cameetsatasanotatsiri,
aitaque otimiri ivincatsarimento inquitequi,
yamenasanotiri maaroni atiri,
ioyetiri jaoca icanta maaroni.
- ⁵ Yameniri Tasorentsi cameetsajeitatsiri
aisati caari cameetsajeitatsi;
iquisananotiri maaroni coasanotatsiri iroantayete.
- ⁶ Yoariyeneri caari cameetsajeitatsi
omenqui, paamari jero azufre,
aisati amaquero tampea catsirincajencatasanotatsiri
ontaajeiteri maaroni.
¡Yora Tasorentsi iroasanquetamientosanojeiteri yantayetaqueri!
- ⁷ Icameetsatasanotaque Tasorentsi, inintasanotiro cameetsayetatsiri.
¡Irotaque irineavorojeitanteariri cameetsatasanajeitatsiri!

Iquenquetsatacairi Tasorentsi, icantiri iramitacoteri

(Ivampoyeane David)

- 12** ¹ Notasorentsite, poavisaacotena;
aca quipatsiqui te intimeji quemisantasanotempine;
te aneajeri atiri cameetsashiretatsiri.
- ² Itseevacotavacaayeta, ineanatashiyetaro amatavitantsi.
- ³ Notasorentsite, pintsoncasanotajeri maaroni
amatavitavacaayetachari
neanatanashiyetarori paitapeerica,
- ⁴ Icantajeiti: “Timatsi aneane arori
amatantarori paitapeerica acoayetiri.
¿Jaonica canteeneri antantayetarori paitapeerica?”
- ⁵ Icanti Tasorentsi:
“Yora coiteaveetatsiri aisati caari yojocaacoventeeti,

- oshequi iperanayetari aisati yoashinonqueeyetiri.
 Irotaque meeca noavisaacotanteariri;
 tempa oshequi yoyeacotaquena.”
- 6 Ocameetsatasanotaque catsini icashiacaaqueeri Tasorentsi.
 ¡Oquempevetacari plata ioshitachari,
 itaapiniyeetiri paamariqui ocarati 7!
- 7 Notasorentsite, aitaque pinquempoyeacoventaquena.
 ¡Pincanteani pinticaacoventena,
 eiro yoashinoncantanatsi atiripee!
- 8 Yora caari cameetsajeitatsi
 icantani iquenaquenayeti jaocapeerica,
 Maaroni atiri iquimoshireventajeitiro caari cameetsatatsi.

Iquenquetsacairi Tasorentsi iramitacoteri

(Ivampoyeane David)

- 13** ¹Notasorentsite, ¿irosatimpa pimpeacotena?
 ¿Pincanteanimpa pimpeacotena?
 ¿Irosatimpa pimanapitsatena?
- ² ¿Irosatimpa noncanteani ompomerentsitimotena nashinoncayea,
 noashiretea maaroni quitaiteeripeequi?
 ¿Irosatimpa incantea imperanajeitena quisajeitanari?
- ³ ¡Tasorentsi, avirotaque Notasorentsite,
 pamenena, pamitacotena!
 ¡Piveshireacaajena, eiro imatanteetanatsi iroyeetena!
- ⁴ ¡Eiro icantantatsi quisajeitanari: “Nanaacotaqueri”!
 ¡Eiroquea iquimoshirejeitantatsi nashinoncaaquearica!
- ⁵ Noshiretasanotimpi; tempa pinintasanotana.
 Nonquimoshiretasanotanaque;
 tempa poavisaacotaquena.
- ⁶ ¡Nompampoyeacoventeri Tasorentsi;
 tempa icavintsaaquena!

Yantayetiri atiri caari iotiri Tasorentsi

(Ivampoyeane David)

(Sal. 53.1-6)

- 14** ¹Yora caari iojeitatsi iquenqueshireti;
 “Tecatsi Tasorentsi.”
 Icaariperotasanojeitanaque, maaroni;
 yantajeitanaquero catsini caari cameetsatatsi.
 ¡Te intimeji anteroneri cameetsatatsiri!
- ² Anta inquitequi yamenajeitaqueri Tasorentsi atiripee,

- jaanica timatsiri iotantari,
aisati coatsiri iriotajeri Tasorentsi.
- 3 Iro cantaincha yantajeitaquero maaroni caari cameetsatatsi;
iquempeavacaajeitanaca maaroni icaariperojeitanaque.
¡Te intimeji anteroneri cameetsatatsiri!
¡Te intimimate aparoni!
- 4 Te aneroji iojeitantari yora caari cameetsajeitatsi.
Yora tsoncajeitiriri noshanincepee
iquempetacantaqueri itsonqueetiro tanta,
te inquenquetsatacoteriji Tasorentsi.
- 5 Intsaroasanojeitanaque ipioncanaque catsini.
Tempa quiso yoaqueri Tasorentsi quemisantajeitiriri.
- 6 Ishirontimentaro ora icoasanovetari caari piacoventacha.
Iro cantaincha iquempoyeaventiri Tasorentsi.
- 7 ¡Cantenane impoque nampitsiqui Sión
oavisacojeiterine ishanincajeitaniri Israel!
Ariorica iroimpiajeitajeri Tasorentsi ishanincajeitaniri
Jacobo,
irisavicajeitantajeari cameetsa,
inquimoshiretasanojeitanaque.

Icoacairiri Tasorentsi atiri iranteri

(Ivampoyeane David)

- 15** ¹Notasorentsiti, ¿Jaanica pishineteri savicatsineri
Pinantariqui?
¿Jaanica pishineteri intime toncaariqui poameetsatiri?
- ² Apaniro irinti savicatsiri cameetsa,
moncaratirori picoacaaqueriri,
antapiniyetirori cameetsayetatsiri,
neanatatsiri cameetsa;
- ³ yora caari cantimatantatsine,
caari oashinoncayerine itsipavintsatari,
aisati caari cantanentacari icarajeitiri;
- ⁴ Yora manintiriri antayetirori caari cameetsatatsi,
irintiquea ineacameetsatiri pincatsatiriri Tasorentsi,
yora moncaratirori paitarica icashiacaari, omavetaquea
ompomerentsitimovetaqueari;
- ⁵ yora pashitariri ishaninca quireequi icoacotiririca,
caari coacoterine quimota iroanaavajeneri,
aisati caari coatsi iraanteari ishaninca quireequi
iroashinoncanteariri caari timatsine irantane.
Yora matasanoteroneri, eiro catsini yashinoncaatsi.

Ocameetsatasanotaque icashiacaaqueeri Tasorentsi

(Ivampoyeane David)

- 16** ¹¡Notasorentsite, pinquempoyeacoventena,
avirotaque naventari, pinticaacoventena!
- ² Nocantaquempi: “Avirotaque Notasorentsite cavintsaanari;
Tecatsi pashini quempetempine.”
- ³ Icantajeiti veshireimentashiyetarori ijitasorentsiyetiri:
“Ishintsitasanoti notasorentsitepee timatsiri noipatsitepeequi.”
- ⁴ Aisati shequiasanotiriri yovetsicashiyetari,
icantani ipincatsatasanoyevetari.
¡Naintiquea, eiro catsini nocaratiritsi nontayeneri virantsi!
¡Eiro catsini noquenquetsatacotiritsi ivajiroqui!
- ⁵ Notasorentsite, aviro ashitanari maaroni;
avirotaque tasoncacoventanari;
aisati avirotaque quempoyeacoventanari.
- ⁶ Ocameetsaiteasanotaque quipatsi pipaquenari.
¡Ocameetsatasanotaque nashitacari!
- ⁷ Noncanteri Tasorentsi: Picameetsati;
tempa irio iotacaasanotanari nosavicantari cameetsa,
yoameetsashiretana tsiteniripeequi.
- ⁸ Nocantani, noquenqueshiretapinitiri Tasorentsi.
Tempa quiso yoaquena, tecatsi anaacotenane.
- ⁹ Irotaque noquimoshiretasanotantacari catsini.
Nosavicantajeari cameetsa, tecatsi nonquequeshireveete;
- ¹⁰ tempa eiro pojocanatsi intiminta camayetatsiri.
¡Eiro pishinetanatsi impatsaye omoroqui;
tempa naro pinintane quemisantimpiri!
- ¹¹ Pineacaajenaro naneasanotanaje aisati.
Antearoite quimoshiretantsi pitiminta,
cameetsa nosaviquimotapaajempi, noncanteani.

Yaventacari Tasorentsi, incantacoventeri cameetsa

(Ivampoyeane David)

- 17** ¹Novincatsarite, nocajemimpi,
pincantacoventena cameetsa.
Pinquemero noquenquetsatacaimpiri;
tempa tecatsi nante nontseeyanteari.
- ² ¡Pincantacoventena avinti;
tempa aviro iotirori queariotatsiri!
- ³ Piotasanotiro noquenqueshireantari,
pipocashitaquena tsiteniriqui, pamenacoventaquena;

- pishinetaquena ineanteetasanotaquena.
 Iro cantaincha pineaquena tecatsi nantane;
 te noneaveeteroji caari cameetsatsi.
- 4 Te nonquempeteariji itsipapee;
 te noncaratajeri oantayetatsiri,
 nomoncarataquero picantacantiri.
- 5 Noquemisantasanotaquero poametaquenari;
 te catsini nompeacotearoji.
- 6 Notasorents site, aviro noquenquetsatacairi;
 tempa niotaque pamitacotena;
 pinquemero noncantempiri.
- 7 Piotacaasanotenaro pinintaquena.
 Avirotaque, oavisaacotiriri aventajeitimpiri pitasorencaqui;
 eiro yoantaritsi quisaqueriri.
- 8 Pishentena, oquempeta pishentiro poqui;
 pinticaacoventena pitasorencaqui
 oquempeta tiapa asaromonquitiri orijani;
- 9 ¡eiro imatantanatsi iroyena caari cameetsajeitatsi
 quisaquenari, shoncajeitaquenari!
- 10 Te incavintsantaajeiteji, ineavetashijeita ishemejeiti.
- 11 Yoijanatapinitaquena quempeji, icoasanotaque iroyena.
- 12 Iquempetacari anteariite maniti quishincari
 imanashitari iovintsane,
 yoyeaqueri irantavaqueariri.
- 13 ¡Notasorents site, intsipaite pimpiajeiteari avinti!
 Panaacoteri quisajeitanari pitasorencaqui, poavisaacotena.
- 14 Pojocaacoventena; tempa pishintsitasanoti.
 ¡Pintsoncajeiteri; eiro itimantajatsi quipatsiqui.
 Tempa tecatsi pashini meeca irashijeiteari!
 Pishineteri irashitaarantea,
 aisati iroapinijeitea itomipee,
 irosati intsirajantanaquea,
 aisati inquempjeitea icharinepee.
- 15 Iro cantaincha nainti, queario noveshireimentempi,
 ¡ariorica noneavorotajempi nontinaanajerica coajica!

Ipampoyeaventaqueri Tasorents iyoavisaacotaqueri

(Ivampoyeane David)

(2 Sam. 22.1-51)

18 1 ¡Notasorents site, avirotaque matacaanari,
 nonintasanotimpi!

- 2 Avirotaque jocaacoventanari naventari, oipacacoventanari.
 Notasorensite, piquempetimotaquena ojenoquiti imperita
 jocaacoventanari
 jero ashirotsatsiri ticaacoventanari,
 aisati Oavisaacotanari pitasorencaqui,
 eiro imatacoyeetantanatsi nomanapinitantari.
- 3 Notasorensite, ocameetsati noncantacotempi: Picameetsati.
 Ariorica naventimpi, poavisaacotana,
 caari imatantana quisajeitanari.
- 4 Irovetaincha noncameme,
 oshequi notsaroacaacaro covencatatsiri aavetaquenari;
- 5 oquempetaca noquempejitacaró itimajeitinta camayetatsiri.
- 6 Opomerentsitimotantaquenari, naventacari Notasorensite,
 nocantaqueri iramitacotena.
 Ari iquemaquena anta Ivancoqui;
 iquemasanotaquero nocajemantacariri.
- 7 Irosati imatantacaró Tasorensi
 onicanaca antearoite quipatsi,
 onicana toncaaripee irosati ishaaviji;
 tempa iquisanaca
- 8 ¡Osoquijanaquero cachaajenca,
 aisati paamari tsoncantatsiri
 jero omenqui parashetatsiri!
- 9 ¡Otencareanaque inquite!
 ¡Yaniireantapaacaro antearoite mencori tsitenishaatatsiri!
- 10 Iquijacotacari inampire,
 yaranaque tampeajencaqui.
- 11 Imanacaró mencori tsitenishaatasannotatsiri
 otimantari nija oshoncacari.
- 12 Oporecanaque, oponeanaca itimaquenta,
 aisati iriniqui jero omenqui parashetatsiri,
 oponeanaca mencoriqui.
- 13 Ari ineanataque Tasorensi Inquitequiniri,
 iquempetacaró otirei;
 otimaquenta iriniqui aisati omenqui parashetatsiri.
- 14 Antearoite iporecayetanaque,
 iquempetacaró chacopipee.
 Yoimishiajeitaqueri quisajeitaquenari, yovaraajeitanaca.
- 15 Iquisatsatantancari Tasorensi,
 itiancaquero tampea shintsijencatatsiri
 itasoncaajataquero incajare oconijatanaque tsonpoinaqui,
 ineajeitaquero maaroni.

- 16 Yora Tasorensi savicatsiri inquitequi
yamitacotaquena aca quipatsiqui,
yoavisaacotaquena antearojaqui incajare.
- 17 Yoavisaacotajana iroyename quisajeitaquenari
neaperotasanotachari, yanaacotaquena nainti.
- 18 Opomerentsitomotantaquenari imapocaquena yoashinoncaaquena.
Iro cantaincha yamitacotaquena Tasorensi.
- 19 Yoipacaacoventajana, yoavisaacotajana;
tempa icavintsaquena.
- 20 Itasoncacoventaquena Tasorensi, intacotaquena,
ineaquena nantayetaquero cameetsatatsiri.
- 21 Tempa noquemisantasanotaqueri,
¡te catsini nompiatsatearaji Notasorensite!
- 22 Noquenqueshiretapinitiro icantacantiri.
¡Te catsini nompiatsatearaji!
- 23 Cameetsa nosaviqui, tecatsi nantimoteri;
nojocaquero caari cameetsatatsi.
- 24 Itasoncacoventaquena Tasorensi, intacotaquena;
tempa nantimoyetaqueneri cameetsatatsiri.
- 25 Notasorensite, aviro moncaratirori picantiri,
quiso poaqueri quearioventimpiri,
aisati savicatsiri cameetsa;
- 26 ponijaaqueri cameetsa yora cameetsashirejeitatsiri.
Irintiquea ioyevetachari yamatavitanti,
panaacotasanotiri piotasanoti avinti.
- 27 Poavisaacotiri caari shemetatsi,
irintiquea shemetatsiri poashiventairi.
- 28 Notasorensite, piveshireacaayena,
nosavicanteari cameetsa.
Onquempetimotantenari piquitaiteacotana tsiteniriqui.
- 29 Pamitacotena nomanatanteariri quisajeitaquenari,
navisanaquerota otantotacoro inampipee.
- 30 Ora yoametantiri Tasorensi ocameetsatasanotaque,
aisati icashiacaqueri, irotaque ashiretasanotantearori.
¡Iticaacoventiri Tasorensi maaroni shiretariri!
- 31 ¿Timatsimpa pashini tasorensitatsiri quempetariri Notasorensite?
¿Timatsimpa ijitasorensiyeetiri materone inticaacoventajeitee?
- 32 Iriotaque Tasorensi matacaanari
aisati oameetsatanari nosavicantari cameetsa.
- 33 Iriotaque shintsitacaanari noquempevetacari maniro,
naniitantari cameetsa toncaaripeequi.
- 34 Iriotaque oametanari nomatanteari nomanatea,

- aisati ishintsitacaana nontsiero pea vetsicachari bronze.
- 35 Avirotaque ticaacoventanari aisati oavisaacotanari.
Pamitacotaquena pitasorencaqui,
picavintsasaanotaquena, nosavicantari cameetsa.
- 36 Poameetsataquenaro avotsi noquenantacari,
eiro nopariantatsi, imatantacanari quisajeitanari
irotaque caari yanaacotantajeitana.
- 37 Noijanajeitanaqueri quisajeitanari nareejitavajari,
notsoncajeitavajiri, irosati nopiantaja.
- 38 ¡Notsoncasanojeitaqueri,
te intinaajeitajeji, naaticanaqueri!
- 39 Pishintsitacaaquena nomanajeitaqueri
picantacashireacaacari piatsajeitachari ipincatsataquena.
- 40 Ishiapitsajeitanaquena maaroni quisajeitanari,
aitaque nocantaqueriri notsoncajeitaqueri.
- 41 Icoavetanaca amitacoterineme.
Iro cantaincha tecatsi amitacoterine;
Yaventavetanacari Tasorentsi,
iro cantaincha te iramitacoteriji.
- 42 ¡Novejaaqueri quempetanaca quipatsivane
aajencatiri tampea!
¡Naaticaqueri noquempetacantaqueri cajavatsari yaaticapiniyeetiri!
- 43 Poipacaacoventaquena caari imatantana atiripee piatsatachari.
Pipeaquena jivatacayerineri savicayetatsiri nampitsipeequi.
Yora pashinisatipee caari nioti, iquemisantaquena.
- 44 Ariorica iquemana, iquemisantajeitana,
aisati iquempeta pashinisatipee atiri, ineacameetsatana.
- 45 Itsarocaaquena, te irineaperotanajea,
itsitireanaja imanaveita aisati ipioncajeitanaca.
- 46 ¡Yaneasanoti Tasorentsi!
¡Icameetsataque jocaacoventanari!
¡Ocameetsati impincatsayeeteri Tasorentsi Oavisaacotanari!
- 47 Iriotaque Tasorentsi piacovoltaquenari
aisati coacaquenari impincatsajeitena atiripee.
- 48 Yoavisaacotaquena itsimaajeivetaquena quisajeitanari,
yora piatsajeitachari pocashijeivetaquenari.
¡Tasorentsi, avirotaque oavisaacotaquenari,
caari imatantana oantatsiri!
- 49 Irotaque nocantacotantimpiri: Picameetsati;
aisati nopampoyeacoventantimpiri,
iquemajeitaquena savicayetatsiri nampitsipeequi.
- 50 Pimatacaquena nanaacotantaque;

tempa naro pincatsari picoyeaqueri;
picantani pincavintsaakeri David
aisati iriori irishanincajeitajeari.

Maaroni yovetsicaqueri Tasorentsi oinijantiro itasorenca

(Ivampoyeane David)

- 19** ¹ Ora inquite oinijantiro itasorenca Tasorentsi;
iotacaajeitee maaroni timayetatsiri inquitequi.
- ² Ora quitaiteripee iotacaapinitee,
aisati tsiteniripee oametapinitee
jaoca icanta Tasorentsi.
- ³ Te anquemavetearoji oneanate,
- ⁴ iro cantaincha otsoteaca camantantsi
maaroni quipatsipeequi.
Anta inquitequi yoaqueri Tasorentsi catsirincaiteri,
- ⁵ ariorica irisoquijanaje, iquimoshiretasanoti,
iquempetari shirampari iroaquera aatsi ijina,
aisati iquempetari shiashiatachari.
- ⁶ Irisoquijanajerica, irosati iqueantanajea;
tecatsi manapitsatearone iatsirincare.
- ⁷ Ora yoametantiri Tasorentsi ocameetsatasanotaque;
tempa opashinishiretacanti;
oqueariotasanoti incantacantiri,
iotacairi caari neaperotacha.
- ⁸ Ora icantacantiri Tasorentsi ocameetsatasanotaque,
oquimoshiretacaasanotanti aisati oqueariotasanoti,
iotacantiro cameetsatatsiri.
- ⁹ Ocameetsatasanoti ampincatsateri Tasorentsi,
ancanteani amajeitero;
Ora icantacantiri Tasorentsi,
oqueariotasanoti aisati otampaticati.
- ¹⁰ ¡Ocoasanota anaacotaqueri oro ioshitachari!
¡Opochatasanoti anaacotaqueri ija pitsi!
- ¹¹ Oametasanotana eiro nantiro caari cameetsatatsi;
ocameetsati nonquemisantero,
nosavicanteari cameetsa.
- ¹² ¿Jaanica iotacotirori yantayetiri?
¡Notasorentsite, pimpeacotenaro nantayetiri nomanaqueri!
- ¹³ Pimpeajenaro noshemeti; tempa naro quemisantimpiri;
eiro pishinecoventanatsi anaacotena.
Irointiquea nosavique cameetsa,
eiro otimimotanatsi antearoite caari cameetsatatsi.

- 14 Notasorensite, nocoi pineacameetsatero
noneanayetiri aisati noquenqueshireyetiri,
avirotaque naventari aisati jocaacoventanari.

Icoacotiri Tasorensi iramitacoteri

(Ivampoyeane David)

- 20** ¹Irio Tasorensi amitacotempine
ariorica ompomerentsitimotempi.
Iriotaque Itasorensite Jacoboni,
piacoventempine.
- ²Intianquempi amitacotempine
imponeaquea Pinantariqui anta toncaari Sión.
- ³Inquenqueshireacotempiro maaroni pipashitapiniyetariri,
aisati irineacameetsatero pitaapinitiniriri altariqui.
- ⁴Irimoncaratempiro maaroni picoayetiri,
aisati irimatacayempiro maaroni
piquenqueshiretiri pantayeteri.
- ⁵Impoiiji anquimoshireventajeitero;
tempa panaacotantaque;
aisati avancajeitero banderapee
ampincatsatanteariri Atasorensite.
¡Iriotaque moncaratempirone
maaroni pincoacoteriri!
- ⁶Meece niotasanoaque irimatacaasanoteri Tasorensi
yora pincatsari icoyeaqueri iranaacotante,
aisati iramitacoteri imponeaquea inquitequi.
- ⁷Ainiro inaveta aventarori ishiacomentopee imanatacaari aisati
iyavaayotepee.
Irompa arorijeji aventari Tasorensisanori Atasorensite.
- ⁸Irioripee itiyeroashijeitari aisati ipariajeiti quipatsiqui;
Irompa arorijeji irosati ancantea ancatajeite.
- ⁹¡Notasorensite, pimatacaasanotena nanaacotante;
tempa narotaque pincatsari!
¡Pamitacotena ariorica naventajeitempi!

Ipampoyeacoventiri Tasorensi imatacaaqveri yanaacotantaque

(Ivampoyeane David)

- 21** ¹Tasorensi, iquimoshireti pincatsari;
tempa pishintsitacaaqueri.
¡Meece iquimoshiretasanotaque;
tempa pimatacaaqveri yanaacotantaque!
- ²Pimoncarataqueneri icoasanotaqueri,

- te pintsanemparoji icoacotaquempiri.
- 3 Paacameetsatasanotaqueri,
antearoite pitasoncacoventaqueri,
aisati pamatseetantacari oro.
- 4 Icoacotaquempiro poaneeri,
ari pimataquero poaneasanotaqueri osamani.
- 5 Pimatacaaqueri yanaacotanti pitasorenaqui
Pipincatsaritacaasanotaqueri, ineacameetsatanteetariri.
- 6 Picantaitatiani pitasoncacoventasanotaqueri;
quiso poaqueri piquimoshiretacaasanotaqueri.
- 7 Aviro pincatsiri, eiro catsini pipeatsi;
tempa pishiretari Tasorentsi.
¡Pishiretasanotari Inquitequiniri nintantatsiri,
cavintsaasanotaquempiri!
- 8 Pimateri quisajeitimpiri, panaacotasanoteri.
- 9 Pintsoncasanotanteari paamari amorecatsiri,
ariorica pimpocaje pincantacoventajeitanteariri.
Yora Tasorentsi inquisasanoteri
intoncasanotanteari paamari tsoncantatsiri.
- 10 Pintsoncasanotajeri maaroni atiripee,
itomipee jeri irishanincajeivetajeari,
- 11 Incoavetaquea iroashinoncaypime,
aisati inquenqueshirevetanaquearica jaoca incantempiri,
iro cantaincha eiro imatirotsi.
- 12 Tempa ari poimishiajeitaqueri avinti,
pimanatanteari piveane chacopiqui.
- 13 ¡Notasorentsite, ponijantero pitasorena!
¡Noveshireimentajeitempi,
nompampoyeacoventempi panaacotasanoantaque!

Ipampoyeacoventiro iquemaatsicatantacarori

(Ivampoyeane David)

- 22** 1 ¡Notasorentsite! ¿Paita pojocantaquenari?
¿Paita caari pipocanta poavisaacotena?
¿Paita caari pamenantana nocavintsantacari?
- 2 Notasorentsite, nocantani quitaiteriqui
aisati tsiteniriqui naventavetaquempi;
iro cantaincha te pancacotenaji.
¡Te catsini nomacoreeji!
- 3 Avirotaque cameetsatasanotatsiri, pipincatsariventanti;
ineacameetsajeitimpi ishanincajeitaniri Israel.
- 4 Yora intacantaquenaniri ishiresanotimpi,

- pojocaacoventaqueri;
 5 yaventaajeitaquempi pamitacotaqueri;
 poipacaacoventaqueri, te pamataviteriji.
 6 Irompa nainti te naro atiri,
 noquempetacari quenitsi.
 ¡Ishirontimentana atiripee!
 7 Yora neayetaquenari yoaacocatana,
 ineanatseratimotana aisati itecainajeita iitoqui.
 8 Icanti: “Tempa ishiretari Tasorentsi,
 iriotaque oipacaacoventerine;
 tempa inintasanotiri, iroavisaacoterita.”
 9 Aitaque ocantari, avirotaque vetsicaquenari otsomontequi ina,
 aisati pimacoreacaquena atsotaantaquenari.
 10 Tequerani nontime, piquempoyeaventaquena;
 Ainiroquerani otsomontetana ina, avirotaque Notasorentsite.
 11 Eiro pinijantareanatsi meeca,
 tempa opomerentsitimotasanaquena;
 tecatsi amitacotenane.
 12 Yora quisanari ishoncajeitaquena,
 iquempetacari vacapee quishincari
 timatsiri nampitsiqui Basán;
 13 aisati iquempetacari anteariite maniti,
 amoroatsiri iquirancasanaquaque,
 irimitajashitantenari irantsiquena.
 14 Noquempetacaro nija isacojayeetiri;
 ora notonquipee jeocayetanaque,
 aisati noshire ovejaasanotanaca oquempetanacaro icanteetiri cera.
 15 Ora novante opirijatasanotanaque
 aisati nonene opatacanaca novantequi jenioquiji.
 ¡Pojocasanotaquena quipatsiqui tsompoina,
 oquempevetaca nocamasanaquaque!
 16 Oshequi caari cameetsajeitatsi ishoncaquena,
 iquempevetacari otsitiniropee;
 iquishaayetapaaquena nacopeequi aisati noitipeequi.
 17 ¡Oconijayetanaque jaoca ocarayeti notonqui!
 Yora quisajeitaquenari icantani yamenashetana.
 18 Ipavacaajeitacaro noitsaare
 aisati ineatsatimentacaro ipishonquimentiro mapijaniqui.
 19 Notasorentsite, avirotaque shintsitacaanari.
 ¡Eiro pinijantareanatsi!
 ¡Intsipate pamitacotena!
 20 Poipacaacoventena, eiro yoanteetaanatsi,

- eiro pishinetiritsi iroyena quempevetariri otsitipee.
- 21 Poavisaacotena, eiro yatsicantanatsi
shiavetariri anteariite maniti.
¡Pimpiacoventena, eiro isatantanatsi shiavetariri quishincari vacapee!
- 22 Ariorica noncarateri noshanincapee, nonquenquetsatacotempi,
aisati nampatojeitearica, noncante: Picameetsati.
- 23 Avirojei pincatsatiriri Tasorentsi, ¡pimpampoyeaventasanoteri!
¡Avirojeitaque ishanincajeitaniri Jacobo,
pincantajeite: “Icameetsatasanoti Tasorentsi!”
¡Avirojei ishanicajeitaniri Israel,
pimpicatsatasanojeiteri!
- 24 Tempa te impeacoteariji yashinoncaarica coiteaveetatsiri,
te irineashiteariji, aisati te irimanapitsateari.
¡Iquemiri ariorica yaventajeitari!
- 25 Noncarateri maaroni pishanincajeitajari noncantacotempi,
ocameetsati pimayetaqueri;
irineena pincatsajeitimpiri
nomoncaratasanotempiro nocantimpiri.
- 26 Avirojei yoashinonqueetiri,
poajeitea irosati pinquemasanojeitantanaquea.
Aviro coajeitiriri Tasorentsi,
pincantacotapiniteri: Icameetsati,
iroaneasanojeitantempiri osamani.
- 27 Maaroni pashinisatipee atiri
savicayetatsiri nampitsipeequi aisati maaroni quipatsipeequi,
pinquenqueshirejeiteri Tasorentsi.
¡Pimpocashjeiteri pintiyeroimentajeiteari, pimpincatsateri!
- 28 Tempa iriotaque Tasorentsi Pincatsarisanori,
ipincatsariventiri maaroni atiripee.
- 29 Maaroni otimimojeitiri paitapeerica,
poivotashijeiteari, pimpincatsateri apaniro,
aisati maaroni camajantsineri;
tempa tecatsi aneashitachane.
- 30 Yora noshanincajeitajeari impincatsajeiteri Tasorentsi,
aisati inquenquetsatacotapiniteri;
- 31 aisati incamantajeiteri timajeitajantsineri coajica,
cameetsa icavintsaanti, aisati ocameetsajeitaque yantayetaqueri.

Iriotaque Tasorentsi amenacoventanari

(*Ivampoyeane David*)

23 1 Yora Tasorentsi iriotaque shentanari,
tecatsi coiteimotenane;

- iquempevetacari shentiriri ovisha.
- 2 Imacoreacaana eereshiiteaquenta saveshi,
aisati yaapinitana iracaana nija majerejatatsiri.
- 3 Ishintsitacaapinitana aisati yoametana nosavicanteari cameetsa,
yonijantiro itasorenca nopincatsatantariri.
- 4 Omavetaquea nonquenantearo oirincaiteayeti otsitenisheasanoyeti,
eiro notsarooacaarotsi covencayetatsiri;
tempa aviro, Tasorentsi, quiso oaquenari,
piotacaaquena quiso poana, noshiretasanotantimpiri.
- 5 Povetsicaquenaro oanarontsi noyeani
irineajeitena maaroni quisanari,
pisaitantaquenaro noitoqui quejitsi casancajencatatsiri,
aisati pijaasanotaquenaro niramanto.
- 6 Picantani pincavintaapinitana
aisati pinintasanotana ainiroquera osamaniti nanee.
Notasorentsite, noncanteani nosaviquimotempi anta pinampiqui.

Tasorentsi pincatsariventirori maaroni timayetatsiri

(Ivampoyeane David)

- 24** ¹Iriotaque Tasorentsi ashitarori maaroni quipatsi
jero maaroni timajeitatsiri aisati maaroni savicajeitatsiri.
- ²Tempa iriotaque ovaquerori quisotacairori quipatsi
otimantanacari incajarepee jero nijapee.
- ³¿Jaanica ishineeteri intoncaye toncaariqui
yoameetsatiri Tasorentsi?
¿Jaanica ishinteeteri incanteani intime
Ivancoqui cameetsatasanotatsiri?
- ⁴Yora antapinitirori cameetsayetatsiri,
caari quenqueshiretiro irantero caari cameetsatatsi;
caari pincatsatashiyetari ijitasorentsitashiyetari
aisati caari cantashiyetacha intseeypa.
- ⁵Yora Ivincatsarite Tasorentsi
aisati Oavisaacotantatsiri
intasoncacoventeri, incavintsayeri.
- ⁶Aitaque incanteari aventariri Tasorentsi,
yora coatsiri incarateri Itasorentsite Jacoboni.
- ⁷¡Pashitareero ashitacoropee nampitsi Jerusalén,
inqueantapempari Pincatsarisanori
timatsiri itasorenca!
- ⁸¿Jaanica yora Pincatsari timatsiri itasorenca?
¡Iriotaque Tasorentsi shintsitasanotatsiri
aisati neaperotasanotachari!

- ¡Iriotaque Tasorentsi neaperotachari imanata!
 9 ¡Pashitareero ashitacoropee nampitsi Jerusalén,
 inqueantapempari Pincatsarisanori
 timatsiri itasorenca!
 10 ¿Jaanica yora pincatsari timatsiri itasorenca?
 ¡Iriotaque Tasorentsi mayetirori maaroni!
 ¡Iriotaque Pincatsari timasanotatsiri itasorenca!

Iquenquetsatacairi Tasorentsi iriotacaasanotanteariri

(Ivampoyeane David)

- 25** 1 Notasorentsite, aviro noquenquetsatacairi;
 2 avirotaque noshiretari.
 Eiro pishinetanatsi nompashiventea.
 ¡Eiro ishirontimentantanatsi quisajeitanari!
 3 ¡Eiro catsini pishinetiritsi impashiventea shirejeitimpiri!
 ¡Irintiquea pashiventachane yora piatsatashijeitimpiri!
 4 Notasorentsite, piotacaasanotenaro
 jaoca noncanteari nantantempirori picoacaanari
 aisati poametena nosavique cameetsa;
 5 ponijayenaro queariotasanotatsiri;
 tempa avirotaque Notasorentsite oavisaacotantatsiri.
 ¡Maaroni quitaiteripeequi aviro noshiretari!
 6 Notasorentsite, pinquenqueshiretero pinintasanotaquena,
 aisati picavintsaquena, ora ponijaapinitaquenari.
 7 Iro cantaincha, eiro pinquenqueshireacotanarotsi
 caari cameetsatatsi nantaqueri,
 aisati te nonquemisantempiji nevancaritantapaacari.
 Irointiquea, pinquenqueshiretena;
 tempa pinintasanotana aisati picameetsataque.
 8 Icameetsasananoti Tasorentsi, itampaticati.
 Yoasanquetairi antirori caari cameetsatatsi
 yoametantariri irisavicaje cameetsa.
 9 Aisati iotacairi caari shemetatsi icoacaaqueriri.
 ¡Yoametasanotiri irantero cameetsatatsiri!
 10 Icantani inintasanotiri aisati icarajeitiri
 maaroni moncaratirori icantacantiri.
 11 Notasorentsite, oshequi catsini
 nantaquero caari cameetsatatsi,
 pimpeacotajenaro;
 irotaque nopincatsatantimpiri.
 12 Yora pincatsatiriri Tasorentsi,
 iroametasanoteri irantantearori cameetsatatsiri,

- 13 irisavicacayeri cameetsa,
aisati impajeiteri irishanincajeitajeari
iipatsite irashijeiteari.
- 14 Ishanincatacari Tasorentsi pincatsatiriri
aisati iotacaasanotiri icoacaaqueriri.
- 15 Noncanteani naventeari Tasorentsi iramitacotena,
tempa iriotaque nijantareacoventanari
maaroni covencatatsiri.
- 16 Pinquenqueshiretena Notasorentsite, pincavintsayena,
tempa apaniro noni, oshequi yoashinonqueetaquena.
- 17 Aiquero ojatatii ocantimonentasanotana;
pojacaacoventenaro pomerentsitimotaquenari.
- 18 Pinquenqueshireacotena,
oshequi noashiretaca opomerentsitimotaquena,
aisati pimpeacotenaro nantane.
- 19 Pameneri oshequi quisaquenari, icoaque iroyena.
- 20 ¡Pishentena, poavisaacotena, eiro yoantanatsi!
¡Eiro pishinetiritsi irovashiventena;
tempa aviro naventari!
- 21 Pojacaacoventena; tempa notimi cameetsa;
tecatsi nante, irointi noshiretasanotimpi.
- 22 ¡Notasorentsite, poavisaacoteri ishanincapeeni Israel;
tempa oshequi yashinoncaajeitaca!

Cameetsa isaviqui antirori cameetsayetatsiri

(Ivampoyeane David)

- 26** ¹Notasorentsite, pincantacoventena;
tempa nomoncarataquero picoacaanari, tecatsi nante;
nocantani noshiretasanotimpi.
- ²Pamenasanotena jaoca nocantari.
¡Pineantearo noquenqueshireyetiri
aisati nocoashireyetiri!
- ³Noquenqueshiretapinitiro pinintasanotana
aisati noquemisantimpi.
- ⁴Te catsini noncarateri tseyajeitachari
aisati amatavijeitantatsiri.
- ⁵Te noneacameetsateroji yapatojeitarica caari cameetsajeitatsi.
¡Te catsini nontsipateari piatsatachari!
- ⁶Notasorentsite, noameetsataca, te aneajeroji nantane,
meca nocoli nojate otiminta altar,
- ⁷nompampoyempiro pampoyeantsi cantacotirori: Picameetsati,
aisati noncamantacotero pimayetaqueri caari ineapiniyeeti.

- 8 Notasorensite, nonintasanotiro Pancotsi Pinantari,
otimasanotinta pitasorenca.
- 9 Eiro poamanatsi pitsipataanaricari
antirori caari cameetsajeitatsi,
aisati eiro poashinoncaanatsi
pitsipataanaricari oantajeitatsiri,
- 10 aisati aantariri quireequi ishaninca yoashinoncantariri.
- 11 Naintiquea, tecatsi nante.
¡Poavisaacotena aisati pincavintsayena!
- 12 Noquearioventasanotaquero noshiretimpi.
¡Nompasonquiteri Tasorensi noncarateri noshanincepee!

Iriotaque Tasorensi oaneanari aisati oavisaacotanari

(Ivampoyeane David)

- 27** 1 Iriotaque Tasorensi oaneanari aisati oavisaacotanari
¿Jaanica nontsaroacayeari?
Iriotaque piacoventanari
¿Jaoca itimiri nontsaroacayeari?
- 2 Yora caari cameetsajeitatsi quisajeitanari
yapatotimentajeitaquena impocashitantenari intsoncajeitena.
Iro cantaincha irisati ompomerentsitimojeitajea,
irashinoncaajeitea.
- 3 Omavetaquea impocashitena oshequi manatachari,
irishoncajeivetapaaquena, eiro nontsaroashiretitsi.
Aisati irovetsicasanojeivetempa irimanatantenari,
iro cantaincha noncanteani nontime cameetsa.
- 4 Timatsi aparó nocoacotiriri Tasorensi;
nocoasanoaque nontimantearo Ivancoqui
maaroni quitaiteripeequi,
nompincatsatanteariri aisati namenero ocameetsati ivanco.
- 5 Ariorica ompomerentsitimotena,
inticaacoventena Tasorensi Ivancoqui,
aisati iroavisaacotena.
¡Iquempetacantaquena yoaquena imperitaqui jocaacoventanari!
- 6 Ari nomatantearori nanaacoteri quisajeitanari,
irosati nontaanteariri virantsi Ivancoqui Tasorensi,
aisati noncajeme nonquimoshiretanaque,
nompampoyeacoventeri Tasorensi.
- 7 Avirotaque Tasorensi naventari, pinquemisantena.
Nocoaque pineshinoncatena, ¡pamitacotena!
- 8 Nocantashireti: “Ocameetsati naventari Tasorensi.”
Irotaque meeca, Novincatsarite, naventantimpiri, quiso noyempi.

- 9 ¡Eiro pimanapitsatanatsi!
 ¡Eiro piquisanatsi pinijantareantenari!
 ¡Avirotaque apaniro amitacotanari!
 Eiro pojocanatsi apaniro, tecatsi amitacotenane;
 tempa avirotaque Notasorentsiste oavisaacotanari.
- 10 Omavetaquea irojocavetena apa aisati ina;
 avirotaque Tasorentsi quiso oyenaneri.
- 11 Notasorentsiste, ponijayenaro cameetsayetatsiri,
 piotacayena jaoca noncanteari nontime,
 eiro imatantanatsi quisajeitanari.
- 12 Eiro pishinetiritsi irantero icoacaari iraantenari;
 tempa icoajeitaque iroashinoncayena tseeyaripee.
- 13 Iro cantaincha, niotasanotaque aitaque noneasanotaquero
 intasoncacoventena Tasorentsi ainiroquera nanei.
- 14 ¡Pishiretasanoteari Tasorentsi!
 ¡Pishintsishirete, eiro picantashiretitsi!
 ¡Queario, pishiretasanoteari irinti Tasorentsi!

Iquemisantiro Tasorentsi acoacojeitiriri

(Ivampoyeane David)

- 28** ¹Notasorentsiste, jocaacoventanari, aviro naventari.
 ¡Eiro piquisotitsi, pamitacotena!
 Eirorica pamitacotana,
 aitaque noncarataqueri camajeitatsiri.
- ²Pinquemero ariorica nocajemempi pamitacotena,
 noanquerorica naco otiminta Pivanco cameetsatsiri,
 nonquenquetsatacayempi.
- ³Eiro pitsipataanaritsi caari cameetsajeitatsi,
 ariorica poashinoncayeri;
 eiro piquempetacantanatsi antayetirori caari cameetsatsi
 ariorica poasanquetairi.
 Iquempetacantashiveta icameetsati,
 Iro cantaincha iquenqueshiretiro irantero caari cameetsayetatsi.
- ⁴Poashinoncaimentero caari cameetsayetatsi yantashijeitacari,
 poimpiajeneri ora yantaquero caari cameetsatsi,
 iquempetaquero itsipapee.
- ⁵Tempa te inquenqueshiretero maaroni ivetsicayetaquero Tasorentsi.
 ¡Intsoncajeitajerita, eiro itimajeitanajitsi!
- ⁶¡Icameetsatasanoti Tasorentsi,
 iquemaquero nocoacotaqueriri!
- ⁷Yora Tasorentsi mayetirori maaroni, jocaacoventanari.
 Irio noshiretasanotacari, yamitacotantaquenari.

- Meeca noquimoshiretasanoti;
 nompampoyeaventeri Tasorentsi aisati nompasonquiteri.
 8 Iriotaque Tasorentsi ticaacoventiriri itasorenaquai ishanincajeitajari.
 Irio amitacotiriri pincatsari icoyeaqueri aisati iticaacoventiri.
 9 Tasorentsi, poavisaacoteri pishanincajeitajari;
 pintasoncacoventeri.
 Pincanteani pishenteri,
 pinquempeteari shentiriri ovisha yatsomairi irijani.

Oqueariotasanoti ineanati Tasorentsi

(Ivampoyeane David)

- 29** 1 Avirojei inampirepee Tasorentsi,
 pincantacoteri Tasorentsisanori: Icameetsati,
 imatasanotiro paitapeerica,
 2 Pincantacoteri Tasorentsi: Icameetsati;
 tempa Itasorentsitasanotaque catsini.
 Pimpincatsatasanoteri anta Inantariqui cameetsatsiriri.
 3 Ineanaterica Tasorentsi opoimajatacairo incajare;
 ¡icameetsatasanotaque, irio tireacairori,
 aisati yamenacoventiro antearoja incajare!
 4 Ineanaterica Tasorentsi, opoimati antearoite catsini.
 5 Ineanaterica Tasorentsi ocaarajempequiyetiro santarishipee
 timatsiri toncaariqui Líbano.
 6 Onicacaaro toncaaripeequi Líbano aisati Sirión.
 ¡Oquempevetacari imitajamitajati vaca shirampari aisati
 irijaniqui!
 7 Ineanaterica Tasorentsi osoquijajeiti paamari.
 8 ¡Ineanaterica Tasorentsi, onicacaaro caaraiteri Cadés!
 9 Ineanaterica Tasorentsi
 omoyecacaro inchatopee icanteetiri encina,
 aisati ojaraayetiro inchatomashipee.
 Anta Ivancoqui ipincatsajeitiri maaroni,
 neacameetsajeitiriri.
 10 Iriotaque Tasorentsi pincatsariventirori incani.
 ¡Icantatiani ipincatsaritaque, ipincatsariventsanotanti!
 11 Imatacaasanotiri ishanincatajari, ishintsitasanotantari.
 Itasoncacoventajeitiri isavicacairi cameetsa.

Ipasonquitiri Tasorentsi

(Ivampoyeane David)

- 30** 1 Tasorentsi, noncantempi: Picameetsati,
 tempa poipacaacoventajana;

- te pishineteriji quisajeitanari irishirontimentena.
- 2 Tasorentsi, avirotaque Notasorentsite,
nocoacotaquempiro pamitacotena, pitecatsitacaajana.
- 3 Aviro oavisaacotaquenari eiro nocamantatsi,
poaneajana, notecatsitanaji noncamaqueme.
- 4 Avirojei quemisantasanotiriri Tasorentsi,
¡pimpampoyeaventajeiteri!
¡Pincantacoteri: Icameetsati!
- 5 Te iroisamaninqueroji iquisa;
iroidi icantani icavintsaasanotanti.
Ariorica irajeivetea tsiteniriqui,
onquitaiteamanajerica, anquimoshirejeitamanaje.
- 6 Nosavicavetaca cameetsa, noquenchirevetaca:
“Tecatsi catsini matenane iranaacotena.”
- 7 Iro cantaincha aviro Tasorentsi, neshinoncataquenari,
pisavicacaaquena cameetsa, tecatsi naamayea.
Pojoycantapaintanari, te pamitacotajena,
oshequi notsaroasanotanaque ocomitimotanaquena.
- 8 Aviro Notasorentsite, quimojenca nocantimpi:
9 “Tecatsi paajeri ariorica noncamaque, intijeetaquenarica.
¡Ariorica nompeanajea quipatsivane,
eiro nomatajiro noncantacotempi: Picameetsati,
aisati eiro noquenchirevetaca!”
- 10 Notasorentsite, pinquemena, pineshinoncatena.
¡Notasorentsite, Pamitacotena!
- 11 Pivashiniajiro noashirevetaca, meeca noveshireanaja.
Paapitsatajanaro noquitsaatari noashiretantari,
iroidi piquitsaatantajanaro cameetsamaori
noquimoshiretacairi.
- 12 Irotaque meeca, Notasorentsite, eiro nomajeretantatsi.
¡Nompampoyempiro pampoyeantsi
aisati noncanteani nompasonquitempi!

Ishiretasanotacari catsini Tasorentsi

(Sal. 71.1-3)

- 31** ¹Tasorentsi, aviro naventari, pojocaacoventena.
¡Eiro catsini pishinetanatsi nompashivetea!
¡Poavisaacotena; tempa pitampaticasanoti!
- 2 Pinquemena noncantasanotempi.
¡Pishintsite pojocaacoventena!
¡Avirotaque quempetarori imperita jocaacoventantatsiri,
aisati pancotsi quisotatsiri notsititari navisacotantari!

- 3 Avirotaque quempetarori imperita
aisati pancotsi quisotatsiri.
¡Pijivatena, pojocaacoventena, iriotanteetempiri Pitasorentsitasanoti!
- 4 ¡Pamitacotajena, yoashinoncaavetaquena quisajeitanari!
Tempa avirotaque jocaacoventanari.
- 5 Avirotaque naventari, pinquempoyero noshire.
¡Poavisaacotena!
Tempa avirotaque Notasorentsiste queariotasannotatsiri.
- 6 Te noneacameetsateriji pincatsajeitirori ijitasorentsietiri,
caari mayetiro paitapeerica.
Noshiretasannotacari Tasorentsi.
- 7 Pinintaquena, irotaque noquimoshiretantari.
Pineaquena noashiretaca
aisati piotaquero pomerentsitimotaquenari.
- 8 Te pishinecoventenaji iroyena quisajeitaquenari.
¡Piquempoyeacoventasanotaquena!
- 9 Tasorentsi, pineshinoncatena,
opomerentsitimotaquena covencatatsiri.
Ocatsitimotaquena novatsapeequi;
te namavetajeroji, aisati te namenasanotaje.
- 10 ¡Nocatsiyetaque aisati nocavintsaapinitaca,
irotimataintsi noncame!
¡Noashiretasannotaca, te noshintsivatsayetanaje!
- 11 Narotaque ishirontimentari quisajeitanari
aisati yantavintsataquena nocarajeivetari.
Ipiincaquena iojeitanari
aisati ishiapitsajeitana ariorica ineana.
- 12 Ipeacotasanoeyeetaquena, oquempetaca nocamaquerica.
Noquempevetacaró choncorina tsirajatsiri.
- 13 Oshequi noquemiri atiri icamantatsatavacaayeta.
“Oshequi ocovencaiteyetaque jaocapeerica.”
¡Iquenquetsatacaavacaajeitaca icoaque iroyena!
- 14 Iro cantaincha, aviro Notasorentsiste, noshiretari;
tempa nocantimpi: “Avirotaque Notasorentsiste.”
- 15 Avirotaque quempoyeacoventanari.
¡Pojocaacoventena, yoijanajeitaquena quisajeitanari!
- 16 Pineshinoncatena, tempa naro quemisantimpiri.
Poavisaacotena, tempa pinintasanotana.
- 17 Avirotaque naventari.
¡Eiro pishinetanatsi nompashiventea!
¡Irintiquea povashiventaasanote caari cameetsajeitatsi;
aisati poamaajeiteri, intijeata!

- 18 Poimajerenteri tseeyajeitachari,
 maaroni shirontimentantachari
 aisati cantimatiriri cameetsajeitatsiri.
- 19 ¡Oshequi picavintsaasanotiri pincatsatimpiri!
 Piquempoyeasanotiri, piquempetacantiro pinatasanotachari.
 Ineajeitaquero atiripee pitasoncacoventiri shirejeitimpiri.
- 20 Quiso poaqueri, pojocaacoventiri
 iquenqueshiretacovetariri caari cameetsajeitatsi;
 icaratimpirica, piticaacoventiri eiro imatantaritsi icantimateri
 quisajeitiriri.
- 21 Icameetsatasanotaque Tasorentsi, inintasanotaquena;
 oshequi imatasanotaquero yamitacotaquena
 pomerentsitimotaquenari.
- 22 Noquenqueshireashivetaca pojocaquena,
 iro cantaincha naventantaquempiri,
 piquemaquena nocajemaquempi, pamitacotaquena.
- 23 Maaroni quemisantaranotiriri Tasorentsi, pinintasanoteri.
 Iquempoyeacoventiri neanatatsiri tampatica.
 Irintiquea shemejeitatsiri, iroashinoncaimentasanoteri yantayetiri.
- 24 Maaroni shirejeitariri Tasorentsi,
 piveshireajeitea aisati pishintsishiretanaque.

Icamantacotiro David yantaqueri, impeacotantajejanariri Tasorentsi

(Ivampoyeane David)

- 32** 1 Inquimoshirete atiri ipeacotasanoeyeetajiniri
 maaroni caari cameetsatatsi yantayetiri.
- 2 Inquimoshirete caari quenqueshiretiro iramatavitante,
 aisati caari icantimenti Tasorentsi paitapeerica yantaqueri.
- 3 Tequerani noncamantacotero nantaqueri,
 aiquero nojatatii nojoquiitanaca;
 nocantani nocavintsaaca quitaiteripeequi.
- 4 Aiquero poashinoncaaquenari
 quitaiteriqui aisati tsiteniriqui.
 Te aneajero noshintsiti,
 noquempetacaro oshimpeti oteaquei ariorica osarentsiteasanoti.
 Aitaque noquempetacari narori.
- 5 Iro cantaincha, nocamantaquempiro nantaqueri,
 tecatsi nomanapitsatempi capichaji;
 nocoasanotaque noncamantempiro,
 ari, Notasorentsite, pipeacotajanaro.
- 6 Irotaque inquenquetsatacantempiri
 quemisantaranotimpiri ompomerentsitimotearirica,

- Ariorica ompocavetea covencatatsiri, eiro omatiritsi.
 7 Avirotaque naventari, piticaacoventana covencayetatsiri;
 antearojenca nopampoyeaventimpi;
 tempa pojocaacoventaquena.
 8 Icanti Tasorentsi: “Namenacoventasanotimpi, noametempi
 aisati niotacayempiro jaoca pincanteari pisavicanteari cameetsa.
 9 Eiro piquempetaritsi mora aisati cavaayo, caari iotatsi;
 ocameetsati ajiricacoteri, eiro iquenashitantatsi.
 Eirorica, eiro iquempejitimpitsi”
 10 Oshequi inquemaatsicajeitea caari cameetsajeitatsi.
 Irintiquea shirejeitariri Tasorentsi, inticaacoventeri;
 tempa inintasanojeitiri.
 11 Pinquimoshireventajeiteri Tasorentsi cameetsajeitatsiri, savicatsiri
 cameetsa.
 ¡Pincajemasanojeite, piveshireimentasanoteari!

Ipampoyeacoventiri Tasorentsi aisati ipasonquitiri

- 33** 1 Pincantacojeiteri Tasorentsi: Icameetsati, avirojei
 cameetsajeitatsiri;
 ocameetsatasanotaque ariorica impampoyeacoventajeiteri
 cameetsajeitatsiri.
 2 Pimpampoyeaventanteari arpa aisati salterio,
 pimpasonquitanteariri.
 3 Pimpampoyeaventanteari Tasorentsi iroaquerari pampoyeantsi,
 ¡Pantacotero cameetsa arpa, ariorica pinquimoshireventajeiteri!
 4 Ora irineane Tasorentsi oqueariotasanotaque;
 ocameetsataque maaroni yantayetaqueri.
 5 Inintasanotiro Tasorentsi cameetsatatsiri aisati tampaticatatsiri.
 ¡Itsoteaquero quipatsi inintasanotanti!
 6 Ineanataque Tasorentsi,
 irotaque ivetsicantacarori timayetatsiri inquitequi,
 itasoncaqueri, itimanaque maaroni impoquiropée.
 7 Iriotaque apatojataquerori incajare saanajatasanotatsiri.
 8 ¡Maaroni savicajeitatsiri quipatsipeequi,
 pimpincatsatasanojeiteri Tasorentsi!
 9 Tempa ineanataque imataquero maaroni,
 icantacantaquero, otimasanotantanacari cameetsa.
 10 Paitapeerica iquenqueshireyevetari iranteri
 pincatsatashijeitariri ijitasorentsiyetiri,
 ipeasanotitiri Tasorentsi; eiro imatantaro.
 11 Irointiquea yantayetaqueri Tasorentsi,
 oncanteani ontme.

- 12 Iquimoshireti atiripee icoyeaqueri Tasorentsi;
tempa iriotaque yashijeitajari.
- 13-14 Anta inquitequi yamenacojeitiri Tasorentsi
maaroni atiripee savicayetatsiri quipatsiqui.
- 15 Iriotaque oaqueneriri iquenqueshiretantari atiripee,
aisati yamenayetiro maaroni yantayetiri.
- 16 Eiro imatirotsi pincatsari iroavisaacotea
incarajeiveteari oshequi manatachari;
aisati yora neaperovetachari,
eiro imatatsi iroavisaacotea ishintsicaqui.
- 17 Yora cavaayopee tecatsi irimate iroavisaacotante;
irishintsitanovetea, eiro imatirotsi.
- 18 Irintiquea Tasorentsi icantani ishentiri pincatsatiriri
aisati shiretasanotariri icavintsaajeitiri.
- 19 Yoavisaacotiri, eiro icamantatsi.
Ariorica otashentsiiteaveta, ipapinitiri yoajeitari.
- 20 Arojeiquea ashiretasanotari Tasorentsi;
;tempa yamitacotee aisati iticaacoventee!
- 21 Aquimoshireventasanoteri Tasorentsi,
ashiretasanotari catsini;
tempa icameetsatasanotaque.
- 22 ;Notasorentsite, quiso poyena pinintasanojeitena;
irotaque noyeacotaquempiri!

Ipampoyeacoventiri David Tasorentsi ineshinoncatanti

(Ivampoyeane David)

- 34** 1 Maaroni quitaiteriqui noncanteri Tasorentsi: “Picameetsati.”
Noncanteani noncantacoteri, icameetsataque.
- 2 Oshequi noquimoshireventasanotiri Tasorentsi.
;Pinquemajeitena atiripee ashinoncaincari,
pinquimoshiretasanojeite!
- 3 Tsame ancaratavacaajeitea ancantacoteri Tasorentsi,
icameetsatasanotaque.
- 4 Naventacari Tasorentsi, ari yamitacotaquena;
yojocaacoventaquenaro maaroni notsaroacaavetacari.
- 5 Yora aventasanotariri Tasorentsi inquimoshiretasanote,
eiro catsini ishinetiritsi impashiventea.
- 6 Yoca ashinoncaincari, yaventacari Tasorentsi, iquemaqueri;
yojocaacoventaqueri maaroni pomerentsitimovetacariri.
- 7 Yora inampire Tasorentsi iticaacoventiri
aisati yoavisaacotiri
maaroni pincatsatiriri Tasorentsi.

- 8 Pineanteari Tasorentsi, piotasanotanteari icameetsatasanotaque.
¡Inquimoshirejeite maaroni shirejeitariri!
- 9 Pimpincatsatasanojeiteri, Tasorentsi maaroni yoameetsatiri,
tecatsi coiteimotearine maaroni pincatsaterine.
- 10 Yora ashitaarantincari
coajica intsoncacotasanotajea, ayeri itashe.
Irintiquea coasanotiriri Tasorentsi,
eiro catsini ocoiteimotaritsi paitapeerica.
- 11 Caate aca notomipee, pinquemisantena;
noametempiro pimpincatsateri Tasorentsi.
- 12 ¿Picoimpa pintime osamani?
¿Picoimpa pisavique cameetsa?
- 13 Ari, eiro pineanatiro caari cameetsayetatsi
aisati eiro catsini pitseeyashiyetatsi.
- 14 Pojocajero caari cameetsatatsi;
pantero irointi cameetsayetatsiri,
pincoye pisavicajeite cameetsa.
- 15 Yora Tasorentsi ishentiri maaroni cameetsajeitatsiri,
aisati iquemiri yaventaririca, yamitacotiri.
- 16 Iquishiri Tasorentsi caari cameetsajeitatsi;
intsoncajeitajeri, tecatsi quenqueshireacotajerine.
- 17 Yora Tasorentsi iquemiri atiri cameetsatatsiri ariorica yaventari,
yojocaacoventiri maaroni pomerentsitimotariri.
- 18 Yora Tasorentsi quiso yoiri oashiretachari,
aisati jitacantashitachari tecatsi oavisaacoterine;
iroavisaacotantajeariri.
- 19 Yora cameetsatatsiri avishimoyetiri oshequi pomerentsitimotariri,
iro cantaincha Tasorentsi yojocaacoventiri maaroni.
- 20 Iquempoyeacoventiri,
eiro icarajiteetantari itonqui aponi.
- 21 Yora caari cameetsajeitatsi
irosati oamaajerine yantayetiri;
yora quishiriri cameetsatatsiri, iroasanqueyeeteri.
- 22 Iro cantaincha, iroavisacojeiteri Tasorentsi
quemisantajeitiriri.
¡Eiro yoasanqueyeetiritsi shiretasanotariri!

Icoacotiri Tasorentsi iramitacoteri

(Ivampoyeane David)

- 35** ¹ Tasorentsi, pimpiateari yora piatanari.
Poasanquetayeri yora manajeitanari.
- ² Payero ashiromeronta pojocaacoventena,

- caate pamitacotena.
- 3 Pajiriquero pisataamento,
pimpiateari oijanajeitaquenari.
¡Pincantena: “Naro oavisaacotempine!”
- 4 Nocoi impashiventajeitanaquea, irishiajeitanaque
coajeitatsiri iroyena,
aisati coatsiri iroashinoncajena.
- 5 ¡Irojoqueri inampire Tasorentsi,
inquempetacanteri casaveshipee oraayetiro tampea!
- 6 ¡Irojanatanaqueri inampire Tasorentsi,
onquempetimotanaqueri ontsitenishaanaque iravoqui,
aisati oncarentsaiteanaque!
- 7 Tecatsi nantavetea, yoashiveetashitaquena oashirentsi,
aisati iquiacashitaca omoro nomparianteari.
- 8 ¡Omapoquerita oashinoncantsi!
¡Impariantajeitajearota yoashitashitacari,
irashinoncaajeiteata!
- 9 Irosati nonquimoshireventantaqueri Tasorentsi;
tempa yoavisaacotaquena.
- 10 Noncantasanote:
“¿Jaanica quempetimpiri, Notasorentsite?
Maaroni caari otimimoti paitapeerica, aisati coiteaveetatsiri,
pojocaacoventiri anaacojeivetacariri aisati peranajeivetacariri.”
- 11 Icantacotashitaquena caari cameetsajeitatsi
aisati isampitashitanaro paitapeerica caari niotacoti.
- 12 Yoashinoncaashitaquena naacameetsavetari,
irotaque oca oashiretacaasanotanari.
- 13 Ariorica imantsiajeiti iriori,
oshequi noashiretaconentari,
noquitsaataro tontamaori, aisati te noyeaji;
nocantani namanashiretaconentari.
- 14 Oshequi noashiretapinitaca, nomaoshiretaque;
noquempetacantaqueri iroorica camatsine ina, nirenti aisati
notsipavintsatari.
- 15 Iro cantaincha nashinoncantacari,
oshequi ishirontimentajeitaquena;
aisati iriori pashinisati atiripee caari noneapiniti,
icantani yoashinoncaapinitaquena.
- 16 Ineacatsitacaaquena, yantavintsanajeitaquena,
yamenajeitaquena icatsimajaquitaque.
- 17 Notasorentsite, ¿jaoca oncarate osamanite pineashiteari?
¡Poavisaacotena, eiro yoantanatsi quisajeitaquenari

- quempetariri anteariite maniti iquenayeti yamoroi!
 18 Nompasonquitempi, inquemena pishanincajeitajari
 apatojeitainchari.
 ¡Noncantacotempi: Icameetsatasanoti Tasorentsi!
 19 Te noncoyeji inquimoshireventena quisajeitanari.
 Aisati te noncoyeji intamacoreavacayea quisashitanari.
 20 Tempa te incoyeji irisavicajeite cameetsa,
 irointi iquenqueshiretiro irantashiyetearo
 iroashinoncanteariri savicavetachari cameetsa iipatsitequi.
 21 Antearojenca icantacotashitaquena:
 “¡Pamene, noneajeitaquempi pantaquero
 caari cameetsatatsi!”
 22 ¡Aviroquea, Notasorentsite, iotirori maaroni!
 ¡Eiro pimajeretitsi! ¡Aisati eiro pojocanatsi!
 23 Pishintsite, Notasorentsite, pamitacotena
 pincantacoventena cameetsa.
 24 Pincantacoventena, Notasorentsite;
 tempa pitampaticatasanoti.
 ¡Eiro pishinetiritsi quisajeitanari irishirontimentena!
 25 Eiro inquenqueshireantatsi aisati incante:
 “¡Amataqueri atsoncasanotaqueri; irotaque acoajeitiri!”
 26 Impashiventasanojeitanaqueata
 quimoshireventajeitirori pomerentsitimotaquenari,
 aisati jitacantashitachari yanaacotaquena.
 27 Iro cantaincha incajemajeiteta,
 inquimoshirejeite irinti coasanotatsiri irineena
 nanaacotante;
 incantapinjeite:
 “¡Yora Tasorentsi ipincatsaritasanoti,
 onimotaqueri irisavique cameetsa quemisantiriri!”
 28 Nonquenquetsatacotero cameetsatatsiri pantayetaqueri.
 ¡Maaroni quitaiteripeequi noncantacotempi: Picameetsati!

Yantayetiro atiri caari cameetsatatsi

(*Ivampoyeane David*)

- 36** ¹ Yora antirori caari cameetsayetatsi,
 iquenqueshiretapinitiro caari cameetsatatsi.
 Te catsini inquenqueshireteroji impincatsateri Tasorentsi.
² Ijitacantashitaca incantacoyeeteri: Icameetsati,
 te irioteji impinquo yantaqueri.
³ Ora ineaveeyetiri te oncameetsateji, irointi yamatavitanti,
 te inquenqueshiretanajeaji cameetsa,

- aisati te irimatajero yantayetironi cameetsayetatsiri.
 4 Iponaarica imaamentoqui,
 iquenqueshiretiro irantero caari cameetsayetatsi;
 icoasanotiro, te incoye irojoquero.

Inintanti Tasorentsi

- 5 Notasorentsite, antearoite pinintasanotanti catsini
 aisati piqueariotasanoi; eiro notsoteajirotsi.
 6 Ocameetsataque catsini maaroni pantayetiri,
 oquempevetacaro toncaaripee antearoti.
 Ora picantacantiri oquempevetacaro
 antearoja incajare saanajatatsiri.
 Aviro Tasorentsi, quempoyeacoventiriri atiripee aisati virantsipee.
 7 ¡Notasorentsite, ocameetsatasanaque, pinintasanotanti!
 ¡Yaventasannotimpi atiripee, pinticaacoventeri!
 8 Iquemasanojeitaro oanaronsi pipajeitiriri,
 aisati pipajeitiri nija cameetsajatatsiri irajeitiri.
 9 Tempa avirotaque oaneantasanotatsiri
 aisati piotacaajeitenaro cameetsatatsiri, noveshireajeitantari.
 10 Picantani pinintajeitiri iojeitimpiri,
 picavintsaaajeitiri maaroni cameetsashiretatsiri.
 11 Eiro pishinetiritsi iranaacotena shemejeitatsiri
 aisati eiro pishinetiritsi iroimishiajeitena caari cameejeitatsi.
 12 ¡Pameneri ipeajeitaca caari cameetsajeitatsi!
 ¡Eiro itimajeitajitsi aisati!

Ishiretasanotacari Tasorentsi

(Ivampoyeane David)

- 37** 1 Eiro piquishimentarotsi yantayetiri caari cameetsajeitatsi,
 aisati eiro piquisanementiritsi imayevetari;
 2 tempa intsipaite impeajea.
 ¡Inquempetearo oshimpeshitanaque tojari!
 3 Pishireteari Tasorentsi,
 pimatasanotero cameetsatatsiri;
 pisavique cameetsa quipatsiqui,
 pinquearioventero pinquemisanteri.
 4 Pinintasanoteri Tasorentsi,
 irimoncaratantempirori picoashiretasanotiri.
 5 Pincanteri Tasorentsi inquempoyeacoventempi;
 pishiretasanoteari, aitaque iramitacotaquempi.
 6 Iriotacaajeiteri itsipapee pitimi cameetsa,
 aisati ocameetsatasanoi pantayetiri,

- onquempetearo ariorica itampaticati catsirincaiteri.
- 7 Poyeacoteri Tasorentsi iramitacotempi,
 eiro pishemashireatsi;
 eiro piquishimentiritsi mayeteroneri paitapeerica,
 aisati yora quenqueshireashiyeetarori irantero caari cameetsatatsi.
- 8 Pjocajero pitsimaa, aisati pimpeacotajero piquisa,
 pimaperotasanotirocari paitapeerica.
- 9 Tempa yora caari cameetsajeitatsi irojoqueeteri iipatsitequi;
 irintiquea shirejeitariri Tasorentsi irisavicantanojeitearo.
- 10 Eiro osamanititsi intime caari cameetsajeitatsi;
 pincoajeivetajeari, eiro pineajiritsi.
- 11 Irintiquea caari shemejeitatsi irashitasanojeitajearo quipatsi;
 irisavicasanojeite cameetsa, tecatsi ashereajecterine.
- 12 Yora caari cameetsajeitatsi
 icoasantaque iroashinoncayeri cameetsatatsiri;
 ariorica yameniri, itsimaajaquitasanotacari.
- 13 Iro cantaincha Tasorentsi ishirontimentari,
 iotaque irotaintsi omoncaratea irashinoncaajeitea.
- 14 Yora caari cameetsajeitatsi
 yajiricaquero isataamento aisati inontsiaquero iveane,
 iroanteariri coiteaveetatsiri aisati caari shemejeitatsi
 jeri aisati cameetsajeitatsiri isaviqui.
- 15 Iro cantaincha irisati sataajejarone isataamento
 aisati ovatirejayetanaque iveanepee.
- 16 Ocameetsati ora capichaji timimotiriri cameetsatatsiri,
 oshequi anaacotiro yashitaarantavetari caari cameetsajeitatsi.
- 17 Tempa intsoncajeiteri Tasorentsi caari cameetsajeitatsi;
 irintiquea savicajeitatsiri cameetsa, impapinijecteri
 coiteimojeitariri.
- 18 Yora Tasorentsi yamenacoventiri savicatsiri cameetsa;
 aisati incanteani irisavicantearo quipatsi yashitacari.
- 19 Ariorica ompomerentsitimoteari ontashentsiiteasanote,
 eiro ocoiteimotaritsi iroyeari, ontimimotasanoteri.
- 20 Yora caari cameetsajeitatsi intsoncasanojeitea,
 inquempetearo tojari camashitatsiri ontayearica;
 yora quisajeitiriri Tasorentsi impeajeitea inquempetearo cachaa.
- 21 Yora caari cameetsatatsi icoacotantayeti impeeteri,
 iro cantaincha eiro ipinatirotsi;
 irintiquea savicatsiri cameetsa,
 intacotanta aisati ipashitanta.
- 22 Yora intasoncacoventeri Tasorentsi
 irisavicantajeitearo quipatsi;

- irintiquea yoamaimatiri, intsoncasanoeyeetajeri.
- 23 Yora Tasorentsi ineacameetsatiri
atiri intimerica cameetsa;
aisati yoametasanotiri.
- 24 Ariorica irashinoncaavetea, eiro icantani irashinoncayea;
tempa yamitacotiri Tasorentsi.
- 25 Ainiroquera nevancaritapaini, meeca anteashipataquena,
te noneimateriji catsini irashinoncayea atiri cameetsatsiri,
aisati te noneimateri itomipee incoacotante impeeteri
paitapeerica.
- 26 Icantani ineshinoncatanti aisati ipashitanta;
yora itomipee ineacameetsajeitiri ishanincapee.
- 27 Aitapaaji pantaquero caari cameetsatsi,
pantayetero irointi cameetsatsiri;
oncanteani ontimimotoempi pisavicanteari.
- 28 Inintasanotiro Tasorentsi cameetsatsiri,
aisati eiro yojoquiritsi quemisantasanotiriri;
irintiquea caari cameetsajeitatsi, intsoncajeiteri,
eiro itimajitsi irishanincajeitajeri.
- 29 Yora cameetsajeitatsari, irashitananotearo quipatsi,
aisati incanteani irisavicantearo.
- 30 Yora cameetsatsiri ioti ineanatantaro cameetsatsiri,
icantacoventanti cameetsa.
- 31 Icantani iquenqueshiretiro yoametanteri Itasorentsite.
¡Eiro catsini ipeacotarotsi yantiro cameetsatsiri!
- 32 Yora caari cameetsajeitatsi
yamenanontiri cameetsatsiri, iroanteariri.
- 33 Iro cantaincha eiro ishinetiritsi Tasorentsi iroyeri
aisati eiro icantacantantaritsi ainiro irantane.
- 34 Pishiretasanoteari Tasorentsi aisati pinquemisantasanoteri,
aitaque intasoncacoventaquempi,
impantempirori quipatsi pisavicanteari.
¡Pineasanojeiteri caari cameetsajeitatsi ariorica intsonqueetajeri!
- 35 Noneaqueri caari cameetsatsi,
aiquero ijatatii ishemetasanoti,
iquempevetacaro inchato antearomencotatsiri.
- 36 Iro cantaincha ipeaca, te intimanajeji.
Namenavetajari, te nomatero noneajeri.
- 37 Pinquenqueshireacoteri cameetsatsiri,
caari timatsine irantane;
coajica irisavique cameetsa.
- 38 Irintiquea yora piatsajeitachari,

intsoncasanoyeetajeri catsini.

Ora irineeri coajica caari cameetsajeitatsi, iroashinonqueeteri.

- 39 Iriotaque Tasorentsi amitacotiriri yora cameetsatsiri,
aisati iticaacoventiri ariorica opomerentsitimotari.
- 40 Iriotaque Tasorentsi amitacotiriri
irishiapitsatanteariri caari cameetsajeitatsi,
yojoacaocoventajeitiri aisati yoavisaacotiri;
tempa iriotaque yaventacari.

Icoacotiri iramitacoteri Tasorentsi

(Ivampoyeane David)

- 38** ¹ Tasorentsi, eiro piquishimentanarotsi nantaqueri,
aisati eiro poasanquetaanatsi ariorica pinquishea.
- ² Poashinoncaasanotaquena,
oquempetaca piquetaquena nashinoncantacari.
- ³ Piquishimentaquenaro caari cameetsatsiri nantaqueri,
irotaque nomantsiatantacari catsini.
¡Te ontimeji aparo notonqui tecatsitatsine!
- ⁴ Ora caari cameetsatsi nantayetiri, oamaashireaquena,
oquempetacararo noquijaquero tenatatsiri,
te nomatero namavetero.
- ⁵ Notsataaca nantashiyetacaró oquempetaca te nioteji,
irotaque oshititantacari novatsaaroopee.
- ⁶ Maaroni quitaiteripeequi noashireta,
ocantimonentaquena, te nonquimoshiretajeji catsini.
- ⁷ Ocatsitacaaquena notapiiqui catsiirentsi
aisati maaroni novatsapeequi.
- ⁸ Nomaperotasanotaca, te noshintsitanaje.
¡Nocavintaashiretasanotaca, te namavetanajero!
- ⁹ Tasorentsi, aviro iotirori maaroni nocoasanotiri,
¡aisati noashiretacotari, tecatsi manimotempine avinti!
- ¹⁰ Ora nasancane oshintsiti oshevashevataca,
te aneajero noshintsire.
¡Aisati ocamaraiteacotaquena, te noneantaperotaje!
- ¹¹ Yora notsipavintsataniri neacameetsavetanari
aisati noshanincasanori,
inijantareanaquena, ineaquena nopatsaayetaque.
- ¹² Yora coatsiri iroyena yoashiyetaquena,
icoaque incantacantena,
iquenquetsataacavacaajeita intsoncantenari;
icantani iquenqueshiretiro iraacantena.
- ¹³ Iro cantaincha noquempetacantashitaca te nonquemeriji;

- aisati noquempetacantaca masonti,
te catsini noneaveeteji.
- 14 Noquempetacari caari quematsi,
aisati te nomatea noneanateri nojocaacoventanteari.
- 15 Aviro Notasorensite,
noyeadotiri panqueri avinti.
- 16 Apatiro nocoacotimpi,
eiro pishinetiritsi irishirontimentena,
aisati eiro iveshireimentana irineaquearica iranaacotaquena.
- 17 Queario, irotaintsi omaperotena nojoquitaca,
te ompeimateaji capichaji nocatsincayetaque.
- 18 ¡Nocoaque noncamantacotero caari cameetsatatsi nantaqueri,
tempa oshequi ocantimonentaquena!
- 19 Yora quisajeitanari yoshequianaque;
iquisashitaquena, tecatsi nantavetea.
- 20 Iquisashitaquena naacameetsavetari cameetsa;
ariorica nantiro cameetsayetatsiri, icoashitaca inquishena.
- 21 Notasorensite, ¡eiro pojocanatsi apaniro!
¡Eiro pinijantareanatsi!
- 22 Notasorensite, aviro oavisaacotanari.
¡Pimpoque intsipaite pamitacotena!

Eiro osamanititsi antime

(Ivampoyeane David)

- 39** 1 Nocantasanotaque: “Naamaventacotea narosati,
eiro noneanatantaro caari cameetsayetatsi,
noimajerentero novante
ainiroquera nocarajeiteri caari cameetsajeitatsi.”
- 2 Noquempetacantaca masonti, tecatsi noneanataque.
¡Te catsini noneanatantearo cameetsatatsiri!
Iro cantaincha aiquero ocatsitimotanaitiana.
- 3 ¡Ocatsitaquena nasancanequi!
Ariorica noquenqueshiretacota,
aiquero ocatsitimotasanotaquenari,
irosati nocajemasantantanaca. Nocanti:
- 4 “Notasorensite, piotacayena jaoca noncanteari noncame,
aisati jaoca oncarate osarentsi nanee;
niotasanotantearori iotantsi.
- 5 Tempa poaneaquena capichaji,
pineaquero avinti eiro osamanititsi;
intsipaite incamajeite atiri,
iquempetacaro yanenquirica.

- 6 Maaroni atiripee iquempejeitacaro tsimancaiteri,
Yatsipetashitaro yoshequiro irovaararo,
te irioteji jaanica aitajerineri.
- 7 Aitaque ocantari, Notasorentsise,
¿paita meeca noyeacoteri?
¡Avirotaque noyeacoteri avinti!
- 8 Poipacaacoventena nantayetiri caari cameetsayetatsi;
eiro pishinetiri caari iotatsi intseequimatena.
- 9 Noquempetacari masonti, te noneaveeteji;
tempa avirotaque shinetanari nashinoncayea.
- 10 Aitapaaque poashinoncaaquena, poamaanacari.
- 11 Poametiri atiri, poashinoncaimentiri yantaqueri,
aisati pipeiro icoasanoyevetari.
¡Maaroni atiripee te inquisojeite,
iquempetacaro yanenqui!
- 12 Notasorentsise, pinquemero noquenquetsatacainpiri,
eiro piquemashitanatsi nocavintsaa;
¡aisati eiro pimajeretashitatsi ariorica nira!
Tempa noquempetimotaquempi pashinisati
aisati tsimeeri avisatsiri intsipaite;
noquempetacari intacantaquenaniri.
- 13 Eiro pamenanatsi catsima;
pishineta nomacoreaje capichaji tequerata noncame.”

Notasorentsise, onimotaquena nantero picoacaanari

(Ivampoyeane David)

(Sal. 70.1-5)

- 40** ¹ Noyeacotaqueri Tasorentsise,
ari iquemaquero nocajemaqueriri;
- ² yoavisaacotajana caari nocamanta;
oquempevetaca yaajana, noquiavetaca tsampovatsajaqui;
aisati oquempevetaca yoajana imperitaqui,
nosavicantajari cameetsa.
- ³ Iotacaajanaro iroaquerari pampoyeantsi,
nopampoyeacotiri Atasorentsise: Icameetsati.
Oshequi quemajeitaquerori iquimoshiretasanotanaque
aisati ishiretasanotacari Tasorentsise.
- ⁴ ¡Iquimoshireti shiretariri Tasorentsise,
caari coatsine incarateri shemejeitatsiri
aisati pincatsatashiyetariri ijitasorentsitashiyeetari!
- ⁵ Notasorentsise, oshequi pimayetaqueri caari noneapiniti,

- aisati maaroni pipajeitaquenari.
 ¡Tecatsi quempetempine!
 Noncoavetearica nonquenquetsatacotero maaroni,
 eiro nomatirotsi nontsoteero.
- 6 Te onimotempiji noapinitempiri virantsi
 aisati nompapinitempiro panquirentsi nocashiacaimpiri,
 Te pincoacotena nontaasanotempiri virantsi,
 pimpeacotantenarori caari cameetsatsi nantiri.
 Irointiquea pimatacaaquena nonquemisantasannotempi.
- 7 Irotaque nocantantacari: “Jerocana meeca;
 tempa irotaque ocantacotanari Sanquenarentsi:
- 8 Onimotasanotaquena, Notasorentsiti,
 nantempiro picoacaanari.
 ¡Tempa noquenqueshiretapinitiro picantacantiri!”
- 9 Yapatojeitanta maaroni pishanincajeitajari,
 noametaqueri cameetsatasanotatsiri.
 ¡Tasorentsi, piotaquena, te nomajereteji!
- 10 Te nomaneroji noquenquetsatacotimpi: picameetsatasanotaque,
 aisati nocamantacotaquero piquearioventiro picantaqueri
 aisati poavisaacotanti.
 Te catsini nomanapitsateriji pinintaqueri
 aisati piquearioventiro pishanincatacari.
- 11 Tasorentsi, ¡eiro pojoquirotsi pincavintsayena!
 ¡Pincanteani pinquempoyeacoventena;
 tempa pinintasanotana aisati piquearioventiro picantaquenari!
- 12 Tempa avishimotaquena oshequi catsini pomerentsitantsi,
 te nomatimateroji niotero jaocarica ocaratiri.
 Oashinoncaajana nantayetaqueri, anaanaquero ocarati noishi;
 te nomatajeaji namenaje aisati te nonquimoshiretanaje.
- 13 ¡Notasorentsiti, nocoli pojacaacoventena,
 caate shintsini pamicotena!
- 14 ¡Panaacojeiteri coavetachari iroyena, pincomitacasanoteari!
 ¡Irishiajeitanaqueta maaroni coatsiri iroashinoncaayena!
- 15 ¡Irishiajeitanaqueta shirontimentanari,
 impashiventanaquea!
- 16 Irintiquea maaroni aventajeitimpiri, inquimoshirejeitanaqueta,
 aisati maaroni coasanotatsiri poavisaacoteri,
 incantapinite: “¡Ipincatsaritasanoti Notasorentsiti!”
- 17 Naintiquea, oshequi nashinoncaaca, opomerentsitimotaquena;
 Novincatsarite, eiro pipeacotanatsi,
 tempa avirotaque amitacotanari, jocaacoventanari.
 ¡Eiro pisamanititsi, Notasorentsiti!

Iquenquetsatacairi mantsiatatsiri

(*Ivampoyeane David*)

- 41** ¹ Inquimoshirete quenqueshireacotiriri
caari piacoventacha aisati coiteaveetatsiri.
Irojocaacoventeri Tasorentsi ariorica ompomerentsitimoteari.
- ² Inticaacoventeri Tasorentsi, iroaneasanoteri,
aisati irisavicacaasanoteri cameetsaquipatsiqui.
Eiro yojoquiritsi incoavetearica quisajeivetariri iroashinoncayeri.
- ³ Irishintsitacayeri Tasorentsi
ariorica irimantsiataque, intecatsitacotajeri.
- ⁴ Nocantaqueri: “Novincatsarite,
pincavintsayena, pintecatsitajena;
omavetaquea nantimotaquempiro caari cameetsatsi.”
- ⁵ Yora quisajeitanari icantimataquena, icantana:
“¿Jaoca oncarate incame,
eiro iquenqueshiretacotanteetajaritsi?”
- ⁶ Ariorica impocaje irineena, te impoque cameetsa;
iointi iquenqueshiretacotanaro maaroni caari cameetsatsi;
ariorica impianaje, icamantacoyetana.
- ⁷ Yora quisajeitaquenari yapatotashijeitana iquenquetsatacotana,
ijitashijeitaca naro cantacaacaro nashinoncantacari.
- ⁸ Icantajeiti: “Ora imantsiare iointi irashi camaari,
yojoquilitaca imaamentoqui, eiro yavisacotajitsi:”
- ⁹ Aisati notsipavintsataniri cameetsavetachari noacaari,
iquisanaquena.
- ¹⁰ Avintiquea Novincatsarite, pincavintsayena, poavisaacotajena;
poimpiajeneri yantimovetaquenari.
- ¹¹ Irotaque niotantanaqueari queario pineacameetsataquena,
eiro pishinetiritsi quisajeitanari inquimoshireventero
yanaacotaquena.
- ¹² Naroquea nainti cameetsa nosaviqui, tecatsi nante,
pincanteani pamitacotena, quiso poyena, nosaviquimotantempiri.
- ¹³ ¡Cameetsatasanotaque Tasorentsi,
Itasorentsite Israel,
meca, irosati incantaitiyempani!
¡Aitaque incanteari!

Ashiretasanoteari Tasorentsi.

- 42** ¹ Iquempeta maniro miretatsiri icoayetiro nija,
Notasorentsite, aitaque noquempetari narori nocoasanotimpi.
- ² Nocoasanotiri Tasorentsi, aneasanotatsiri.

- ¿Jaoca oncarate nompianaje ivancoqui?
 3 Quitaiteiriqui aisati tsiteniriqui irointi niraapinitaca;
 niranaquero nojaqui.
 Ineantapinitaquenari quisajeitanari, isampijeitana:
 “¿Jaocame iriori Pitasorensite?”
- 4 Ariorica noquenqueshireacotiro ocapee,
 oshequi ocantimoshiretasanotana.
 Noquenqueshiretiro nocarajeitirini noshanincepee.
 Nojivajeitirini ivancoqui Tasorensi,
 noquimoshiretini nocajemasanoti, aisati nopasonquitiri.
 ¡Oshequi noquimoshiretini cameetsa!
- 5 ¿Paitaquea noncantashiretanteari?
 ¿Paitaquea nonquenqueshireveetanteari?
 Tempa irio Tasorensi noyecotaqueri,
 irosati noncantea noncantacoteri: Icameetsati.
 ¡Iriotaque Notasorensite oavisaacotanari!
- 6-7 Notasorensite, oshequi nocantashiretasanotaca.
 Irotaque noquenqueshiretantimpiri.
 Omapocaquena pomerentsitantsi;
 tempa pishinetaquena noashiretasanotaca,
 oquempetaca aanaquena omotoncane.
 Notimaque opoimajatinta opariajatirica nija Jordán,
 poneachari toncaariqui Hermón aisati Misar.
- 8 Quitaiteiriqui cavintsaquena Tasorensi,
 aisati tsiteniriqui te noipacayero nopampoyeaventiri,
 aisati noquenquetsatacairi Tasorensiri oaneanari.
- 9 Nocantiri Tasorensi, jocaacoventanari.
 “¿Paita pipeacotantaquenari?
 ¿Paita noashiretanteari iroashinoncayenarica quisajeitanari?”
- 10 Ocatsitimotasanotaquena icantayetanari quisajeitanari.
 Icantani quitaiteiripeequi isampitana:
 “¿Jaocame iriori Pitasorensite?”
- 11 ¿Paitaquea noncantashiretanteari?
 ¿Paitaquea nonquenqueshireveetanteari?
 Tempa irio Tasorensi noyecotaqueri,
 irosati noncantea noncantacoteri: Icameetsati.
 ¡Iriotaque Notasorensite oavisaacotanari!

Icoacotiri Tasorensi incantacoventeri cameetsa

- 43** ¹Notasorensite, pincantacoventena cameetsa,
 ¡Pojoacoventena, pimplateari atiripee caari quemisantatsi!
 ¡Poavisaacotena, eiro yoashinoncantanatsi tseyari

- jeri caari cameetsatatsi!
 2 Tempa avirotaque Notasorensite jocaacovenantanari.
 ¿Paitampa pinijantareantanaquenari?
 ¿Paita noashiretanteari
 iroashinoncayenarica quisajeitanari?
 3 Piotacayena nontime cameetsa,
 aisati ponijayenaro queariotatsiri,
 nareetantearori toncaari cameetsatatsiri, pinantapinitari.
 4 Notasorensite, ariorica nareetaquearo altar,
 aitaque noncantacotempiri: Picameetsati,
 nantacotapeero arpa.
 Tempa, Notasorensite, aviro quimoshiretacaasanotanari.
 5 ¿Paitaquea noncantashiretanteari?
 ¿Paitaquea nonquenqueshireveetanteari?
 Tempa irio Tasorensi noyeacotaqueri,
 irosati noncantea noncantacoteri: Icameetsati.
 ¡Iriotaque Notasorensite oavisaacotanari!

Iquenquetsatacairi Tasorensi iramitacoteri

- 44** 1 Notasorensite, noquemajeitaqueri intacantajeitaquenaniri
 icamantayetanaroni paitapeerica ponijayetaqueriri peerani.
 2 Avirotaque mataqueriri pojocaqueri pincatsatashijeitariri
 ¡jitasorensiyetiri
 savicayetsiniri nampitsipeequini, poasanquetaajeitaqueri;
 irosati poisavicantajeitajari iriori intacantajeitaquenaniri.
 3 Te iro matacayerine ishintsinca
 aisati isataamento yanaacojeitantariri.
 Te irio matashitearone irimanatacoventero quipatsi;
 avirotaque mataquerori pitasorencaqui.
 ¡Ponijaasanotaqueri picarataqueri;
 tempa oshequi pinintasanojeitiri!
 4 ¡Novincatsarite, Notasorensite!
 ¡Aviro matacaaqueriri pishanincajeitajari yanaacojeitantaque!
 5 Avirotaque matacaaquenari nanaacojeitantariri quisajeivetanari.
 Pitsoncajeitaqueri manajeivetaquenari.
 6 Te iro naventajeitea noveane
 aisati nosataamento nanaacotanteariri.
 7 Avirotaque matacaaquenariri nanaacojeitaqueri quisajeitanari;
 tempa picomitacaajeitacari tseencajeivetaquenari.
 8 ¡Tasorensi, noncanteani noneacameetsatasanojeitempi,
 noncanteane noncantacotempi: Picameetsati!
 9 Iro cantaincha pojocajeitaquena, poashiventaasanojeitaquena;

- te pincarajeitajeri noshaninca manajeitachari
 10 Pishinetaquena yomishiajeitaquena quisajeitanari
 icoshijeitaquena aisati yaitajeitaquenaro timimoyevetanari
 icoayetiri.
- 11 Pishinecoventaquena yaanaquena,
 inquempetacantaquena ovisha yayeetiri yoapiniyeetirinta;
 aisati poaraajeitaquena noquenimojeitanaqueri yora
 pincatsatashijeitariri ijitasorensiyetiri.
- 12 Pipimantaqueri pishanincajeivetari capichaji ivinaro;
 tecatsi paantaqueari pimpimantavetacari.
- 13 Piquempetacantaquena paitapeerica ishirontimenteetari;
 yora notsipanampiyetari icantimajeitana yoashiventaana.
- 14 Pishinetaqueri pincatsatashijeitariri ijitasorensiyetiri
 itseencajeitana; ineajeitantaquenari, itecainajeitiro iito.
- 15 Icantani yoashinoncaana, irotaque nopashiventantari.
- 16 Irio cantacaacarori quisaqueenari coatsiri impiacoventea
 icantimatana aisati yoashinoncaana.
- 17 Ocapee noneajeitaqueri avishimoyetaquenari,
 te iro cantacantenane nompeacotanaquempi;
 aisati te nompeacotearoji picantacantiri.
- 18 Te nonquenqueshirejeiteaji nojoquempi
 aisati nompeacotearo poametaquenari.
- 19 Iro cantaincha aviro pojocajeitaquena itiminta covencayetsiri,
 ¡aisati poaquena covencariqui tsitenishaatsiri!
- 20 Ariome nompeacojeitanaquempime, Notasorensite,
 nompincatsatashitaquearime ijitasorensitashiyetari
 pashinisatipee,
- 21 piotasanotaquename;
 tempa piotasanotiro noquenqueshirejitiri nomaniri.
- 22 Iro cantaincha aviro nashinoncaimentari
 aisati nashinoncaimentacaro nantimpiri, irosati noncamanteari;
 inquempetacantena ovishapee yayeetiri yoapiniyeetirinta.
- 23 Notasorensite, ¿paita pipeacotantanari?
 ¡Pinquenqueshiretena!
 ¡Eiro picantani pojoquena!
- 24 ¿Paita pimanapitsatantanari?
 ¿Paita pipeacojeitantaquenari
 pishinetaquena nashinoncaasanojeitaca catsini?
- 25 Te noshintsimatanaaje, yanaacojeitaquena quisajeitaquenari,
 inoshicanaquena quipatsiqui.
- 26 ¡Intsipaute pamitacojeitena, poavisaacojeitena;
 tempa oshequi pinintasanojeitana!

Ipampoyeacoventiri pincatsari iraye ijina

- 45** ¹ Ocameetsatasanotaque noquenqueshiretiri noneanateri.
 Oquempetacaro isanquenatantari iotatsiri, isanquenati cameetsa.
 ¡Meeca noneanateri pincatsari, nosanquenataqueri!
- ² ¡Aviro cameetsavorotasanotatsiri,
 panaacotiri itsipapee!
 ¡Ocameetsatasanoti pineane!
 Irotaque itasoncacoventapinitantimpiri Tasorentsi.
- ³ ¡Aviro neaperotasanotachari!
 Poyero pisavirite poantaroriqui pishiticacoro.
 Irotaque poanenqueari jocaacoventempine.
- ⁴ Oshequi pipincatsaritaque,
 irotaque ineacameetsatanteetempiri panaacotasanotanti.
 Piquearioventiro queariotasanotatsiri,
 picavintsaajeitiri ashinoncaayetachari.
 ¡Pimatasanoyetiro paitapeerica caari ineapiniyeeti!
- ⁵ Novincatsarite, panaacotasanotaqueri quisajeitimpiri, pitsoncajeitaqueri;
 tempa piquentantacari pichacopite tsampitseequitasanotatsiri
 irasancanequi quisaquempiri.
- ⁶ Notasorentsite, pincantaitatiane pipincatsaritanoti,
 cameetsa picantacoventanti.
- ⁷ Pinintasanotiro cameetsayetatsiri,
 te pineacameetsateroji caari cameetsayetatsi.
 Irotaque icoyeantaquempiri Tasorentsi, Pitasorentsite,
 ipasanotaquempiro quimoshiretantsi panaacotaqueri pitsipajeitari.
- ⁸ Maaroni piitsaare ocasancamaotasanotaque,
 pitiritantayetaro mirra, áloe jero metaqui.
 Yoimoshirencantaquempiro poimajencatatsiri cameetsa
 anta pivancoqui antearoite yovetsiqueetiri mapi marereatatsiri.
- ⁹ Picarataquero pinampirepee irishintopee pincatsariyetatsiri.
 Pisavicaque pivincatsarimentoqui,
 ora pijinasanori ocatiimotaquempi pacosanoriqui.
 Oanencasanotaca oquitsaataro marereamaotasanotatsiri
 itijacoyeetiri oro ioshitachari.
- ¹⁰ Pinquemena noshintio, pinquemasanotero noncantempiri:
 eiro piquenqueshireacotiritsi pishanincasanoripee aisati
 picarajeivetaniri.
- ¹¹ Tempa yora pincatsari ineaquempi picameetsavorotaque,
 icoasanotaquempi.
 Iriotaque pivincatsarite, ocameetsati pinquemisanteri.
- ¹² Aviro, irishinto pincatsaritatsiri anta nampitsiqui Tiro,

- icoaque pishanincepee ashitaarantasanotachari
impashitempi paitapeerica, pineacameetsatanteariri.
- 13 ¡Jeroqa queapaaque irishinto pincatsari, oanencasanotaca!
¡Oquitsaatacaro jentamaotasanotatsiri tijacotachari oro!
- 14 Yayeetanaquero anta pincatsariqui,
oijajeitanaquero onampirepee pincatsatirori, jero otsipajeitari.
- 15 Ojatanaque oquimoshiretasanajeitanaque,
oqueashitanaqueri pincatsari ivancoqui.
- 16 Novincatsarite, yora pitomipee,
iriotaque savicantajearone ivincatsarimentopeeni
intacantaquempiniri;
aviro peajerine impincatsariventajeiteri maaroni pishanincepee.
- 17 Noncantacayeari inquenqueshireacojeitantempiri
irishanincajeitajeari coajicani;
aisati incanteani incantacotempi: Picameetsati, maaroni nampitsi
peequiniri.

Itsipajeitaaque Tasorentsi

- 46** ¹ Iriotaque Tasorentsi aventajeitari
aisati shintsitacaajeiteeri.
Iriotaque amitacotapiniteeri ompomerentsitimoteerica.
- ² Irotaque eiro atsaroajeitantatsi
omavetaquea onicasanotanaquea quipatsi,
aisati ompariavetearica otishipee incajarequi tsonpoina,
- ³ omavataquea ompoimajatasanovetea incajare,
aisati oshevajatasanovetea otavoncaare
omavetaquea onicasanovetearorica otishi,
iisancaqui Tasorentsi.
- ⁴ Timatsi nijateni ochaoreajayetanaque,
oimoshirenquiri inampiquiniri Tasorentsi;
irotaque cameetsatasanotatsiri,
anaacotiro otsipapee inampi yora Inquitequiniri.
- ⁵ Aitaque isaviquimotirori Tasorentsi nianqui, yamenacoventiro;
yamitacotiro onquitaitemanajerica.
- ⁶ Incajemasanojeite atiripee, ompomerentsitimojeiteari
impioncajeitanaque pincatsariyevetachari.
Ariorica irineanataque Tasorentsi, aisati onicanaquea quipatsi.
- ⁷ ¡Yora Tasorentsi mayetirori maaroni, itsipajeitaaque!
¡Yora Itasorentsite Jacoboni, iriotaque aventajeitari!
- ⁸ Pamenajeitero imataqueri Tasorentsi
caari aneapiniti aca quipatsiqui.
- ⁹ Yoimajerentaquero omanatantsi irosati ovecaratapaaca quipatsi.

- Icarajitayetiri iveane aisati isataamentopee,
 itaitaqueri ishiacomentopee imanantantayetaniri.
 10 “¡Poipacaajero pimanajeita!
 ¡Piotajena narotaque Tasorentsi
 pincatsariventajetiriri atiripee,
 aisati maaroni timayetatsiri quipatsiqui!”
 11 ¡Yora Tasorentsi mayetirori maaroni, itsipajeitaquee!
 ¡Yora Itasorentsite Jacoboni, iriotaque aventajeitari!

Ipincatsariventiri Tasorentsi maaroni quipatsisatipee

- 47** 1 ¡Pimpasavacojeitea maaroni atiripee!
 ¡pincajemimentajeiteri Tasorentsi, pinquimoshirejeite!
 2 Tempa iriotaque Tasorentsi Inquitequiniri, ipincatsayeetiri;
 iriotaque pincatsariventirori maaroni quipatsi.
 3 Itsoncaqueri atiripee savicayetatsiri nampitsipeequi,
 imatacaajeitaquee aperanajeitantacariri.
 4 Icoyaequeero quipatsi cameetsatasanotatsiri asavicajeitanteari,
 iveshireimentari ishanincajeitaniri Jacoboni, yora inintaqueri.
 5 ¡Yoancantanajari Tasorentsi anta ivincatsarimentoqui,
 antearojenca iquimoshiretasanojeitaque,
 aisati itiojeitaquero tiorentsi!
 6 ¡Pimpampoyeacoventasanoteri Tasorentsi!
 ¡Pimpampoyeaventasanoteri Avincatsarite!
 7 ¡Pimpampoyeacoventeri Tasorentsi quenquetsarentsiqui
 cameetsatsiri;
 tempa iriotaque pincatsariventsanotirori quipatsi!
 8 ¡Iriotaque pincatsariventiriri maaroni atiripee,
 isavicaque ivincatsarimentoqui cameetsatasanotatsiri!
 9 Yora pincatsariyevetachari nampitsipeequi
 coajica incarajeiteri icoyeanepée,
 yora ishanincajeitaniri Abrahamani.
 10 Iriotaque Tasorentsi matacairiri pincatsariyetatsiri quipatsipeequi;
 ¡tempa iriotaque pincatsariventirori maaroni!

Ocameetsatasanotaque Sión, inampi Tasorentsi

- 48** 1 ¡Ipincatsaritasanoti Tasorentsi!
 ¡Iriotaque Atasorentsite,
 ocameetsati ancantacoteri: Icameetsati,
 anta inampiqui timatsiri toncaariqui yoameetsasanotiri!
 2 ¡Ocameetsatasanotaque catsini nampitsi Sión,
 ojenoquitinta toncaari timatsiri ocatoncotapaaque!
 ¡Irotaque iquimoshireventapinijeitiri maaroni atiripee!

- ¡Irotaque inampi pincatsaritasanotatsiri!
- 3 Aitaque itimiri Tasorentsi ivancopeequi pincatsari
anta nampitsiqui Jerusalén;
iotacaajeitee ocameetsati aventajeiteari.
- 4 Yora pincatsariyevetachari yapatotashijeivetacaro,
ijatashijeivetacaro irimanajeitero;
- 5 Iro cantaincha ineantacarori nampitsi,
yoajeitanaque cavaco, ocantimonentanacari,
irosati ishiajeitantanaca.
- 6 Oshequi catsini itsaroacaasanojeitacaro,
ampitsitacanacari iyatsiire,
iquempetanacaro tsinane timajanitatsiri;
- 7 aisati iquempetanacaro tampea quenapaatsiri
isotoapainta catsirincaiteri,
tsirajayetirori antearopee pitotsi poneachari nampitsiqui
Tarsis.
- 8 Anta inampiqui Atasorentsite, yora mayetirori maaroni,
aneasanotaquero imataqueri,
oquempetacaro icamantajeitaqueeri intacantajeiteeniri; icanti:
“¡Oncantaitatiyempani intimacaasanotero Tasorentsi
anta nampitsiqui Jerusalén!”
- 9 Notasorentsite, aca Pivancoqui napatotimentapinijeitaquempi,
noquenqueshirejeitiro pinintasanotaquena.
- 10 Notasorentsite, maaroni quipatsiquiniri icantacojeitempi:
Picameetsati.
Tempa Pitasorentsitanoti.
Picantacoventanti cameetsa pitasorenaquai.
- 11 ¡Ocameetsati inquimoshirejeite
savicajeitatsiri toncaariquiniri Sión,
aisati savicayetatsiri inampipeequi Judá,
inquimoshireventero picantacoventiri cameetsa!
- 12 Paniiyetero nampitsi Sión, pishonquearo,
pimoncaratero jaoca ocarayeti pancotsipee quisotatsiri,
yamenacoventanteetarori jenoqui nampitsi;
- 13 aisati pamenasanotero otantopee
jero ivancopee antearoite pincatsariyetatsiri;
pimatantearori pincamantayeteri pishanincajeitajeari coajicani.
- 14 Aitaque icantari Atasorentsite,
incantaitatiyani itimi.
¡Iriotaque jivatacaajeiteene incantaitatiyempani!

Eiro aquimoshireventashitarotsi ashিয়েveteari

- 49 ¹ Pinquemajeitavaquero oca noncamantempiri,
 savicayetatsiri maaroni nampitsipeequi;
² yora ashitaarantincaripee aisati coiteaveetatsiri,
 pincatsariyetatsiri aisati caari pincatsariyetatsi.
³ Meeca noneanatantearo iotantsi,
 aisati nonquenquetsatacotero noquenqueshiretasanotiri.
⁴ Nonquenqueshiretero yoametantiri iotatsiri
 ariorica nompampoyeantaro arpa,
 aisati notacayempi ocantayetiri pomerentsitachari.
⁵ ¿Paitaquea nontsaroanteari ariorica ompomerentsitimotena
 paitapeerica caari cameetsatatsi,
 aisati ontijajeivetaquena caari cameetsatatsi yantajeiteri
 quisajeitanari?
⁶ Ishirejeitaro irovaararo
 aisati ishemeventashitaro yashিয়েvetari.
⁷ Iro cantaincha tecatsi materone iroavisaacotimentajeero,
 aisati eiro imatiritsi impinateri Tasorentsi iroavisaacotantajeiriri.
⁸ ¿Eiro itimitsi quireequi impinacoventanteari
⁹ iraneanteari atiri osamani, eiro icamantatsi!
¹⁰ Tempa iquempeavacaajeitaca icamajeiti maaroni,
 aisati iquempeta ioyevetachari aisati caari ioyevetacha;
 incamaquerica, iraitajeri itsipapee yashিয়েvetaniri.
¹¹ Omavetaquea ipajitacoyevetaroni iipatsiteni,
 ¿tempa oyeaqueri incame, incanteani intijempa!
¹² Yora atiri eiro icantani iranee,
 omavetaquea irashitaarantasanovetea,
 incamajeite iquempeta iriori poshiniripee icamajeiti.
¹³ Aitaque oncanteari intsoncasanojeitajea
 quenqueshireacotashিয়েvetachari,
 aisati neacameetsatashিয়েvetachari irisati.
¹⁴ Ora caamanentsi aanaqueri yora atiripee itiminta tijaari,
 oquempetari shentiriri ovisha.
 Ariorica onquitaiteamanaque,
 yora cameetsajeitatsiri iranaacojeiteri caari cameetsatatsi,
 eiro ishintsiyetanajitsi
 irashinoncaasanotanaquea irosati incamantaquea.
 Tempa aitaque intimeri.
¹⁵ Irompa nainti, iroavisaacotena Tasorentsi itasorenciaqui,
 eiro omatantanatsi caamanentsi;
 tempa iraanajena isaviquinta.

- 16 Eiro picantashiretitsi pineeririca yoshequiasanotiro irovaararo
ashitaarantachari,
aisati yoameetsatasanoyetiro ivanco.
- 17 Tempa ariorica incamaque
eiro imatirotsi iraanajero, yoameetsatasanoyevetari.
- 18 Omavetaquea iquimoshiretasanoveta ainiroquera yanei
aisati ineacameetsatiri atiripee yashitaaranta,
- 19 incamaquerica, eiro aisati ineajirotsi quitaiteri.
- 20 Yora atiri eiro icantani iranee,
omavetaquea irashitaarantasanovetea,
incamajeite iquempeta iriori poshiniripee icamajeiti.

Iriotaque Tasorentsi cantacoventajeiterine tseencantatsiri

50

- ¹ Yora Tasorentsisanori, iriotaque Itasorentsite yora
ijitasorentsitashiyeetari,
ineanataqueri aisati icajemaqueri maaroni savicayetatsiri
quipatsiqui jaocapeerica.
- ² Ishipaquireaque Tasorentsi anta nampitsiqui Sión, ora
cameetsatasanotatsiri.
- ³ Coraquetaque Atasorentsite, impocaje,
iro cantaincha eiro omajereitetitsi,
ojivatapaaqueri paamari tsoncantatsiri,
aisati oshoncaqueari antearo tampea.
- ⁴ Anta jenoqui incajemajeiteri Tasorentsi
inquitesatipee aisati quipatsisati
impocajeite irameneri incantacoventajeiteri ishanincajeitajari.
- ⁵ Icantiri: “Pampatoteri maaroni quemisantasanotaquenari,
yora quearioventaquenarori icarajeitaquena, yoanari virantsi.”
- ⁶ Onta inquite, iotacaajeitee cameetsa icantacoventanti Tasorentsi.
- ⁷ Icanti aisati: “Pinquemisantena
ishanincajeitaniri Israel, noshanincajeitajari,
noncamantasanotempiro paitapeerica piotantearori.
¡Narotaque Tasorentsi, Pitasorentsite!
- ⁸ Te noncantimentempiri poapinijeitanari virantsi,
aisati pitaasanotanari altariqui.
- ⁹ Te noncoacotempiji poyena irijani pivacate
aisati chiivojaniqui shirampari.
- ¹⁰ Tempa nashijeitacari maaroni poshiniripee inchatomashiquiniri,
aisati iquempeta vacapee timatsiri ocatsincaiteapai,
coquiyetatsiri;
- ¹¹ aisati nashijeitacari vanquiyetachari timatsiri toncaaripeequi,
aisati maaroni cajemayetatsiri oantsipeequi.

- 12 Ariorica ayena notashe,
 eiro nocoacojeitimpitsi pimpena noyeari;
 tempa narotaque ashitarori quipatsi
 aisati maaroni timantayetarori.
- 13 ¿Noarimpa ivatsa vaca
 aisati nirirumpa iriraja chiivo?
- 14 Pimpasonquitimenteri Tasorentsi pipayetiriri,
 pimincaratenneri Inquitequiniri picashiacaasanotiriri.
- 15 Pincajemena ariorica ompomerentsitimotempi paitapeerica;
 aitaque nojocaacoventaquempi,
 aviroquea pincatsajeitenane.”
- 16 Irintiquea caari cameetsajeitatsi incanteri Tasorentsi:
 “¿Jaoca pijitari picantashitarori nocantasanovetari,
 aisati pineanatacotashitaro Nocantacantiri,
 17 teerica onimotempiji noametempi,
 aisati tee catsini pineacameetsatero noneane?”
- 18 Irintiquea coshintipee paacameetsati.
 ¡Picarajeitiri aimentarori ijina!
- 19 Pineaveetashiyetaro caari cameetsatatsi
 aisati piotashiyeeta pitseeeya, te pimajeretimateji.
- 20 ¡Picantimatapinitiri pishaninca,
 aisati iriori pirentisanori pitseenquiri!
- 21 Maaroni ocapee pantayetiri, te noncantimentempiro;
 pijitacantashijeita noquempejeitimpi.
 ¡Iro cantaincha aitaque noncantasanotaquempi;
 noasanquetaimentempiro pantayetaqueri!
- 22 “Pinquemasanotavaquero oca, avirojei peacojeitariri Tasorentsi,
 eiroquea nintantimpitsi noasanquetaajeitempi,
 aisati tecatsi jocaacoventaajeitempine.
- 23 Yora quearioventasanotirori ipasonquitana,
 iriotaque pincatsatanari.
 ¡Noavisaacoteri maaroni antayetirori nocoacairiri!”

Notasorentsite, pincavintsayena

*(Ivampoyeane David, icantantacariri yora
 quenquetsatacantatsiri Natán: “Ainiro pantane”)*

- 51** ¹Notasorentsite, pincavintsayena;
 tempa oshequi pinintasanotanti.
 Pincavintsasaanotena; pimpeajero nocantacayetacari.
- ² ¡Poameetsashiretasanoatajena,
 pojocajenaro caari cameetsatatsi nantaqueri!
- ³ Niotacotaca nopiatsataquempii,

- te ompempa noquencheshiretiro nantaqueri.
- 4 Avirotaque apaniro nantimotaqueri caari cameetsatatsi,
nantaquero poasanquetamentiriri antayetirori.
Irotaque oqueariotasanotantacari picantacoventanti;
tampatica picantimentanaro.
- 5 Queario, te noncameetsateji notimantapaacari;
ainiroquera otsomontetana ina, te noncameetsateji.
- 6 Queario, pinintiri cameetsashiretatsiri;
tempa pipaquenaro iotantsi.
- 7 Poameetsashiretajena, noncameetsatantanajeari,
onquempetea pitsiquirijantanarano hisopo;
aisati pinquivashiretajena noncameetsashiretantanajeari,
nanaacotanajero oquitamaroti sharaca.
- 8 Piveshireacaajena, aisati pinquimoshiretacaasanotajena,
omavetaquea poashinoncaasanotaquena.
- 9 Eiro piquencheshiretajirotsi caari cameetsayetatsi nantaqueri
aisati pimpeajero maaroni nantayetaqueri.
- 10 Notasorensite, poameetsashiretajena.
¡Poaquershiretajena, nonquearioventantempiri!
- 11 Eiro pinijantareanatsi pitsipatana,
aisati eiro paapitsatanarotsi Pishire cameetsatasanotatsiri.
- 12 Piveshireacaajena aisati, tempa poavisaacotaquena;
pishintsishiretacaajena, nonquemisantantajempiri,
- 13 nomatantearori noameteri piatsajeitachari picoacairiri
aisati iriori caari cameetsajeitatsi, impiashijeitantajempiri.
- 14 Notasorensite oavisaacotantatsiri, pojocaacoventena,
eiro nomatantatsi noantayete;
iointiquea nompampoyeacoventempi,
noncamantacotempi: Picameetsatasanoti.
- 15 Novincatsarite, poameetsatenaro novante,
nompampoyeantempirori cantacotimpiri: Picameetsati.
- 16 Te onimotempiji nompapinitempiro panquirentsi nocashiacaimpiri,
aisati noapinitempiri virantsi; aitaque nompaquempirime,
iro cantaincha te irio pineacameetsate.
- 17 Ora ipeetiriri Tasorentsi nimotasanotiriri, irointi avashiretanaquea
ashirequi;
Notasorensite, te pojocajeiteriji oashiretachari, irointi
paacameetsatiri.
- 18 Pintasoncaventajero nampitsini Sión;
tempa picavintsantasanoti,
povetsicajero aisati otantopee nampitsini Jerusalén.
- 19 Irosati pineacameetsatantajeari noajempiri virantsipee picoiri,

aisati nompayetajempi panquirentsipee,
aisati maaroni vacajaniqui nontaasanoyetajempiri altariqui.

Yantashitari caari cameetsajeitatsi ishemetacaari

(Ivampoyeane David)

- 52** ¹Aviro, neaperotachari,
¿paitaquea pishemetacantarori caari cameetsatatsi?
¡Tempa icantani Tasorentsi inintasanotanti!
- ²Irointi piquenqueshiretapinitiro pantero caari cameetsatatsi;
ora pineanatiri, irointi pamatavitanti,
oquempetaro cotsiro yamequeetiri.
- ³Picoasanotiro caari cameetsatatsi,
te pincoyeroji cameetsatatsiri.
Picoasanotiro tseeyantsi,
te pincoye pineanate cameetsa.
- ⁴Aviro amatavitantatsiri, picoasanotiro neantsipee
poashinoncaavacantari.
- ⁵Iro cantaincha intsoncasanotempi Tasorentsi;
irojoquempi pivancoqui aisati iroamayempi.
- ⁶Maaroni quemisantiriri Tasorentsi irineajeitaquerorica ocapee,
intsaroasanote,
iro cantaincha ishironmentajeitari; icanti:
- ⁷“Pamenajeiteri caari coatsi iraventeari Tasorentsi,
aisati quimoshireventashitarori oshequi irovaararo;
aisati caari joquerone yantapinitiri caari cameetsatatsi.”
- ⁸Irompa nainti nocantani noshiretasanotari Tasorentsi,
tempa inintasanotana;
Irotaque noquempetantarori inchato orivo eereshitatsiri
timatsiri Ivancoqui Tasorentsi.
- ⁹Notasorentsite, noncanteani nompasonquitimentempiro pimayetaqueri;
avirotaque noshiretasanotari, nocarajeitaqueri
quemisantasanotimpiri,
tempa picameetsatasanotaque.

Yantayetiri atiri caari iotiri Tasorentsi

(Ivampoyeane David)

(Sal. 14.1-7)

- 53** ¹Yora caari iojeitatsi iquenqueshireti, icanti:
“Tecatsi Tasorentsi.”
Icaariperotasanojeitanaque, maaroni;
yantajeitanaquero catsini caari cameetsatatsi.

- ¡Te intimeji anteroneri cameetsatatsiri!
 2 Anta inquitequi yamenajeitaqueri Tasorentsi atiripee,
 jaanicarica timatsiri iotantari, aisati coatsiri iriotajeri
 Tasorentsi.
 3 Iro cantaincha yantajeitaquero maaroni caari cameetsatatsi;
 iquempeavacaajeitanaca maaroni icariperojeitanaque.
 ¡Te intimeji anteroneri cameetsatatsiri,
 te intimate aparoni!
 4 Te aneroji iojeitanti yora caari cameetsajeitatsi,
 caari quenquetsatacairi Tasorentsi,
 tsoncajeitiriri noshanincapee
 iquempetacantaqueri itsonqueetiro oanarontsi.
 5 Omavetaquea tecatsi irantavetea impioncanteari,
 iro cantaincha intsaroasanotanaque;
 iroamaajeiteri Tasorentsi quisajeitiriri
 oveporoquitanaque itonquipeeni.
 Impashiventasanotanaquea; tempa irojocaqueri Tasorentsi.
 6 ¡Cantenane impoque nampitsiqui Sión
 oavisacojeiterine noshanincapee!
 Ariorica iroimpiajeitajeri Tasorentsi ishanincajeitaniri Israel,
 irisavicajeitantajeari cameetsa,
 inquimoshiretasanojeitanaque.

Iquenquetsatacairi David Tasorentsi iramitacoteri

(Ivampoyeane David)

- 54** 1 ¡Notasorentsite, poavisacotena, tempa Pitasorentsitasanoti!
 ¡Pinticaacoventena pitasorencaqui!
 2 Pinquemena noquenquetsatacaimpi;
 pinquemero noncantempiri.
 3 Tempa yora shemetatsiri oantashiyetachari
 iquisajeitaquena, icoaque iroyena.
 ¡Te inquenqueshireteri Tasorentsi!
 4 Iro cantaincha yamitacotana Tasorentsi, yoaneasanotana.
 5-6 Iroimpiajeneri caari cameetsatatsi quisajeitanari,
 irisati ompishitanaje.
 ¡Novincatsarite, pintsoncasanojeiteri,
 tempa aviro queariotasanotatsiri!
 Nocoashiretasanoti noyempiri virantsi,
 aisati noncantacotempi: Pitasorentsitasanoti;
 tempa picameetsatasanoti.
 7 Tempa pojocaacoventaquena opomerentsitimoyevetaquena
 aisati noneaquero pitsoncaqueri quisajeitanari.

Yamani yoiijanayeetiri

(Ivampoyeane David)

- 55** ¹Notasorentsire, pinquemero noquenquetsatacaimpiri;
eire piquemashitarotsi nocantimpiri.
- ²Pinquemasanotena naventimpi;
pamitacotena, oshequi opomerentsitimotaquena.
- ³Oshequi notsaroacaacaro irineane quisajeitanari;
aisati icajemacotapinitana caari cameetsajeitatsi.
Yoatsinantaquenaro oashinoncantsi;
ipocashitaquena itsimaasanotaca.
- ⁴Oshequi oshevataca nasancane,
notsaroasanotanaque catsini noncame;
- ⁵¡Omapocaquena notsaroasanotaque catsini,
nopioncasanotanaca!
- ⁶Ari nocanti: “Cantenane novanquitanaquea,
nonquempetanaqueari tsimeeri naranaqueme,
irosati nomaoreantapempa.
- ⁷Naranaqueme nojatananote areejiqui,
nosavicantapempari cameetsa caaraiteriqui.
- ⁸Noshiasanotanaqueme, naventantapemparori
ojeonqui tampea shintsijencatatsiri.”
- ⁹Notasorentsire, pintsoncasanoteri,
pincomitacayeari irineane;
tempa irointi noneaque oantantsi aisati antavacantsi.
- ¹⁰Icantani quitaiteriqui aisati tsiteniriqui ishoncabinijeitaro nampitsi.
Otimasanotaque caari cameetsatsi aisati amatavitantsi,
oshequi icariperojeitaca.
- ¹¹Oshequi otimasanotaque isavicapinijeitinta atiripee
antavacantsi aisati amatavitantsi.
- ¹²Te irio cantimatenane quisanari, ari namavetaquerome;
aisati te irio coatsine iroyena yora quisaquenari,
ari nomanapitsataquearime.
- ¹³Irompa avirotaque jivatanari aisati notsipavintsatanari.
- ¹⁴¡Avirotaque nocaratapinitiniri napatojeita anta Ivancoqui Tasorentsi;
aquenquetsatacaavacaa cameetsa, aacameetsatavacaani,
anijeitini acarajeitiri apatojeitainchari!
- ¹⁵¡Cantenane omapoqueri caamanentsi quisajeitanari!
¡Intijajeiteata omoroqui aneatsiquera;
tempa yashi yoiro iquenqueshiro tiro caari cameetsatsi!
- ¹⁶Iro cantaincha naventeari nainti Tasorentsi,
aitaque iroavisaacotaquena.

- 17 Meeca noncavintsayea aisati nirayea
onquitaitetamane, ishaaviniji aisati tsiteniriqui.
Aitaque inquemaquero noneane.
- 18 Iroshequiasanojeivetea quisajeitanari iromanajeitantenari,
aitaque irojocaacoventaquena eiro nocamantatsi.
- 19 Aitaque inquemaquena Tasorentsi;
tempa iriotaque pincatsaritatsiri icantaitatiani.
Iriotaque oashinoncayerineri quisaquenari.
Tempa te irojocajero yantaqueri aisati te impincatsateriji
Tasorentsi.
- 20 Icantanatiri tsipatapinivetariri,
te irimoncaratero icantasanovetariri iracameetsatanteariri.
- 21 Cameetsajenca ineanaveta,
iro cantaincha iquenqueshiretiro inquisheru itsipapee.
Yanaacotaqueri quejitsi icarenijati.
Iro cantaincha tee inquempeari,
irointi iquempetaro sataamentotsi amecachari.
- 22 Pincanteri Tasorentsi paitarica pomerentsitimotimpiri,
irishintsishiretacayempi;
eiro ishinetiritsi quemisantiriri irashinoncayea.
- 23 Notasorentsite, eiro osamanititsi intime oantajeitatsiri aisati
tseeyajeitachari;
incamitajea, eiro ineirotsi irantiashipate.
Naintiquea noshiretasanotimpi.

Noshiretari Tasorentsi aisati noneacameetsatiro irineane

(Ivampoyeane David)

- 56** ¹Notasorentsite, pincavintsayena;
ainiro atiri oijanatapinijeitanari.
Icantani quitaiteripeequi imantana aisati yoashinocaana.
- ²Icantani yojjanatapinitaquena quisajeitanari.
Oshequi shemejeitatsiri pocashitanari imanatana.
- ³Ariorica notsaroi, noshiretimpi.
- ⁴Noshiretasanotari Tasorentsi aisati noneacameetsatasanotiro
irineane.
Noshiretasanotari Tasorentsi, te nontsaroyeji.
Tecatsi incantena atiri iroashinoncayena.
- ⁵Icantani quitaiteripeequi icantimatana;
irointi iquenqueshireti iroashinoncayena.
- ⁶Iquenayeti jaocapeerica itsitita,
yamenanontana yoyeashitana iroyena.
- ⁷Notasorentsite, poasanquetaimenteru yantayetiri,

- pintsonqueri, pinquisasanoteri.
- 8 Piotaquero jaoca ocarati noshiapinitaca;
aisati piotasanotiro jaoca ocarati niraapinita.
¿Tempa pisanquenatacotiro pisanquenariqui?
- 9 Yora quisajeitanari irishiapitsatempi ariorica naventempi;
niotasanotaque iramitacotena Notasorentsiti.
- 10 Noshiretasanotari Tasorentsiti,
aisati noneacameetsatasanotiro irineane.
Noshiretasanotari Notasorentsiti aisati noneacameetsatiro
irineane.
- 11 Noshiretasanotari Tasorentsiti te nontsaroye,
tecatsi incantena atiri iroashinoncayena.
- 12 Maaroni nocantasanotimpiri Notasorentsiti,
nomoncaratempiro, nompampoyeacoventempi.
- 13 Tempa poavisaacotaquena caari yoanteetana,
pojocaacoventaquena caari yanaacotantana,
iointi poaneasanotena nosavicanteari cameetsa,
noncaratantempiri, Notasorentsiti.

Icoacotiri Tasorentsiti iramitacoteri

(Ivampoyeane David)

(Sal. 108.1-5)

- 57** ¹ Pincavintsayena Notasorentsiti, pincavintsayena,
tempa avirotaque naventari.
Nocoaque pojocaacoventena pitasorencaqui,
irosati avisantanajeari covencatatsiri.
- ² Noncajemeru Tasorentsiti Inquitequiniri, naventeari,
tempa icantani yamitacotana.
- ³ Intasoncaventena isaviquinta inquitequi,
tempa icantani inintanti;
iroavisaacotena eiro yoantanatsi jaanicaica quisajeivetenane.
- ⁴ Nonareaca quipatsiqui ishoncajeitaquena atiri coatsiri iroyena,
iquempetacari anteariite maniti oantachari,
ora irajipee oquempetacaro sataamentotsi jero chacopi.
Aisati ineaveeti, oquempetacaro sataamentotsi amecachari.
- ⁵ Notasorentsiti, tempa pisaviqui inquitequi.
¡Ora pitasorenca otsoteaquero maaroni quipatsi!
- ⁶ Yora quisajeitanari yamatavitapinitaquena iroashinoncantenari,
irotaque noashiretantacari;
oquempetaca iquiashitaquena omoro iroariantenari,
iro cantaincha irisati pariantajaro.

- 7 Notasorensite nocoasanotaque nompampoyempiro pampoyeantsi.
 8 Meeca noquimoshiretasanoti,
 nompampoyeantearo arpa aisati salterio;
 jariorica onquitaiteamane nompampoyeacoventempi!
 9 Notasorensite, nompampoyempiro pampoyeantsi,
 inquemajeitena pashinisatipee atiri.
 10 Tempa pinintasanotiri catsini atiripee
 aisati picantani piqueariotasanoti.
 11 Notasorensite, tempa pisaviqui inquitequi.
 ¡Ora pitasorenca otsoteaquero maaroni quipatsi!

Aviro Tasorensi cantacoventantatsiri cameetsa

(Ivampoyeane David)

- 58** ¹ Avirojei pincatsariyevetachari,
 ¿Queariompa picantacoventanti cameetsa poashinoncanterica?
 ¿Queariompa pantayetiro tampaticatatsiri?
 2 Iro cantaincha piquenqueshiretiri poashinoncaavacayea;
 irotaque otimantari oantantsi nampitsiqui.
 3 Yora caari cameetsajeitatsi aitaque icanta,
 te incameetsateji tequeratani intime;
 aisati ainiroquera otsomontetiri iriniro,
 yamitacaro itseeyajeita.
 4 Oshequi yoashinoncantajeiti,
 iquempetacari maranquepee quepiatatsiri,
 quempetacantachari imayempiti yovitaquero iquemantari,
 5 eiro iquemantarotsi ivampoyeane sheripiari
 ioyevetachari imatsitanti.
 6 Notasorensite, poasanquetaasanoteri,
 ¡pijireiteri iraaajipee yora quempevetariri anteariite maniti,
 eiro imatantarotsi iroashinoncayena!
 7 Impeajeiteata intsipaite,
 inquempetearo nija aajaitachari
 aisati yaatiqueetiri camashitatsiri saveshi.
 8 Inquempejeitearita sanquiro itsonquiro iyarentsare
 aisati inquempetearita jananequi
 caari aneatsi ojocashitari tsinane.
 9 Intsoncajeiteta inquempetearo totseequishi itayeetiro,
 ironea inquemacotaquerorica avishimoterine;
 inquempetearita tojasheri itsonqueetiri.
 10 Yora quemisantimpiri inquimoshirete
 ariorica irineaquempi pimpiacoventaqueari;
 iraatiquitajeiteri irirajani caari cameetsatatsi.

11 Impoiji incantajeite:

“¡Ocameetsasasanotaque anquemisantajeiteri!

¡Ainiro Tasorentsi cantacoventajeitiriri cameetsa atiripee!”

Iriotaque Tasorentsi jocaacoventeeri

(Ivampoyeane David)

- 59** 1 Notasorentsite, pojocaacoventena quisajeitanari,
poavisaacotena eiro yoantanatsi pocashitanari irimanatena.
- 2 Poimapacacoventena caari cameetsajeitatsi,
poavisaacotena eiro yoashinoncantanatsi oantatsiri.
- 3 Oshequi irioperoyetatsiri oyeaqueenari icoaque iroyena.
Novincatsarite, te nOMPIATSATEAJI
aisati te nantero caari cameetsatatsi;
- 4 tecatsi nante,
iro cantaincha icoasanotaque iroyena.
¡Pimpocanaque intsipaite, pojocaacoventena, pamenapeeri!
- 5 Avirotaque Tasorentsi, mayetirori maaroni;
Itasorentsite Israel, pamitacotena,
poasanquetaajeiteri pincatsatashijeitariri ijitasorentsiyetiri,
eiro picavintsaajeitiritsi caari cameetsajeitatsi
aacantantashitachari.
- 6 Ipiapinijeita tsiteniriqui ishoncapanitaro nampitsi,
iquempetacari otsitipee itsarotapiniti tsiteniripeequi.
- 7 Quitiojayeti,
ineanayetiro caari cameetsatatsi oashiretacantachari,
icanti: “Tecatsi quemeeene.”
- 8 Iro cantaincha, Novincatsarite,
pishirontimentacari yora pincatsatashijeitariri ijitasorentsiyetiri.
- 9 Aviro, Notasorentsite, quempoyeacoventanari;
tempa avirotaque ticaacoventanari aisati jocaacoventanari.
- 10 Yora Tasorentsi iriotaque nintanari, impocashitena iramitacotena;
ironijaacayenari intsonqueri quisajeitanari.
- 11 Eiro picavintsaajeitiritsi,
Povaraajeiteri pitasorencaqui, poashinoncayeri,
inquenqueshireantanaqueari noshaninceapee.
Aviro, Notasorentsite, jocaacoventanari.
- 12 Ariorica ineanati, icantani ineanatiro caari cameetsatatsi.
Pishineteri irashinoncaimetearo yantiri ishemetimentiri aisati
icantashiyetari tseeYANTSI.
- 13 ¡Pintsonqueri pinquisasanoteri, eiro itimantanajitsi!
¡Iriojaitanaqueta yora Tasorentsi,
iriotaque pincatsariventiriri ishanincajeitanari Jacoboni,

- irosati ovecaratapaaca maaroni quipatsi!
 14-15 Ariorica ipiajeita tsiteniriqui, iquempetacari otsitipee itsaroti,
 aisati ishoncayetaro nampitsi icoayeti iroyeari;
 iraatsata, teerica inquemea.
 16 Irompa nainti nompampoyeacoventamanempi;
 quimojenca nonquenquetsatacotero pitasorenca aisati
 pinintasanotanti.
 Tempa avirotaque jocaacoventanari
 aisati naventari ariorica opomerentsitimotana.
 17 Notasorensite, avirotaque nompampoyeeneri pampoyeantsi;
 tempa avirotaque ticaacoventanari aisati jocaacoventanari.
 ¡Avirotaque Tasorensi, nintasanotanari!

Icoacotiri Tasorensi iramitacoteri

(Ivampoyeane David)

(Sal. 108.6-13)

- 60** ¹Notasorensite, piquisanotantacari, pojocajeitaquena,
 pishinecoventaquena yoashinonqueetaquena.
 ¡Meecca nocoi poimoshirencajeitajena aisati!
²Poashinoncaaquena, oquempeta pinicaquero quipatsi,
 otencareantanacari nianqui;
 mecca poavisaacotajena,
 oquempeta poipiajiro quipatsi oquempetantanajari aisati.
³Pishinejeitaquena opomerentsitimotasanotaquena,
 oquempetaca piracajeitaquenaro ovaja shoncacotantatsiri.
⁴Piotacajeitaqueri pincatsajeitimpiri
 jaoca incantajeiteari irishiapitsajeitanteariri quisajeitiriri, eiro
 yoantaritsi.
⁵¡Poavisaacojeitena pitasorencaqui! ¡Pojocaacoventeri pinintajeitiri!
⁶Icantasanotaque Tasorensi anta Inantariqui:
 “¡Nonquimoshirete nanaacotantaquerica,
 nompaarantayeteri nocoyeajeitaqueri quipatsi Siquem
 aisati oirincaiteacotapai Sucot!
⁷Nashitacaro nampitsi Galaad,
 aisati iriori ishanincapeeni Manasés.
 Yora ishanincapeeni Efraín
 irio ticaacoventajeiterine ishanincapee,
 yora ishanincapeeni Judá nocoyeaqueri pincatsariyetatsineri.
⁸Yora savicatsiniri anta quipatsiqui Moab iriojeitaque
 noveranaro,
 nashijeiteari ishanincapeeni Edom.

- ¡Noncajeme nanaacojeitaqueri filisteopee!”
- 9 ¿Jaanicampa aanaquenane nampitsiqui tantotachari?
¿Jaanicampa jivatanaquenane inampiqui ishanincapeeni
Edom?
- 10 Iro cantaincha, Notasorensite, pojocaquena,
¡tee quiso poajeitajena nomanajeitanteariri quisajeitanari!
- 11 Pamitacotena nanaacojeitanteariri quisajeitanari;
tempa tecatsi irimataque atiri iramitacovetenarica.
- 12 Iramitacoteerica Tasorensi, ari amajeitaquero
pomerentsitimoyeveteeneri.
¡Iriotaque tsoncajeiterine quisajeiteeri!

Iriotaque yaventari apaniro Tasorensi

(Ivampoyeane David)

- 61** 1 Notasorensite, pinquemena antearojenca nocavintsaa,
noquemaatsicatanotaca.
¡Pinquemisantero noquenquetsatacainpiri!
- 2 Naventaquempi, noponeaca areejiqui nonampi;
te namavetanajeroji noquemaatsitacari.
Pinticaacoventena, poavisaacotena,
onquempetea poaquena imperitaqui.
- 3 Tempa avirotaque naventari
piquempetacaró pancotsi quisotasansotiri jocaacoventanari,
jeiro imatantanatsi irayena quisanari!
- 4 Nocoaque noncanteani nosavique Pivancoqui,
pinquempoyeacoventantenari.
- 5 Notasorensite, piquemaquero nocantasanotaquempiri,
irotaque pipantaquenarori cameetsayetatsiri
picashiacaqueriri pincatsajeitimpiri.
- 6 Pishineteri pincatsari iranee oshequi osarensi,
7 aisati pinticaacoventeri; tempa piquearioventiro pinintasanotiri.
- 8 Aitaque noncanteari noncantacotapinitempi: Picameetsati;
aisati nomoncaratero quitaiteripeequi nocashiacaayetimpiri.

Iriotaque Tasorensi apaniro naventari

(Ivampoyeane David)

- 62** 1 Apaniro Tasorensi isavicacaana cameetsa;
iriotaque oavisaacotanari.
- 2 Apaniro yoavisaacotana aisati iticaacoventana,
eiro yanaacoyeetanatsi;
tempa iriotaque naventari.
- 3 Aviro quisajeitaquenari,

- ¿irosatimpa pincanteani pimanajeitena panaacotantenari,
pinquempetacantena tantorensi tireayetatsiri aisati pariatsiri?
- 4 Irointi iquenqueshiretapinitiro iroyena,
aisati icoasanotiro intseeyacotena.
Ineanatacoventashitana cameetsa,
iro cantaincha iquenqueshiretiro iroashinoncayena.
- 5 Apaniro Tasorensi isavicacaana cameetsa;
iriotaque noshiretasanotari.
- 6 Apaniro yoavisaacotana aisati iticaacoventana,
eiro yanaacoyeetanatsi;
tempa iriotaque naventari.
- 7 Iriotaque Notasorensite oavisaacotanari
aisati matacanari impincatsatanteetenari,
iriotaque naventari jocaacoventanari.
- 8 Avirojei noshanincapée, pincanteani pishiretasanojeiteari Tasorensi;
pinquenquetsatacapinijeiteri, pishiretasanoteari.
Iriotaque Tasorensi aventajeiteari.
- 9 Iquempeavacaajeitaca atiripee: yora coiteaveetatsiri
aisati ashitaarantachari;
tecatsi irijijetea.
Ariorica amoncarateri moncamentotsiqui, tecatsi anaacotantatsine
intenate.
- 10 Eiro pishiretarotsi poante.
Eiro poyeacotatsi paantearo paitapeerica picoshitiri
ariorica pashitaarantaquea, eiro paventaritsi quireequi.
- 11-12 Oshequi noquemapinitaquero icantiri Tasorensi:
“Narotaque mayetirori maaroni.
Narotaque nintasanotantatsiri
aisati narotaque pinaterine atiripee aparopeeni yantayetiri.”

Iriotaque Tasorensi veshireacaariri atiripee

(Ivampoyeane David)

- 63** 1 ¿Tasorensi, avirotaque Notasorensite!
Oshequi nocoacoatimpi, ocoiteimotaquena noncaratempi.
Nocoashiretasanotimpi, oquempeta quipatsi pirijatatsiri ocoiro
nija.
- 2 Nocoaque nonempi anta Pinantariqui,
Aisati namenero pimayetiri pitasorencaqui.
- 3 Ocameetsatasanotaque pinintasanotana,
anaacotiro naneantari;
noncantacotempi: Picameetsati.
- 4 Noncanteani nompasonquitempi,

- aisati nonquenquetsatacayempi, noanquero nacopee.
 5 Nonquimoshiretasanote, nonquempeteari veshireimentarori
 oanaronsi poshinitatsiri;
 aisati nonquimoshirete noncantacotempi: Picameetsati.
 6 Nonareanarica tsiteniriqui, noquenqueshiretimi;
 7 tempa avirotaque amitacotanari.
 ¡Noquimoshiretasanotaque piquempoyeacoventaquena!
 8 Notsipatasanotaquempi;
 quiso poasanotaquena pitasorenaqui.
 9 Yora coatsiri iroyena intsonquea, incame intijajeitea.
 10 ¡Incamajeite iroyeeteri sataamentotsiqui
 aisati iroajeiteari otsitiniro!
 11 Iro cantaincha yora pincatsari inquimoshireventeri Tasorentsi;
 maaroni pincatsajeitiriri, impampoyeacoventajeiteri
 pampoyeantsipee.
 Irintiquea tseyajeitachari, iroimajerentajeiteri.

Icantiri Tasorentsi irojacaacoventeri

(*Ivampoyeane David*)

- 64** 1 Notasorentsite, pinquemena nocavintsaaca,
 pojacaacoventena; eiro pishinetiritsi quishincari iroyena.
 2 Pimanena eiro ineantanatsi caari cameetsajeitatsi,
 aisati pojacaacoventena iquenqueshireyevetari
 irimanacayena, iroashinoncantenari.
 3 Icantimatana, ineanatashiveeta oquempetacaró
 sataamentotsi ameechhari aisati chacopi catsitatsiri.
 4 Anta imananta aitaque imanatiriri cameetsatatsiri;
 imanatiri jaanarica irineavaqueri, te intsaroyeji.
 5 Icoasanoti irantero caari cameetsatatsi;
 yapatojeita iquenqueshiretiro yoashitante imanaquero iroashire,
 ijitacantashitaca tecatsi neerone.
 6 Tecatsi iotacotiterine yantayetiri.
 Iro cantaincha yora iotacotasantirori
 paitapeerica iquenqueshiretiri atiripee;
 iriotaque amenasanotitiriri.
 7 Yora Tasorentsi irimapoqueri iroashincaajeiteri.
 8 Irisati ashinoncaimetajearone ineanayetiri;
 yora neajeiterineri irishirontimentajeiteari.
 9 Irosati impincatsajeitantanajeari Tasorentsi,
 aisati inquenquetsatacojeitajero inajeitaqueri;
 iriojeitanaquero maaroni imayetaqueri.
 10 Yora cameetsatatsiri iriveshireimentajeari Tasorentsi,

aisati iraventeari irojocaacoventeri;
maaroni pincatsajeitiriri inquimoshireventanaqueri.

Ocameetsati ancantacoteri Tasorentsi: Icameetsati.

(Ivampoyeane David)

- 65** ¹Notasorentsite, savicatsiri nampitsiqui Sión,
ocameetsati incantacoyeetempi: Picameetsati.
Ocameetsati nomoncaratempiro nocashiacaimpiri.
- ²Tempa piquemisantiro amanantsi,
irotaque maaroni atiripee ipocashijeitantimpiri.
- ³Ora nantajeitiri oatsinaajeitaquena,
iro cantaincha pipeacojeitaquenaro.
- ⁴Inquimoshirete atiri picoyeaqueri, irisaviquimotempi Pivancoqui.
Noveshireasanotea nontimantearo Pivanco
cameetsatasanotatsiri.
- ⁵Notasorentsite, oavisaacotanari,
pimatasanotaquenaro caari noneapiniti,
ocameetsataque picantacoventanti.
Maaroni savicajeitatsiri quipatsiqui ishirejeitaquempi,
aisati iriori areejiquiniri ovecaratapaaca incajare.
- ⁶Avirotaque quisotacairori toncaaripee
pimatasanotiro pitasorenaqui.
- ⁷Poimajerentiro omotoncane incajare
aisati atiripee quisavacaajeitachari.
- ⁸Aisati iquempejeita savicajeitatsiri areejiqui,
itsaroacaajeitacaro pimayetaqueri.
Avirotaque iquimoshireventiri quimojenca
savicayetatsiri acaqueroca aisati antaqueronta.
- ⁹Pamenacoventiro quipatsi, povariiro incani,
pishiocacairo panquirentsipee;
pitimacaayetiro nijatenipee antearojayetatsiri,
povetsicanontiro oshiocanteari oitsoqui.
Aitaque picantirori povetsicanontiro quipatsi.
- ¹⁰Pitsincacotiro quipatsi ipanquitanteetarori oitsoquipee,
pitencanayetiro oquenaajatantari incani
aisati pitasoncacoventiro oitsoqui panquirentsipee.
- ¹¹Picantani pitasoncacoventiro osarentsipeequi,
aisati poipariiro incani otimasantantayetari oitsoquiyetatsiri.
- ¹²Ora paashitomashipee caaraiteriquiniri oshiocayetanaji
aisati oquempeta toncaaripeequiniri, oquenashimashitanaji.
- ¹³Ora opampaiteyeti ishequiasanotanaque ovishapee
aisati oirincaiteayetapaaca otimasanoyetanaque tiricomashipee.

Maaroni timantayetarori ipampoyeajeiti aisati icajemajeiti, iquim oshiretasanajeiti.

Ocameetsatasanotaque yantayetiri Tasorentsi

- 66** ¹ Maaroni savicajeitatsiri quipatsiqui,
pimpampoyeacoventajeiteri Tasorentsi,
pinquimoshireventasanoteri.
- ² Pimpampoyeacoventajeiteri pampoyeantsi cameetsatatsiri;
tempa icameetsatasanotaque catsini.
- ³ Pincanteri Tasorentsi:
“Ocameetsatasanotaque pimayetaqueri caari noneapiniti.
Pimatasanotaquero pitasorenaqui
itsaroacaajeitanaquempi quisajeitimpiri.
- ⁴ Maaroni atiripee ipincatsajeitaquempi,
ipampoyeacoventajeitaquempi: Pitasorentsitanoti.”
- ⁵ Pimpocajeitanaque, pamenajeitero caari aneapiniti yantaqueri
Tasorentsi,
imataqueneriri atiripeeni.
- ⁶ Ipirijataquero incajare, aisati iquempetaquero nijateni,
imonteajeitantanacarori intacantajeitaqueeniri.
¡Tsame aveshireimentasanoteari Tasorentsi!
- ⁷ Icantaitatiani ipincatsariventanti,
yamenacoventajeitiri itsipasatipee atiri,
eiro imanajeitantaritsi piatsajeitachari.
- ⁸ ¡Maaroni atiripee, pineacameetsatasanoteri Atasorentsiti!
¡Pimpampoyeacoventajeiteri pampoyeantsipeequi!
- ⁹ Tempa iquempoyeacoventaquee, aneajeiti;
tee irishineteeki ashinoncayea.
- ¹⁰ Notasorentsiti, pishinecoventaquena ineantajeiteetaquena,
¡aisati poameetsashirejeitaquena,
oquempeta incotsiyeetiri plata paamariqui!
- ¹¹ Pishinetaquena nashinoncaajeitaca,
oquempetaca icharijayeetana.
Pipomerentsitacaasanotaquena catsini,
oquempetaca noquiijaquero tenatatsiri.
- ¹² Pishinecoventaquena yoashinonqueetaquena, oquempitaca
yaaticaquena;
oquempetaca avishimotaquena notsitiaque nijaqui aisati
otaaquena paamari;
iro cantaincha noneajiro notimaji cameetsa.
- ¹³ Coajica nonquee Pivancoqui,
naanaque nocashiacaquempiri, nontaasanotempiri;

- nomoncaratero nocantasanotaquempiri,
 14 ora nocantaquempiri noneantacari avishimotaquena covencatatsiri.
 15 Nontaasanotempiri virantsipee vatsanti altariqui,
 aisati iriori vacapee, chiivopee jeri ovishapee,
 16 Pimpocajeitanaque maaroni pincatsajeitiriri Tasorentsi,
 pinquemena noncamantajeitempiro imataquenari.
 17 Nocajemaqueri aisati nocantacotaqueri: Icameetsati.
 18 Ariome nonquenqueshireterome caari cameetsatsi,
 eiro iquemisantaname Tasorentsi.
 19 ¡Iro cantaincha iquemaquena
 aisati yamitacotaquena noquenquetsatacaqueriri!
 20 ¡Icameetsataque Tasorentsi!
 Te inquemashitearo noquenquetsataciriri,
 aisati tee intsaneapitsatenaro inintana.

Ocameetsati incantacojeitempi maaroni atiripee: “Picameetsati”

- 67** 1 Nocoaque incavintsaajeitee Tasorentsi aisati
 intasoncacoventajeitee, irineacameetsajeitee,
 2 iriotantanaquearori maaroni atiripee
 icoacaqueriri aisati yoavisaacotanti.
 3 Notasorentsite, ocameetsati incantacotempi maaroni atiripee:
 Picameetsati.
 ¡Ocameetsati incantacotempi maaroni: Picameetsati!
 4 Ocameetsati incajemajeiti atiripee iriveshireimentasanojeitempi,
 tempa cameetsa pipincatsariventasanojeitiri.
 ¡Avirotaque jivatacaajeitiriri maaroni quipatsipeequiniri!
 5 Notasorentsite, ocameetsati incantacotempi maaroni atiripee:
 Picameetsati.
 ¡Ocameetsati incantacotempi maaroni: Picameetsati!
 6 Ora quipatsi oshiocantayetacaro oitsoquiyetatsiri.
 ¡Itasoncacoventasanojeitaquee Atasorentsite!
 7 ¡Ocameetsataque itasoncacoventaquee Tasorentsi!
 ¡Ocameetsati impincatsajeiteri maaroni atiripee!

Tasorentsi anaacotantatsiri

(Ivampoyeane David)

- 68** 1 Ariorica irijivatanaque Tasorentsi irimanatea,
 irovaraajeitanaquea quisajeitiriri, irishiapitsajeitanaqueri.
 2 Impeajeitanaquea inquempetearo cachaa
 aisati jareatsiri icanteetiri cera intayeeterorica paamariqui.
 ¡Iroimpeajeiteri Tasorentsi caari cameetsajeitatsi!
 3 Irintiquea cameetsatsiri iriveshireimentajeiteari Tasorentsi.

- ¡Inquimoshiretasanajeite catsini!
- 4 Pimpampoyeacoventajeiteri Tasorentsi,
 ¡Pimpampoyeacoventeri pampoyeantsiqui Avincatsarite!
 Pincantacoteri: Icameetsati yora ovariorori incani.
 ¡Pinquimoshireventeri Tasorentsi!
 ¡Pinquimoshireventeri itiminta!
- 5 Iriotaque Tasorentsi savicatsiri Ivancoqui cameetsatsiri;
 iriotaque iriri jananequpee camayetatsiri iriri, iriniro
 aisati amenacoventirori camajimentaaroopee.
- 6 Yora savicashitachari apaniro, ipiri isavicantari,
 aisati yoipacaacoventiri yoiminqueeyetiri, isavicacairi cameetsa.
 Irintiquea piatsajeitachari, irisavicajeiti quipatsiqui
 caari oshiocanta panquirentsipee.
- 7 Notasorentsite, pijivajeitantariri pishanincajeitacari,
 piquenacantariri caaraiteriqui,
- 8 onicanaca quipatsi, opariaque incani;
 aisati onicanaca toncaari Sinaí.
 Tempa avirotaque Itasorentsite ishanincajeitaniri Israel.
- 9 Notasorentsite, povariasanotaquero incani,
 oshiocayetanaji ivanquire iipatsitequi pirijatatsiri.
- 10 Yora pishanincajeitajari aitaque isavicajeitapaaqueri,
 aviro Tasorentsi, neshinoncataqueriri
 pipaqueri coiteaveetatsiri coiteimotariri.
- 11 Yora Tasorentsi icamantantaque,
 oshequi tsinaneppee oaaqueneriri oshanincapee:
- 12-13 “¡Shiajeitanaca pincatsariyetatsiri aisati manatacoventajeitiriri!”
 Anta ovancopeequi opavacaayetacaro
 yovetsiqueetiri shiacantsi ishivanqupee sampaquiti ioshitachari
 plata
 aisati ivitipee ioshitachari oro pinatasanotachari,
 yaapitsajeitaqueriri quisajeitiriri.
 ¡Iro cantaincha avintiquea pimanajeitaca itantoroqui pivirapee!
- 14 Yoimishiajeitantariri Tasorentsi pincatsariyetatsiri
 yovariaquero sharaca toncaariqui Salmón.
- 15-16 ¡Avirojei, savicayetatsiri toncaaripeequiniri Basán,
 antearotasanotatsiri!
 ¿Paita piquisacotantarori toncaari icoyeaqueri Tasorentsi
 irisavicanteari?
 ¡Aitaque irisaviqueri incantaitatiyempani!
- 17 Yora Tasorentsi oshequi catsini
 ishiacomentopee imanatacaari.
 Aitaque yaniireapaaqueri toncaariqui Sinaí

- isavicantapaacaro Ivancoqui.
- 18 Notasorensite, pijataji toncaariqui,
 paanaqueri oshequi iperanayeevetari,
 aisati paaquero ipashijeitaquemperi atripee;
 panaacotasanaotaqueri quisajeitimpiri, ipincatsajeitantaquemperi.
- 19 Icameetsatasanotaque Avincatsarite Tasorensi, oavisaacoteeri.
 Icantani quitaiteripeequi yamitacotee pomerentsitimojeiteeri.
- 20 Iriotaque Atasorensite oavisaacotantatsiri,
 eiro acamajeitantatsi.
- 21 Intsoncasanoteri Tasorensi quishiriri,
 antapinitirori caari cameetsatsi.
- 22 Icanti Tasorensi: “Noimpiajempi nampitsiqui Basán aisati
 incajarequi,
- 23 pintsoncantaajeiteariri maaroni quisajeitimpiri.
 Paatiquitajeiteri iriraja
 aisati iriori pitsititepee irantsojeitero.”
- 24 Avincatsarite Tasorensi,
 noneajeitaqueri anta Pinantariqui
 veshirementajeitimpiri, yoveshintsaajeitaca.
- 25 Yora pampoyeajeitatsiri ijivajeitanaque,
 iro nianqui evancaropee pampoyeantarori panteretapee,
 irio impojjeitatsi pampoyeantarori otsipapee.
- 26 ¡Pinquimoshireventasanojeiteri Tasorensi yora Tasorensisanori,
 avirojei ishanincajeitaniri Israel apatotimentajeitariri!
- 27 Yora jivajeitanaintsiri iriojeitaque ishanincapeeni Benjamín,
 yora vecarantarori itimi.
 Impoitatsiri itimi aisati jivatacantayetatsiri ishanincapeeni Judá,
 Zabulón jeri Neftalí.
- 28 Notasorensite, pinijaasanotenaro pitasorencia.
 ¡Pinquenqueshiretacaajeitenaro pimayetaqueri
 pamitacojeitantaquenari!
- 29 Anta Pivancoqui antearotatsiri,
 timatsi nampitsiqui Jerusalén,
 aitaque yamapinijeitimpirori pincatsariyetatsiri ipashiyetimpiri,
- 30 pimpiateari egiptosatipee quempevetariri covencatatsiri;
 tempa icoasanojeitaquero irashitaarantasanotea,
 yoashiventaasanojeitaqueri savicayetatsiri nampitsipeequi
 yaapitsajeitaqueri yashiyeevetari.
 ¡Poimishiajeiteri coasanotirori irimanatapinijeitea!
- 31 Imponeaquea Egiptoqui atiri intianqueri pincatsiri,
 aisati etiopiasati impoque inquenquetsatacoteri Tasorensi.
- 32 ¡Pimpampoyeaventajeiteri Tasorensi

- savicayetatsiri maaroni nampitsipeequi!
 ¡Pimpampoyeneri pampoyeantsi Tasorentsi
 33 yora quenantarori inquite timitachaniri!
 Pinquemero irineane oquempetacaró otirei.
 34 Piotasanótero timatsi itasorenca Tasorentsi,
 ipincatsariventasanótiri ishanincajeitaniri Israel
 aisati yonijayetaqueero itasorenca anta inquitequi.
 35 Icameetsatasanotaque Tasorentsi anta Inantariqui.
 Iriotaque Itasorentsite ishanincajeitaniri Israel,
 imatacaasanótiri paitapeerica aisati ishintsitacaasanótiri.
 ¡Icameetsatasanotaque Tasorentsi!

Yaventacari Tasorentsi opomerentsitimotacari

(Ivampoyeane David)

- 69** ¹ Notasorentsite, poavisaacotena,
 oquempetimotaquena irotaintsi nontsitiye.
² Irotaintsi oniyena sampovatsa, tecatsi naatiqueri,
 aisati nareetacaró osaanajarequi nija,
 aanaquena oshintsijare.
³ Macotapaaquena sametsatanaquena nocajemapinitaque
 catsitapaaquena notsanoqui;
 aisati catsijaquitapaaquena noquiqui,
 noyecovetaquempi pamitacotena.
⁴ Oshequi catsini quisajeitaquenari,
 yanaacotiro oshequiti noishipee;
 tecatsi nante iquisashitaquena, icoashitaca iroyena.
 Icantapinitashitaquena noimpiajeneri caari nocoshiyevetari.
⁵ Notasorentsite, piotaquena te aneroji notantari;
 te nomateroji nomanapitsatempiro
 caari cameetsatatsi nantayetiri.
⁶ Novincatsarite Tasorentsi, mayetirori maaroni,
 eiro pishinetiritsi shiretasanotimpiri oashiretacayeari caari
 cameetsatatsi nantaqueri.
 Aviro, Itasorentsite Israel, intacantaquenaniri,
 eiro pishinetiritsi aventasanojeitimpiri impashiventacaitenaro
 nantaqueri.
⁷ Avirotaque namavetimentaqueri itseencanayeetaquena,
 oshequi yoashiventayeetaquena.
⁸ Yora noshanincapee iquempetacantaquena
 pashinisati noni, caari ineapiniti.
⁹ Nonintasanotaquero Pivanco, notsaneacotacaró,
 irotaque icoantacari iroyena.

- Iquisaquena yora cantimataquempiri avirori.
 10 Ariorica niraa aisati notita,
 oshequi yantavinsanataquena.
 11 Ariorica ineana noquitsaataro maatsarantsi noashiretantari,
 ishironimentajeitana.
 12 Yora atiripee icantimatana iquenayeti yovaayetiniri itsipapee,
 aisati shinquijeitachari ipampoyeacoventana
 itseenquimatantanari.
 13 Iro cantaincha, Notasorensite, naventimpi,
 pamitacotena meeca; tempa pinintasanotana,
 picavinsaasanotana, poavisaacotena.
 14 Eiro pishinetanatsi anayena sampovatsa
 aisati nontsitiye nijaqui sanajari;
 poavisaacotena oshequi quisajeitaquenari.
 15 ¡Eiro pishinetanatsi aanaquena oshintsijare!
 ¡Eiro pishinetanatsi oimitsitiyena ovishoiricaare, oamaanacari!
 16 ¡Notasorensite, pamitacotena;
 tempa Picameetsati, pinintasanotanti!
 Picavinsantasanoti catsini,
 pinquenqueshireacotena narori.
 17 ¡Eiro pojocanatsi; tempa narotaque quemisantimpiri!
 ¡Pamitacotena intsipaite,
 oshequi omapocaquena covencatatsiri!
 18 Pimpocashitena, poavisaacotena.
 ¡Pojocaacoventena quisajeitaquenari!
 19 Piotaquero icantimataquena yoashiventaaquena,
 te impincatsatena;
 aisati piotaqueri jaanica quisajeitaquenari.
 20 Oshequi ocantimonentasanotaquena icantimataquena.
 ¡Te nonquimoshiretajeji aisati te noshintsitaje!
 Natsipetashitaca nocoayevetaca veshireacayenane,
 quenqueshireacotenaneri.
 21 Iconoaquenaro oanarontsiqui piantatsiri,
 aisati nomirevetaca, irointi ipaquena ovaja cachojari.
 22 Ariorica irampatojeitempa iroajeitanteari
 iraacameetsatavacantajeiteari,
 Poashiniyeneri iroashinoncavacanteari irisati.
 23 Pinquitapoajatacaajeiteri, eiro yamenantajatsi;
 aisati incanteani impioncajeite ivoripeequi,
 eiro ishintsitantajatsi.
 24 Pinquisasanojeiteri, pintsoncajeiteri maaroni,
 oquempeta morecatsiri paamari.

- 25 Oncaaraitetanaqueta inampini,
tecatsi savicajeitantajearone ivancopeeni.
- 26 Yoijanataqueri yora poashinoncacantaqueri
aisati ishirontimentajeitacari yora piquemaatsicatacaacari.
- 27 Poimpiyeneri caari cameetsatatsi yantaqueri;
eiro ineirotsi pimpeacoteneri.
- 28 Pimpeajero ivajiro sanquenarentsiqui oaneantatsiri;
eiro pisanquenatacotiritsi incarajeitanteariri cameetsajeitatsiri.
- 29 Naintiquea, Notasorensite,
oshequi nomantsiataque aisati opomerentsitimotaquena,
pintecatsitajena, poavisaacotajena.
- 30 Nompampoyeacoteri pampoyeantsiqui Tasorensi; tempa
icameetsati,
aisati noncantacoteri: Icameetsati, nompasonquiteri.
- 31 Irotaque inecameetsatasanotiri,
anaacotiri virantsipee nontaaveteanariri.
- 32 Irineaquerorica oca, yora yoashinoncayeetiri
inquimoshiretanaque;
aisati inquimoshirejeitanaje aventajeitimpiri
irishitsishireajeitanaje.
- 33 Tempa iquemisantiri Tasorensi coiteaveetatsiri ariorica
yaventari.
Te irojoqueriji yashijeitajari yoiminueeyetiri caravosoqui.
- 34 Maaroni timayetatsiri inquitequi, quipatsiqui aisati incajarequi,
pincantacoteri Tasorensi: Icameetsati.
- 35-36 Iroavisaacoteri Tasorensi savicajeitatsiri nampitsiqui Sión,
irovetsicajeitajero nampitsipee iipatsitequi ishanincapeeni Judá.
Irotaque irisavicantajeari quemisantajeitiriri.
Aisati irajeitajero irishanincajeitajeari
quipatsi icashiacaqueriri.

Icantiri David Tasorensi iramitacoteri intsipaite

(Ivampoyeane David)

(Sal. 40.13-17)

- 70** ¹Notasorensite, pimpoque pojocaacoventena,
jintsipaite pamitacotena!
- ² ¡Poashiventaasanoteri coatsiri iroyena!
¡Irishajeitanaqueta coatsiri iroashinoncayena!
- ³ ¡Irishajeitanaqueta impashiventasanotanaquea yora
shirontimentanari!
- ⁴ Irintiquea maaroni aventajeitimpiri, coasanotatsiri poavisaacoteri,

inquimoshiretasanojeite; incantapinite:
 “¡Ipincatsaritasanoti Tasorentsi!”

- 5 Naintiquea nocoiteavetaque, nashinoncaaca;
 Notasorentsite, intsipaite pamitacotena.
 Tempa avirotaque amitacotanari, aisati jocaacoventanari.
 ¡Eiro pisamanititsi, Notasorentsite!

Iquenquetsatacairi anteashipari Tasorentsi

(Sal. 31.1-4)

- 71** ¹Notasorentsite, naventimpi, pojocaacoventena.
 ¡Eiro catsini pamatavitanatsi!
- ² ¡Pojocaacoventena, poavisacotena;
 tempa picameetsatasanoti!
 Pinquemena, poavisacotena.
- ³ Avirotaque naventapinitari jocaacoventanari
 aisati oavisacotanari;
 piquempetacaro imperita
 aisati pancotsi quisotatsiri tantotacotchari.
- ⁴ Notasorentsite, pojocaacoventena;
 eiro yoashinoncantanatsi caari cameetsajeitatsi oantatsiri.
- ⁵ Tempa avirotaque Notasorentsite, noshiretasanotari;
 quiso poaquena peerani nevancaritantapaacari.
- ⁶ Ainiroquera otsomontetanani ina, pamitacotaquena.
 ¡Avirotaque timacaaquenari!
 ¡Noncanteani noncantacotempi: Picameetsati!
- ⁷ Oshequi amenashijeitaquenari,
 iro cantaincha avirotaque ticaacoventanari.
- ⁸ Nocantani quitaiteripeequi noveshireimentasanotimpi,
 nopampoyeacoventimpi;
 tempa picameetsatasanotaque.
- ⁹ Eiro pipincanatsi nanteashipatanaquerica;
 eiro pojocanatsi teorica noshintsitanaje.
- ¹⁰ Yora quisajeitaquenari iquenquetsatacaavacaajeita iroantenari.
- ¹¹ Icantajeiti: “¡Poijanateri, pajiriqueri;
 tempa yojocaqueri Tasorentsi,
 tecatsi oavisacotajerine!”
- ¹² Notasorentsite, eiro pinijantareanatsi.
 ¡Pamitacotena intsipaite!
- ¹³ ¡Impashiventajeitanaqueata!
 ¡Intsoncajeiteata quisajeitanari,
 yora coajeitatsiri nashinoncayea!
- ¹⁴ Naintiquea noncanteani noyeacotempi

- aiquero nojatatiye noncantacotempi: Picameetsati.
- 15 Maaroni quitaiteri nonquenquetsatacotempi
 poavisaacotaquena, picantacoventaquena cameetsa.
 ¡Eiro nomatirotsi nontsoteajero niotacotasanoctempi!
- 16 Notasorents site, nonquenquetsatacotero
 pimasanoquetaqueri cameetsatatsiri.
 Noncamantacotempi,
 ¡Apaniro picanta picameetsatasanoti!
- 17 Notasorents site, poametasanoctaquena nevancaritantapaacari,
 irosati nocanta meeca noquenquetsatacotiro pimasanoquetaqueri.
- 18 Notasorents site, eiro pojocantsi ariorica nanteashipatanaque,
 omavetaquea nompajetanaque;
 aiquero nojatatiye nonquenquetsatacotero pimasanoquetaqueri
 pitasorencaqui.
 Nocoaque noncamanteri timajeitatsiri meeca
 aisati impoijeitajantsineri coajica.
- 19 Notasorents site, oshequi pintacotaquena catsini;
 Pimasanoquetaquero paitapeerica.
 ¡Tecsati quempetempine!
- 20 Omaveitea pishinetaquena noneaquero oashinoncantsi aisati
 covencatatsiri,
 Iro cantaincha ari poaneajena,
 aisati pintinaajena noncamavetaquearica.
- 21 Aiquero pimatacayenari nompincatsaritasanotanaje
 aisati pimpiaje poimoshirencajena.
- 22 Naroquea pampoyempirone pampoyeantasi arpaqui aisati salterio,
 noncantacotero ocameetsati piqueariotasanoti.
 Avirotaque Notasorents site, cameetsatasanotatsiri,
 Itasorents site ishanincajeitaniri Israel.
- 23 Oshequi noveshireimentempi, nompampoyeacoventempi;
 tempa poavisaacotaquena.
- 24 Aisati noncanteani nonquenquetsatacotempi picameetsatasanotaque;
 tempa yora coajeivetachari nashinoncayea, poashiventaasanotaqu
 eri.

Icantacoventiri pincatsari Tasorentsiqui

72 ¹Notasorents site, piotacaasanoteri pincatsari
 picavintsanti aisati picameetsatasanoti,

² irimatantearori cameetsa impincatsariventer
 pishanincajeitajari jeri coiteaveeyetatsiri.

³ Ontime toncaaripeequi panquirentsi,
 aisati irisavicacayeri cameetsa pishanincatajari.

- 4 ¡Incantacoventajeiteri pincatsari cameetsa coiteaveetatsiri!
¡Iroavisaacojeiteri ocoiteimoyetari paitapeerica;
irintiquea oashinoncaajeitiriri, intsoncajeiteri!
- 5 ¡Incanteani impincatsatempi pincatsari,
ainiroquera itimi catsirincaiteri aisati cashiri!
- 6 ¡Inquempetearo incani aisati cajashiteatsiri quipatsiqui
tsincacotirori panquirentsi!
- 7 ¡Incanteani irisavicacaajeiteri cameetsa
aisati irantayetero cameetsatatsiri,
ainiroquera ipincatsariventajeitiri,
irosati impeantajeiri cashiri!
- 8 ¡Ompponeanaquea impincatsariventante antearojaqui incajare
irosati nijaqui Éufrates aisati overapaaca quipatsi!
- 9 ¡Yora quisajeitiriri savicajeitatsiri caaraiteriqui
irishinetanaqueari imperanajeiteari,
eiro ipiatanajaritsi!
- 10 ¡Yora pincatsariyetatsiri nampitsipeequi Tarsis,
Sabá aisati Sebá jeri ovoyejapeequiniri,
iramajeiteneri paitapeerica impashiteariri pincatsari,
aisati impinacoventeari!
- 11 ¡Maaroni pincatsaripee intiyeroashiteari,
aisati maaroni atiripee irantaveejiteneri!
- 12 Iroavisaacojeiteri coiteaveeyetatsiri aventajeitariri
aisati ashinoncaincari caari timatsine amitacoterine.
- 13 Incavintsaajeiteri caari neaperotacha
aisati iroavisaacojeiteri coiteaveeyetatsiri.
- 14 Iroavisaacojeiteri iperanayeetari aisati yoashiyetari;
tempa ineacameetsatasanojeitaqueri intime cameetsa.
- 15 ¡Icameetsatasanoti pincatsari!
¡Ocameetsati imperi oro Sabásati!
¡Incanteani incantacoventapiniyeeteri Tasorentsiqui!
¡Incanteani incantacoyeteri cameetsatatsiri!
- 16 ¡Ontimasanotanaque tirico oantsiqui,
ontsoteanaquea otishipeequi!
¡Oquempetacaró toncaari Líbano
aisati oshequiasanotanaque onquempetanaquearo
saveshimashi!
- 17 ¡Incanteani impincatsariventante,
irosati incanteani inquemacoyeeteri,
iquempeta catsirincaiteri icantani itimi!
¡Irvishireacaajeiteari savicajeitatsiri maaroni nampitsipeequi!
¡Irineacameetsajeitaqueri impajiteri: “quimoshiretatsiri!”

- 18 Icameetsatasanotaque Tasorentsi, Itasorentsite Israel,
intacantajeitaqueerini.
Apaniro imatasanotiro paitapeerica.
- 19 Icameetsatasanotaque.
¡Icantani ipincatsariventiro maaroni quipatsi!
¡Aitaque incanteari!
- 20 Aitaque overapaacari iquenquetsatacaajeitiriri Tasorentsi David,
itomi Isaí.

Icavintsantasanoti Tasorentsi

- 73** 1 ¡Icameetsatimotaqueri Tasorentsi ishanincajeitaniri Israel,
maaroni yora cameetsashirejeitatsiri!
- 2 Ariome nompiatsataquea, aitaque nantaquerome caari cameetsatatsi,
onquempetimotaquenname naashirincanaque ari nompariaqueame.
- 3 Tempa nonquisanementintaqueri shemejeitatsiri aisati caari
cameetsajeitatsi,
Noneaqueri oshequi iquimoshireventiro timimotiriri.
- 4 Te inquenqueshiretacoteaji incame;
itecatsitasanojeiti, te irimantsiajeiteji.
- 5 Te irashinoncayea iquempeta yashinoncayeta atiri,
tecatsi pomerentsitimotearine iquempeta itsipapee
opomerentsitimotari.
- 6 Ora ishemero oquempetaca inenquetacaró,
aisati yoashinoncanti, oquempetaca iquitsaatacaro.
- 7 Yashitaarantasanotanaca, oquempetaca ivatsatasanotanaca catsini,
oshequi catsini caari cameetsatatsi icoashiyetari iranteri.
- 8 Ishirontimentanti, ishemeti aisati yoashiventanti,
isareanta iroashinoncante, irantashiyetearo caari cameetsatatsi.
- 9 Icantimatiri Tasorentsi Jenquiniri,
aisati iquenayeti itseeayeta.
- 10 Irotaque ineacameetsatantariri itsipapee,
tee iriotacotiteriji yantayetaqueri.
- 11 Icantajeiti: “¿Ariompa iriotaquero Tasorentsi?
¿Ariompa inquenqueshiretajero yora Inquitequiniri?”
- 12 ¡Pameneri yonta caari cameetsajeitatsi!
Tecatsi ashereajecterine aiqero yashitaarantasanotanacari catsini.
- 13 ¡Natsipetashitacaró narori nocameetsashiretaque,
nojocaquero caari cameetsatatsi nantayetiri!
- 14 Tempa oshequi nashinoncaaca maaroni quitaiteripeequi.
- 15 Ariome nonquenqueshiretaqueame nonquempetejarime iriori,
naacantajeitaquerime pishanincajeitajari.
- 16 Noquenqueshireacotaquero niotacotantearori,

- iro cantaincha oshequi opomerentsitimotaquena.
- 17 Aintiquea nojatantajari Inantariqui Tasorentsi,
aitaque niotacotaquerori jaoca irijajeiteri caari cameetsajeitatsi.
- 18 Oquempeta poatiaqueri ocarentsaiteti
aisati pitatsincaqueri irashinoncanteari.
- 19 Intsipaita intsoncasanojeitajea, intsaroajeitanaque.
- 20 Notasorentsite, ariorica pimapocajeitaqueri,
Inquempeteari tinaashitachari imishiroqui;
eiro pineacameetsatirotsi jaocarica icantayetari.
- 21 Oshequi notsimaashiretasanotaca catsini,
aisati ocantimonentasanotaquena;
- 22 tempa te nioteji, noquempetacari caari iotatsi.
¡Noquempetimotaquempi virantsi!
- 23 Iro cantaincha nocantani quiso noaquempi,
oquempetaca pajiricasanotaquena.
- 24 Piotacaasanotanaro picoacaquenari,
ariorica ovecaratapaaquea, ari paacameetsatavajena
ocameetsaitetinta.
- 25 ¿Jaanicampa noneapaajeri inquitequi?
¡Apaniro avirotaque!
Ariorica nosaviquimotapaajempi,
eiro noquencheshireajirotsi oca quipatsi.
- 26 Maaroni novatsa ompeanajea,
iro cantaincha noncanteani noncarateri Tasorentsi anta
inampiqui,
iriotaque shintsitacaanari.
- 27 Yora jocanajempineri, incamajeite;
pintsoncajeiteri caari quemisantimpi.
- 28 Iro cantaincha nainti quiso noyeri Tasorentsi,
ocameetsatimotaquena catsini.
Avirotaque Novincatsarite, naventari,
ocameetsati noncamantacotero maaroni pimayetaqueri.

Icoacotiri Tasorentsi irojocaacoventeri quemisantiriri

- 74** ¹Notasorentsite, ¿paita pojocantaquenari nocantaitatiyani?
¿Paita piquisajeitantacariri pishanincajeitajari,
yora pishentiri quempevetacariri povishatepee?
- ²Pinquenqueshiretacoteri pishanincajeitajari, yora paajeitajiri peerani
aisati poavisaacojeitajiri yoashinoncanteevetacariri,
pashitasanotantajariri.
Pinquenqueshirecotajero nampitsi Sión toncaariquiniri,
picoyeaqueri pitimantari.

- 3 ¡Pamenero, itireaquero quisajeitimpiri Pinantari
aisati maaroni timayetatsiri tsoompoinaqui!
- 4 Yora quisajeitimpiri ipampoyeacoventiro
yanaacojeitantaque anta Pinantariqui;
¡yoatiayetaquero ivanteeratepee pashinisato
- 5 otimininta iqueantapinyeetarori!
Iquempetacari aatsiri tsitsi iquenayeti inchatomashiqui,
- 6 yamashiyetaquero shacha aisati martiyo,
iposantacarori maaroni cameetsatatsiri yovetsicayetiri inchatopee;
iquempetacantaquero tsitsipee.
- 7 Itaaquero Pinantaniri,
¡Te impincatsateroji Pivanconi!
Itireayetaquero maaroni.
- 8 Icoasannotaque impeajero maaroni ashijeivetari;
¡Itaasanoyetaquero napatajeitantaniri nopincatsatantimpiniri!
- 9 Te noneajeitajero shiacantsipee pinashitacaasanotari;
aisati te aneajeriji camantantatsiniri,
tecatsi niojeitantajeari jaoca oncarate ompeantajeari maaroni.
- 10 Notasorentsiti, ¿jaoca oncarate irantanajeitena quisajeitanari?
¿Jaoca oncarate impeacotearo incantimajeitempi?
- 11 ¿Paita caari picoanta ponijaajenaro pitasorencia?
¿Paita pamenacoventashitantanari?
- 12 Tempa peerani avirotaque Novincatsaritetacari.
Aisati avirotaque mataquerori panaacojeitaqueri savicayetatsiri
nampitsipeequi.
- 13 Pitencareajataquero incajare pitasorenciaqui;
pitsatijitaqueri iito covencayetatsiri timatsiri incajarequi.
- 14 Paaticaqueri iitoqui icanteetiri Leviatán
aisati pipaqueri covencayetatsiri timatsiri caaraiteriqui,
yoajeitacari.
- 15 Pisotoaajatacaaquero nija jero nijatenipee,
aisati pajaaquero caari ajaavetacha osantenipee.
- 16 Avirotaque ashitarori quitaiteri jero tsiteniri,
poayetaqueri cashiri jeri catsirincaiteri;
- 17 Poaquero ovecaraayetapaa quipatsi,
aisati pinashitacaacaro osarentsi jero pariantsi.
- 18 Tasorentsi, pinquenqueshiretero itseencajeitaquempi quisajeitimpiri,
aisati icantimajeitaquempi caari iotatsi.
- 19 ¡Eiro pipeacojeitanatsi, naroji te noshintsijeiteji,
noquempejeivetacari tooquitipee!
¡Eiro pishinetanatsi, intsoncajeitena quisajeitanari,
quempetacariri covencayetatsiri!

- 20 ¡Pinquenqueshiretajero picantaqueri, pincaratapinijeitena;
tempa nampitsiquica otimasanoquetaque oantantsi, otsoteanaca
maaroni!
- 21 Eiro pishinetiritsi iroashinonqueeteri iperanayeetari.
¡Irointiquea incantacotempi: Picameetsati,
yora coiteaveetatsiri jeri caari neaperotacha!
- 22 ¡Notasorentsiti, pishintsiti!
¡Pinticaacoventeri pishanincajeitajari!
¡Pinquenqueshiretero icantani icantimataquempi caari iojeitatsi!
- 23 Eiro pipeacotarotsi icajemapinijeiti quisajeitimpiri,
aiquero icajemasanojeitanaqueri piatsajeitimpiri.

Iriotaque Tasorentsi cantacoventantatsiri

- 75** ¹ Nopasonquijeitimpi, Notasorentsiti,
Nopasonquijeitimpi; noquenquetsatacaimpi
aisati nopampoyeacoventiro pimayetaqueri caari ineapiniyeeti.
- ² Tempa picanti: “Omoncarataquearica, noncantacoventantasanote
cameetsa.
- ³ Ariorica oniquea quipatsi aisati maaroni timantajeitarori,
narotaque quisotacairori.”
- ⁴ Yora jitacantachari ioti nocantiri:
“Eiro pijitacantashitatsi pioti.”
Aisati caari cameetsajeitatsi nocantiri:
“Eiro pishemejeititsi.
- ⁵ Eiro pijitacantashita pishintsitasanoti;
aisati eiro pineanatashivetatsi pijitacantashitea avioperori.”
- ⁶ Tempa yora cantacoventantatsiri cameetsa
te imponempaji acaqueroca, antaqueronta;
aisati te imponempaji caaraiteriqui aisati toncaaripeequi;
- ⁷ irintiquea Tasorentsi cantacoventantatsiri;
apaaropee iroashinoncaajeiteri
irio itsipa iroveshireacaajeiteari.
- ⁸ Yora Tasorentsi inquisanaquearica,
iroashinoncaasanojeiteri caari cameetsajeitatsi,
irosati intsoncantajeitajea.
Oquempeta yajiricaquero iramento ojaaca iquisa,
otentaaca ovaja quepishijatatsiri;
ariorica irisacotaquero yora caari cameetsajeitatsi,
irirasanojeitero maaroni.
- ⁹ Noncanteami nonquenquetsatacoteri nainti Tasorentsi
iquemisantiniri Jacoboni, aisati nompampoyeneri pampoyeantsi;
- ¹⁰ iriotaque tsonquerone ishemetimentiri caari cameetsajeitatsi;

irintiquea cameetsatatsiri, irimatacaasanoteri paitapeerica icoiri.

Iriotaque Tasorentsi anaacotantatsiri

- 76** ¹ Yora ishanincapeeni Judá iotacotiri Tasorentsi;
aisati ineacameetsajeitiri yora ishanincajeitaniri Israel.
- ² Otimi Ivanco toncaariqui Sión,
timatsi nampitsi Jerusalén.
- ³ Aitaque yanaacojeitaqueriri quisajeitiriri;
isherajaquero yojocaacoro, aisati icarajaquero sataamentotsi, pea
jero chacopi, maaroni.
- ⁴ ¡Notasorentsite, pipincatsaritanotaque!
¡Panaacotiro antearovetachari toncaaripee timitachari!
- ⁵ Yora neaperotasanoeyevetachari ipeasanojeitaca;
aisati shintsitsanoeyevetachari tecatsi irimajeite.
¡Icamajeitaque maaroni!
- ⁶ Aviro Itasorentsite Jacoboni,
piquisasanotantacariri quisajeitaquenari,
caari omatantanaja oshiaje ishiacomentopee aisati iyavaayotepee.
- ⁷ ¡Avirotaque ipincatsayeetiri!
¿Jaonica matempine impiatempi ariorica pinquisasanotanaquea?
- ⁸ Tasorentsi, anta inquitequi piotacaqueri atiri picantacoventiri
cameetsa.
Irotaque intsaroajeitanteari maaroni, irimajerejeitanaque
- ⁹ irimajerejeitanaque ariorica omoncarataquea pincantacoventante,
aisati poavisaacojeiteri ashinoncaincari savicayetatsiri quipatsiqui.
- ¹⁰ Ariorica iquisajeitea atiripee,
pincantacaashireteri ironijantero picameetsati,
aisati oquempeta inquishearica capichaji, impincatsatempi.
- ¹¹ Avirojei pincantasanoteri Pitasorentsite paitapeerica pimperiri,
iro cantaincha ontimatiye pimancaratero.
Avirojei apatojeitachari coasanotatsiri pimpincatsateri,
pamaqueneri pimpashiyeteariri.
- ¹² Tempa iriotaque oamairiri jivatacantajeitatsiri
aisati yoimintsaroajeitiri pincatsariyetatsiri quipatsipeequi.

Iquenqueshiretiro imayetaqueri Tasorentsi

- 77** ¹ Quimojenca nocantiri Tasorentsi, inquemantenari.
- ² Noashiretantacari, naventari Tasorentsi,
nocantani tsiteniriquipeequi novanquiro naco
noquenquetsatacairi.
Iro cantaincha te noneeroji oimoshirenquenane.
- ³ Ari noquenqueshiretiri Tasorentsi, niraaca,

- aisati te noncoashiretanaje.
- 4 Notasorensite, te pishinetena nomaaje.
¡Oshequi ocantimonentaquena,
te nomateroji paitarica noneanateri!
- 5 Nocantani noquenqueshireyetiro jaoca nocantaniri peerani.
- 6 Nopampoyeayeti tsiteniripeequi:
noquenqueshireti, nocanti:
- 7 “¿Irosatimpa incanteani inquishea Tasorensi?
¿Eirompa aisati icavintsaajeitajanatsi?
- 8 ¿Opeacampa inintanti?
¿aisati otsoncacampa icantasanotaquenari oncanteani?
- 9 ¿Ipeacotacarompa Tasorensi icavintsanti?
¿Iquisasanojeitaquenampa, eiro ineshinoncajeitajanatsi?”
- 10 Iro cantimonentasanotaquenari ariorica nonquenqueshiretero,
te quiso iroajeitajee Tasorensi Inquitequiniri;
te inquempetajea peerani.
- 11 Nonquenqueshiretajero imayetaqueri Tasorensi peerani;
- 12 noncanteani nonquenqueshiretero maaroni yantayetaqueri.
- 13 Tasorensi, picameetsatasanoti,
aisati ocameetsati maaroni pantayetaqueri,
¡te aneeriji ijitasorensiyeetiri quempetempineri!
- 14 ¡Avirotaque mayetirori caari ineanapiniyeeti!
¡Ponijaasanotaqueri pitasorenca atiripee!
- 15 Poavisacotajiri pishanincajeitajari pitasorencaqui,
yora itomipeeni Jacobo aisati José.
- 16 Tasorensi, piquempetitantapaacarori incajare,
otsaroacaanaquempi,
aisati oshevajatanaca nija saanajatatsiri.
- 17 Ora mencoripee opariasanotanaque incani,
otireanaque inquitequi aisati oporecayetanaque maaroni.
- 18 Iquemasanoeyeetaquero poimatasanotatsiri otirei
timatsiri apishoiricachari tampea;
iquitasantetacotasanotiro porecatsiri quipatsi aisati oshevataca.
- 19 Pitencareajataquero incajare yavisajeitantanacari;
iro cantaincha tecatsi neerone paaticampoiretanaque.
- 20 Pijivatacantacariri pishanincajeitajari,
picoyeaqueri Moiseshini jeri Aaróni iraanakeri;
piquempetacantaqueri shentiriri ovisha.

Imataqueneri Tasorensi ishanincajeitajari

78 ¹ Aviro noshanincapee, pinquemisantero noametimpiri.
¡Pinquemasanotero noncantempiri!

- 2 Meeca noncamantempiro shiacantayetarori,
caari iojeiteeti peerani.
- 3 Ora aquemacotaqueri ayotacojeitaquero
icamantaqueero intacantajeitaqueeri,
- 4 eiro amanapitsatiritsi iriori atomipee
yora impojeitajeeneri coajicani,
ancarajeiteri ancantacoteri Tasorentsi: Icameetsati;
anquenquetsatacoteri itasorenca
aisati imayetaquero caari aneapinijeiti.
- 5 Itimacaaquero Tasorentsi icantacantirri
irimoncarajeiteri ishanincajeitaniri Jacoboni, yora Israel.
Icantasanojeitaqueri iroamejeiteri irishanincajeitajeari,
- 6 aisati iriojeitantearori impojeitajantsine coajica,
iroamejeitanteariri intomintajeitajeari iriori.
- 7 Irotaque irishirejeitanteariri Tasorentsi iriori,
eiro ipeacotantarotsi imayetaqueri;
irimoncaratantearori icantacantayetiri,
- 8 eiro iquempejeitantaritsi intacantajeitaqueeri, ipiatsatacari.
Te irioteji, te irishiretasanoteariji.
¡Iriojeitaque caari quemisanterine Tasorentsi!
- 9 Yora ishanincapeeni Efraín
ajiricavetacarori pea aisati chacopipee
vetsicajeivetainchari iromanajeitea;
iro cantaincha imanajeitantavetacari, ishiajeitanaca;
- 10 te impincatsatero icantasanovetacariri Tasorentsi
aisati te incoyeroji irimoncarajeitero yoamevetacariri.
- 11 Ipeacojeitacaro imayetaqueri caari ineapinijeiti, yonijavevetacariri.
- 12 Yonijaasanotaqueri caari ineapinijeiti nampitsiqui Zoán, timatsiri Egiptoqui;
- 13 itencareajataquero incajare iquenajeitantanacari.
Iquempetacantaqueneri oticaajataca acaquero ca aisati
antaquero ca.
- 14 Ijivatantacariri quitaiteriqui yoaqueneri mencori,
iro tsiteniriqui iquitasantetacotaqueri quempetarori paamari.
- 15 Anta caaraiteriqui icotareaquero mapi imperita
ipasanotaqueri nija irajeitaqueri.
- 16 ¡Iriotaque Tasorentsi sotoajatacaquerori imperitaqui nija
oquenaajayetanaque nijatenipeequi!
- 17 Iro cantaincha aiquero yantimojeitanaqueriri Tasorentsi caari
cameetsatatsi;
ipiatsatasanojeitacari Tasorentsi Inquitequiniri anta caaraiteriqui.
- 18 Icoajeitaque irineanteari,
icoacotaqueri iroajeiteari ineamatacari.

- 19 Aisati icantimajeitaqueri icanti:
 “¿Ariompa irimataquero Tasorentsi impajeitee ayeari aca caaraiteriqui?”
- 20 Queario imataquero Tasorentsi icotareaquero imperita,
 osotoajatanacari oquempetanacaro antearoja nija anaanaquero quipatsi.
 Iro cantaincha, ¿ariompa impaquee tanta aisati ivatsa avajeiteari?”
- 21 Iquemantacarori Tasorentsi icantajeitaqueri,
 irosati iquisantanaca catsini, iquempetacaro paamari,
 ¡Icoasanotanaque iroashinoncaajeiteri ishanincapeeni Jacoboni!
- 22 Tempa te irishireteari Tasorentsi;
 te irishiretearo ario irimataquero iramitacoteri.
- 23 Iro cantaincha icantaquero Tasorentsi mencori,
 aisati ashitareanaca inquite;
- 24 ¡irosati yovariantacanari ishanincajeitajari maná,
 oanaronsi poneachari inquitequi yoajeitacari!
- 25 ¡Yora atiri yoacaro oanaronsi yoari inampirepee Tasorentsi!
 ¡Ipasanojaqueri iquemasanojeitacaro!
- 26 Ora tampea quenapaatsiri iquenapainta catsirincaiteri
 aisati acaquero, otampeajencataque inquitequi.
 Yamajeitaqueri Tasorentsi itasorencaqui poshinirintsipee.
- 27 Yoipariajeitaqueri oshequi contonapee,
 ¡iquempetacaro impanequi incajarequiniri!
- 28 Itiancaqueneri nianqui
 aisati ishoncajeitapaacari ivancojanipeequi.
- 29 Yoajeitacari irosati yaashireantanacari;
 imoncarataqueneri Tasorentsi icoacotaqueriri.
- 30 Iro cantaincha tequera inquemajeiteaji,
 ainiroquera yamoncotiro iroanaro,
- 31 irosati iquisasanojeitantacari Tasorentsi.
 ¡Yoamaajeitaqueri shintsitasanoyevetachari,
 yora irioperoyevetachari ishanincapeeni Israel!
- 32 Ineajeivetacaro maaroni,
 aiquero yantanaquerori caari cameetsatsi;
 te irishiretearoji imayetaqueri Tasorentsi caari ineapinijeiti.
- 33 Irotaque itsoncajeitantacariri oquempeta aneequi,
 omapocaqueri covencatatsiri itsaroasanojeitanaque,
 icamajeitanaque.
- 34 Yoamaarrantantacariri Tasorentsi,
 irosati yaventaajeivetantanajari icoasanovetajari.
- 35 Irosati iquenqueshireantavetanajari Tasorentsi Inquitequiniri,

- quempeacoventavetariri aisati oavisacojeivetacariri.
- 36 Iro cantaincha ineanaveta cameetsa,
irointi itseeyajeta.
- 37 Tempa te incantasanote cameetsa,
aisati te inquemisantero icantasanovetacariri.
- 38 Iro cantaincha Tasorentsi icavintsaqueri,
ipeacotacanari yantayetiri;
icantani yamavetaquero.
Omavetaquea iquisakeri,
iro cantaincha te incoyeji intsoncajeiteri.
- 39 Iquenqueshiretacoqueri, aitaque icantajeita atiri;
iquempetacaro tampea ojeonqui avishi, te ompiajeroji.
- 40 ¡Icantani ipiatsatapinitacari Tasorentsi,
icantimonentacaasanotacari anta caaraiteriqui!
- 41 ¡Iro cantaincha yapiitajiro ineantajari,
yoashiretacaapinitacari Tasorentsi cameetsatasanotatsiri
iquemisantajeitiri ishanincajeitaniri Israel!
- 42 Te catsini inquenqueshireteroji peerani imayetaqueri itasorenaqui,
yoavisaacotantacariri iroashinoncaajeiterime quisajeivetacariri,
- 43 aisati imatantacarori caari ineapiniti
anta quipatsiqui Soan egiptoquiniri,
yoajeitanaque cavaco,
- 44 aisati ipeantacarori nija irajantsi,
tecatsi irajeitajero irirajeri egiptosati.
- 45 Itiancaqueneri aisati shimpoquipee jeri masheropee
yasherequeri maaroni;
- 46 ishinetaqueri tsinaropee itsoncajeitapaaquero panquirentsipee
ipanquijeivetari.
- 47 Itiancaquero iriniqui aisati sharaca,
otsoncapaaquero hiqueramashipee aisati ovamashi,
- 48 oamaajeitaqueri iriniqui aisati porecatsiri
ivacatepee jeri irovishatepee.
- 49 Aitaque icantaqueriri Tasorentsi iquisasanojeitaqueri,
yoasanquetaajeitaqueri, opomerentsitimotacari catsini,
iotacaaqueri omapocantacariri caamanentsi.
- 50 Iquisasanoqueri catsini, te incavintsaajeitimateriji,
irointi ishencovetanqueri icamajeitaque.
- 51 ¡Yoamaajeitaqueri itomipee egiptosati jivayetatsiri itimi!
- 52 Irintiquea ishanincajeitaniri Israel yaajeitanajiri anta caaraiteriqui;
iquempetacantaqueri irovishatepee.
- 53 Cameetsa yaajeitanajiri
iquempoyeacoventasanotaqueri, eiro itsaroanta;

- irintiquea quisajeivetacariri,
yoimitsiajeitaqueri incajarequi, icamajeitaque.
- 54 Yaajeitanajiri Tasorensi ishanincajeitajari quipatsiqui yoameetsatiri,
jora toncaaripeequiniri imanacoventajeitaqueri!
- 55 Yojocajeitaqueri pincatsatashijeitariri ijitasorensiyetiri,
ineajeitaqueri ishanincajeitaniri Israel.
Aisati ipavacaayetacaro quipatsi ishanincasanoripee iriori,
irotaque isavicajeitantacari inampipeequi.
- 56 Iro cantaincha ineantajari aisati Tasorensi Inquitequiniri.
Ipiatsajeitacari, te inquemisantero icantacantiri;
- 57 aisati iquempetacotajari intacantacariniri,
ipeacojeitacari, te inquemisanteri.
jIquempetacaro pea tipitatsiri!
- 58 Iquisacaacari ipincatsatashiyetacaro yovetsicashiyetari
ijitasorensitashitari pashinisatipee, itaashitacanari ivirapee altariqui.
- 59 Ineantacarori Tasorensi yantaqueri, iquishimentasanotaqueri,
yojocajeitaqueri ishanincajeitaniri Israel,
- 60 aisati injantareanaquero Inantaveitaniri,
timatsiniri nampitsiqui Siló,
isaviquimoveitaniri atiripee.
- 61 Ishinetaqueri quisajeitaqueriri yaanaquero Cajón otimantari
Icantacantiri,
oshiacaaventiri itimi aisati itasorenca.
- 62 Oshequi iquisasanotaqueri Tasorensi ishanincavetajari,
ishinecoventaqueri quisajeitaqueriri yoamaarrantayetaqueri.
- 63 Yora evancaripee icamajeitaque, itayeetaqueri.
jTecatsi aajeri evancaropee ojimentajeari!
- 64 Aisati icamayetaque antaaveeyetinirini Tasorensi, isatayeetaqueri;
ora ijinapeeni te iraacoteriji.
- 65 Iro cantaincha yora Tasorensi intsipaite yamenanaji, iquempevetaca
imishita,
aisati iquempevetacari manatincari opeanajari ishinquitaro ovaja,
- 66 itsoncajeitaqueri quisajeivetacariri, yomishiajeitaqueri.
jIcantashireacaasanotacari, incanteani impashiventea!
- 67 Te iraacameetsatajeri ishanincapeeni José,
aisati te incoyeajeri ishanincapeeni Efraín;
- 68 irintiquea icoyeasanotaji ishanincapeeni Judá
aisati nampitsi Sión toncaariquiniri, ora inintasanotiri.
- 69 Yovetsicacantasanotajiro Inantari cameetsatatsiri,
areetachari jenoqui, oquempetacaro inquite,
aisati icantasanotaque oncanteani ontime,
onquempetearo quipatsi.

- 70 Icoyeaqueri David, quemisantasanotiriri,
yora shentaveitariniri ovishapee.
- 71 Te incoacaajeriji irishentajeri,
iointi icoacaaqueri iramenacoventeri ishanincatajari,
ijivatacayeri ishanincajeitaniri Israel.
- 72 Ari imataquero David yamenacoventaqueri ishanincatajari
Tasorentsi,
aisati ijivatacaajeitaqueri cameetsa, tempa icameetsashiretaque.

Cantimonentaquerori itsonqueetaquero nampitsi Jerusalén

- 79** 1 ¡Notasorentsite, yora pincatsatashijeitariri ijitasorentsiyetiri
iqueajeitapaque Pinantasanotariqui!
¡Icaariperotanaquero catsini Pivanco cameetsatatsiri!
¡Itsoncanaquero nampitsini Jerusalén, itireanaquero maaroni!
- 2 ¡Yoajeitaqueri quemisantimpiniri, yora quearioventimpiniri;
ojoquiiweetanaca ivatsani quipatsiqui,
iroajeitanteariri tisonipee aisati covencayetatsiri oantachari!
- 3 Ora irirajani oquempetanacaro nija otsoteanaquero maaroni
nampitsi Jerusalén,
aisati tecatsi tijerine camajeitaintsiri.
- 4 Icantimataquena neajeitaquenari
aisati ishirontimentaquena pashinipee saviquimojeitanari.
- 5 Notasorentsite, ¿jaoca oncarate pinquishempa?
¿Irosatimpa pincantea pinquishea, pinquempetearo morecatsiri?
- 6 ¡Pinquisasanoteri irinti pincatsatashijeitariri ijitasorentsiyetiri
nampitsipeequiniri,
caari iojeitimpi aisati caari quenquetsatacojeitimpi!
- 7 Tempa itsoncaarantaqueri irinti ishanincajeitaniri Jacob,
aisati itsoncaquero itaaquero nampitsini.
- 8 Eiro poashinoncaimentanarotsi caari cameetsatatsi
yantayetiniri intacantajeitaquenaniri.
¡Nocoaque iointi pineshinoncatajena,
intsipaite ponijayenaro pinintanti,
pamitacojeitena, oshequi noashiretasanojeitaca!
- 9 Notasorentsite, oavisaacojeitanari. ¡Pamitacojeitena,
pojocaacoventajeitena aisati pimpeacojeitenaro;
tempa picameetsatasanoti!
- 10 Tecatsi oncantea incantashitea caari cameetsajeitatsi:
“¿Jaocame iriori Itasorentsite?”
Pishinejeitena noneajeitero pimpiacoventajeari
quemisantajeitimpiniri yoajeitaqueri;
iriojeiterota iriori pincatsatashijeitariri ijitasorentsiyetiri.

- 11 Pinquemeri icavintsaajeita yoiminqeeyetiri caravosoqui
yaventaquempi,
aisati poavisaacojeiteri pitasorencaqui icantacoventeetiri
iroyeeteri.
- 12 Notasorensite, pimpiatasanoteari,
oncarate 7 poashinoncaapinitiri yora notsipanampijeitari;
tempa aviro icantimataque.
- 13 Naintiquea naroeji pishanincatajari,
quempejeitariri povishate pishentiri.
Noncanteani nompasonquijeitempi.
¡Nompampoyeacotero cantacotimpiri: Picameetsati, maaroni osar
entsipeequi!

Tasorensi, pincavintsaasanojeitena, navisacojeitanteari.

- 80** ¹Aviro Tasorensi, shentiriri ishanincajeitaniri Israel,
pijivatiri ishanincapeeni José, piquempetari shentiriri ovisha.
Pitimimotiro ishiacantaro pinampirepee,
timatsiri ashitacoroqui Cajón jenioquiji, pinquemena,
- ² ¡Pishentasanoteri cameetsa ishanincapeeni Efraín, Benjamín jeri
Manasés!
¡Pishintsite, poavisaacojeitena pitasorencaqui!
- ³ Notasorensite,
pinquempetacantajena noquempetani peerani.
¡Pincavintsaasanojeitena navisacojeitantajeari!
- ⁴ Novincatsarite Tasorensi, mayetirori maaroni.
¿Jaoca oncarate pinquishimenter
iquenquetsatacaavetimpiri pishanincajeitajari?
- ⁵ Irointi pishinetaquena niraaca oquempetacaro noari,
aisati niraaquero nojaaqui oshequi.
- ⁶ Pishinetaqueri icantanajeitana notsipanampijeitari
aisati ishirontimentajeitana quisajeitanari.
- ⁷ Tasorensi, mayetirori maaroni,
¡pinquempetacantajena noquempetani peerani!
¡Pincavintsaasanojeitena navisacojeitantajeari!
- ⁸ Tempa paajeitajantana Egiptoqui
pitsoncajeitaqueri, pojocaqueri pincatsatashijeitariri
ijitasorensiyetiri,
Piquempetacantaquena pipanquitaquero ova,
- ⁹ Picaaraiteaquenero quipatsi, pipanquitantacarori,
otimantanacari ovaritsapee aisati acotsayetanaca maaroni
nampitsipeequi;
- ¹⁰ Omananaquero toncaaripee otsimancaiteayetanaquero,

- aisati ataiyetanaquero ojempequipeequi inchato antearoyetatsiri.
- 11 Aiquero ojatanaitiri ojempequipee irosati incajarequi,
aisati nijaqui Éufrates eereshiyetapaaque.
- 12 ¿Paitaquea pitireantacarori otantotacoro,
pishinetaqueri ijireayetaquero oitsoquipee quenayetatsiri
avotsiqui?
- 13 Yora quitairiqui itsatijayetaquero,
aisati itsoncasanotaquero poshinirepee coquiyetatsiri.
- 14 Tasorentsi, mayetirori maaroni, pimpiaje intsipaite;
pamenacoventero inquitequi, pinquenqueshiretacotero oca ova;
- 15 tempa avirotaque panquitaquerori,
aisati aviro eereshitacaaquerori.
- 16 Pintsonqueri piisancaqui yora pesayetirori aisati taayetirori.
- 17 Iro cantaincha pamitacoteri atiri picoyeaqueri
tempa aviro oaneaqueriri, aisati cantasanotaintsiri.
- 18 Eiro catsini nopeacojeitimpitsi ¡Poaneasanojeitena,
aisati apaniro nonquenquetsatacaajeitempi!
- 19 Notasorentsite, mayetirori maaroni,
¡pinquempetacantajena noquempetani peerani!
¡Pincavintsaasanojeitena navisacojeitantajeari!

**Icavintsanti Tasorentsi aisati caari cameetsatsi
yantayetaqueri ishanincajeitaniri Israel**

- 81** 1 ¡Pinquimoshireventeri Tasorentsi,
pimpampoyeajeiteneri yora ticaacoventajeiteeri!
¡Quimojenca pinquimoshirete pincantacoteri,
Icameetsati Itasorentsite Jacoboni!
- 2 Pimpampoyeantearo pantereta,
aisati cameetsajencatatsiri arpa jero salterio.
- 3 Pintiotasanotero tiorentsi irishoncapaajerica cashiri iroaquerari
aisati intsitivancaajearica;
tempa irotaque quitaiteri antearoite aquimoshireajeitantari.
- 4 Irotaque icantacantiri Itasorentsite Jacoboni,
icantaqueriri ishanincapeeni;
- 5 aisati icantasanotaqueri ishanincapeeni José,
yoashinoncantacariri Tasorentsi egiptosati.
Noquemaqueri neanataintsiri,
iro cantaincha te nioteriji, icanti:
- 6 “Noimpacaacoventajimpi pomerentsitimovetaquempiri;
aisati pashinoncaajeivetaca, pantaveetasanojeitaque catsini.
- 7 Opomerentsitimojeitantaquempiri paventasanojeitaquena,
noavisaacojeitantajimpiri;

ari nacanaquempi otimaquenta mencori tiireatsiri;
aisati noneantajeitaquempi pisaviquimotantapaacarori nijapee
Meribáquiniri.

- 8 Pinquemisantero noshanincajeitajari niotacayempiri.
¡Ariata pinquemisantajeitaquena!
- 9 Eiro itimimotimpitsi ijitasorensiyetiri pashinisatipee;
eiro pipincatsatashiyetaritsi.
- 10 Narotaque Tasorensisanori Pitasorensite, amajeitajimpiri Egiptoqui;
pincoacojeitenaro poyeari aitaque nompasanojeitaquempi.
- 11 Iro cantaincha yora noshanincajeivetajari
te incoajeiteji inquemena;
aisati te incoyeji inquemisantena.
- 12 Irotaque noshinetantacariri yantashiyetacaro icoacaashiyetacari,
oquempetimovetatacari ocameetsataque.
- 13 ¡Ario inquemisantajeitaquename, irimataquerome nocoacairiri,
14 aitaque nontsoncajeitaquerime intsipaite quisajeitiriri,
noashinoncaasanojeiterime irinti!”
- 15 Yora quisajeitiriri Tasorensi intiyeroashijeiterime,
intsaroasanojeitanaque,
incanteani iroashinoncaasanojeiteri.
- 16 Irintiquea ishanincajeitajari Tasorensi,
intasoncacoventerime ontimasanoteme tirico
cameetsatasanotatsiri iroyearime,
aisati ija pitsi irirapinijeiterime, eiro imiretajime.

Iriotaque Tasorensi cantacoventantatsiri maaroni

- 82** ¹Yora Tasorensi isavicaque ivincatsarimentoqui,
icarajeitaqueri tasorensiyevetachari, incantacoventanteariri.
- ²Icantaqueri: “¿Irosatimpa pincantea pincantacoventantashiyetea,
pintacoteari caari cameetsajeitatsi?”
- ³¡Cameetsa pincantacoventeri caari jocaacoventacha,
aisati camayetatsiri iriri, iriniro, ashinoncaincari jeri
coiteaveetatsiri!
- ⁴¡Poipacaacoventajeri caari jocaacoventajeitacha aisati
coiteaveetatsiri;
eiro yoashinoncantaritsi caari cameetsajeitatsi!
- ⁵Iro cantaincha te piojeiteji, aisati te pinquenqueshirempa.
Oquempetaca panijeitaque tsiteniriqui,
oquemmeta oniica quisotacairori quipatsi.
- ⁶Nocantimpi, avirojeitaque tasorensitatatsiri,
aisati avirojeitaque itomipee yora Inquitequiniri.
- ⁷Iro cantaincha pincamajeite, pinquempejiteari atiripee;

- pintsoncajeitea pinquempeteari pincatsari shintsinatantatsiri.”
 8 ¡Notasorensite, pimpoque pincantacoventeri savicajeitatsiri aca
 quipatsiqui;
 tempa aviro ashitariri maaroni atiripee!

Icoacotiri Tasorensi iramitacoteri

- 83** 1 Notasorensite, ¡eiro pimajeretashitatsi!
 ¡Eiro picatiashitatsi pineashitantenari!
 2 Pameneri quisajeitimpiri, oshequi iquisanentajeitaquempi,
 yapatotimentajeitaquempi intseencajeitimpi.
 3 Iquenqueshiretasanovetaro cameetsa
 iramatavitanteariri pishanincajeitajari,
 yora piticaacoventajeitiri.
 4 Iquenqueshiretaquero impoque intsoncajeitena,
 eiro notimantanajatsi aisati iroori nonampi. Te incoyeji
 inquenqueshiretacoheetajena
 aisati narojei ishanincajeitaniri Israel.
 5 Iquenquetsatacaavacaajeitaca irimanajeitempi:
 6-7 icarajeitaqueri ishanincapeeni Edom,
 jeri Ismael, oshanincajeitaniri Agar,
 aisati iriori ishanincapeeni savicayetatsiri Moab, Guebal, Amón,
 Amalec,
 jeri Filisteopee, savicajeitatsiri nampitsiqui Tiro;
 8 aisati yora neaperojeitachari asiriasatipee
 icarajeitaqueri ishanincapeeni Lot.
 9 Nocoaque pintsoncajeiteri pinquempetaqueri madiánasati,
 aisati piquempetaqueri Sísara jeri Jabín, anta nijateniqui Quisón,
 10 yora pitsoncajeitaqueri anta nampitsiqui Endor,
 ipeanaja quipatsi, iquempetanacaro itia virantsi.
 11 Aisati pintsoncajeiteri iratiritepee neaperojevetachari,
 piquempetaqueri Oreb, Zeeb aisati maaroni jivatacaajeitiriri;
 piquempetaqueri iriori Zeba jeri Salmuna,
 12 yora coajeivetachari irashitajearo noipatsite cameetsatsiri
 ipaqueri Tasorensi.
 13 Notasorensite, pincantashireacaajeiteri irovaraajeitanaqueata,
 inquempetearo cajarashi oarairo tampea,
 14 aisati pintsoncasanoteri
 oquempeta paamari otsonquiro otairo inchatomashipee.
 15 ¡Aitaque pincanteriri poijanatanakeri pitampearequi,
 poimishianteari antearoite tampea!
 16 Notasorensite, poashiventaasanoteri iraventantanaquempiri.
 17 ¡Incanteami impashiventasanotanaquea aisati incamajeite!

- 18 ¡Iriotanaqueta apaniro Pitasorentsitasanoti,
apaniro avirotaque Inquitequiniri pipincatsariventiro maaroni
quipatsi!

Icoasanotaque intime Inantariqui Tasorentsi

- 84** 1 ¡Notasorentsiste, mayetirori maaroni,
ocameetsatasanotaque Pancotsi Pinantari!
- 2 ¡Nocoasanotaque nontime oyaaraiteritequi Pivanco!
¡Noquimoshiretsanoti, nompampoyeacoventeri Tasorentsi
oaneantatsiri!
- 3 Aisati iriori choriquitepee jeri ashiivantipee itimi altariqui
pivancoquiniri,
aitaque imencoshitiriri irijanipee,
Novincatsarite Tasorentsi mayetirori maaroni.
- 4 ¡Inquimoshirejeite savicantarori Pivanco,
incanteani incantacotempi: Picameetsati!
- 5 ¡Inquimoshirejeite aventimpiri, pamitacotiri,
aisati coatsiri imponeashitearo areejiqui
irareetanteari toncaariqui otiminta Pivanco!
- 6 Ariorica iravisajeitanaquero oirincaiteapai ¡jiyeetiri Iraantsijenca,
aitaque itasoncaventajero Tasorentsi osotoanajea nija,
aisati omparianaje incani incajareyetanaje.
- 7 Incanteani irishintsitasanotanaje,
irosati irineasanotanteariri Tasorentsitasanoti inampiqui Sión.
- 8 Notasorentsiste, mayetirori maaroni,
avirotaque Itasorentsiste Jacoboni.
¡Pinquemisantero noquenquetsatacaimpiri!
- 9 Tasorentsi, ticaacoventanari,
pincavintsayeri yora picoyeaqueri pincatsaritatsineri.
- 10 ¡Ocameetsatasanoti nontime aparoni quitaiteri oyaaraiteritequi
Pivanco;
anaacotiro nosavique osamani saiteriqui!
Nocoasanotaque noshentapinitero ashitacoro Ivanco
Notasorentsiste,
anaacotiro nosavique itiminta antayetirori caari cameetsatsi.
- 11 Irio Tasorentsi iotacayeeri anquenqueshireanteari cameetsa
aisati iticaacoventee.
Yora Tasorentsi inintiri savicajeitatsiri cameetsa,
aisati inecameetsatiri caari timatsine irantane,
tecatsi intsaneapitsateari cameetsatsiri.
- 12 Notasorentsiste mayetirori maaroni. ¡Inquimoshirejeite shirejeitimpir
i!

Icantiri Tasorentsi iroavisaacotajeri aisati

- 85** ¹ Tasorentsi, pineshinoncatajiro piipatsite,
aisati poipiajeitajiri ishanincajeitaniri Jacoboni,
pisavicacaajeitajiri cameetsa;
- ² aisati pipeacotajaro maaroni caari cameetsatatsi yantajeivetacari,
- ³ ¡Pipitsimareasanotanaja, paacameetsatajiri piquisajeivetacari!
- ⁴ ¡Notasorentsite, oavisaacotanari,
poavisaacojeitena meeca,
eiro picantani pinquisajeitena!
- ⁵ ¿Irosatimpa pincanteani pinquisasanojeitena?
- ⁶ ¿Eirompa poaneajeitajanatsi inquimoshireventantajempiri
pishaninajeitajari?
- ⁷ Notasorentsite, ¡ponijaasanotenaro pinintasanojeitana,
aisati poavisaacojeitena!
- ⁸ Nonquemero incanteri Tasorentsi,
irineanatacoteri irisavicantajeari cameetsa ishanincatajari,
maaroni quemisantiriri,
eiroquea yapiitantajarotsi irantajero icoashiyevetacari.
- ⁹ Queario itimi Tasorentsi quempeji,
iroavisaacotanteariri pincatsatiriri;
ontimimotanteeri itasorenca aca quipatsiqui.
- ¹⁰ Yashi yoiro inintanti aisati ineanatiro queariotasanotatsiri,
irisavicacantajeitee cameetsa aisati incantacoventante
cameetsa.
- ¹¹ Ora queariotatsiri ontimasanote aca quipatsiqui,
aisati omponeaquea inquitequi incantacoventante.
- ¹² Iriotaque Tasorentsi oariyeenerone incani,
oshiocantayeteari avanquirepee ontimanteari oitsoqui.
- ¹³ Iriotaque cantacoventantatsiri cameetsa
aisati iotacantiro impocanteari.

Apaniro ini Tasorentsi

(Ivampoyeane David)

- 86** ¹ Notasorentsite, pinquemena,
Oshequi noashiretaca aisati nocoiteaveetaque.
- ² Pojocaacoventena, tempa noquemisantimpi.
¡Avirotaque Notasorentsite, poavisaacotena
narotaque quemisantimpiri, noshiretimpiri!
- ³ Notasorentsite pineshinoncatena,
avirotaque naventacari maaroni quitaiteripeequi.
- ⁴ Nocoaque piveshireacayena, narotaque quemisantimpiri;

- tempa avirotaque noquenquetsatacairi.
- 5 Oshequi picameetsati, pipeacotantiro caari cameetsatsati
aisati pinintasanotiri maaroni quenquetsatacaimpiri.
- 6 Notasorensite, pinquemena noquenquetsatacaimpi,
¡pamitacotena!
- 7 Ariorica opomerentsitimotana, naventaquempi,
ari pamitacotaquena.
- 8 ¡Tasorensi, tecatsi ijitasorensiyeevetari quempetempine!
¡Tecatsi mayeterone quempetarori pimayetiri!
- 9 Notasorensite, aviro vetsicajeitiriri maaroni atiripee;
irotaque impocashijeitantempiri impincatsatempi,
aisati incantacotempi: Picameetsati, Pitasorensitasanoti.
- 10 Tempa apaniro Pitasorensitasanoti;
¡pimatasanotiro caari ineapiniyeeti!
- 11 Notasorensite, poametasanotenaro picoacaanari,
nonquearioventantearori nonquemisantero.
Pimatacayena nonpincatsatempi.
- 12 Tasorensisanori Notasorensite, noncantacoshiretasanotempi:
Picameetsati,
aisati nocanteani noncantacotempi: Pitasorensitasanotaque.
- 13 ¡Oshequi catsini pinintasanotana!
¡Pojoacaoventaquena caari nocamanta!
- 14 Notasorensite, ipocashitana shemejeitatsiri
jeri oantatsiri, caari quenqueshiretimpi,
icoaque iroashinoncaajeitena iroantenari.
- 15 Iro cantaincha pathi poiro picavintsanti, aisati pineshinoncatanti,
te intsipaite pinquishea, pinintanti aisati piquearioventanti.
- 16 ¡Pamitacotena, pineshinoncatena!
¡Poavisaacotena, narotaque quemisantimpiri,
aisati pishintsitacayena!
- 17 Ponijaasanotenaro queario picavintsaasanotana;
ariorica irineaquero quisajeitanari, impashiventasanotanaquea.
¡Aviro, Tasorensi, amitacotenane aisati oimoshirenquenane!

Iveshireimentaro inampi Tasorensi

- 87** ¹ Ora inampi Tasorensi
aitaque otimiri toncaariqui cameetsatasanotatsiri,
inashitacaasanotacaró.
- 2 Inintasanotaquero catsini nampitsi Sión;
anaacotiro maaroni ivancopee ishanincajeitaniri Jacoboni.
- 3 Oshequi incantacotasanojeitero cameetsa atiripee inampi Tasorensi:
- 4 “Incarajeiteri iotanari savicayetatsiri nampitsipeequi:

- Egipto, Babilonia, Filistea, Tiro jero Etiopia;
 incantajeite: ‘Aitaque notimaqueri nampitsiqui Jerusalén.’ ”
- 5 Yora savicajeitatsiri nampitsiqui Sión incantajeite:
 “Aitaque notimajeitaqueri aca.”
 Aisati icantasanotaque iriori yora Inquitequiniri.
- 6 Yora Tasorentsi isanquenatacotaquero ivajiropee savicatsiri
 nampitsipeequi,
 icanti: “Iriojeitaque yoca timantacarori.”
- 7 Yora pampoyeajeitatsini aisati mijamijajeitachari incantajeite:
 “Irotaque nonampi, aitaque nosaviquimotempitiri.”

Tasorentsi, ¿paita pojocantaquenari?

- 88** 1 Novincatsarite Tasorentsi, oavisaacotanari,
 nocantani quitaiteripeequi aisati tsiteniripeequi naventimpi,
 pamitacotena.
- 2 ¡Pinquemero noquenquetsatacainpiri,
 pimpenaro nocoacotimpiri!
- 3 Oshequi opomerentsitimotaquena, irotaintsi noncame,
 4 noncaratanteariri camayetaintsiri, te noshintsitanajeji;
- 5 Yojoqueetaquena itimayetinta camincaripee;
 noquempetacari camaintsiri imanata, aisati itijeetiri.
 Noquempetacari peainchari, caari pojocaacoventi, aisati
 pipeacotanaqueri.
- 6 Pojocaquena omoroqui jatatsiri tsompoinaqui tsitenishaatsiri.
- 7 Piquisanotaquena catsini, poashinoncaaquena
 oquempetaca poaquena tsompoijaqui otavoncaarequi.
- 8 Pishinetaqueri yora notsipavintsataniri yojocanaquena,
 te iramavetacojeitajena.
 Noquempetacari yominqueetiri caravosoqui,
 caari matacha irishiaje.
- 9 Irointi niraapinitaca, maviteajatanaquena.
 ¡Maaroni quitaiteripeequi naventimpi aisati novanquiro naco!
- 10 ¿Ariompa pimataquero pinijaayeteri camaintsiri caari ineapiniyeeti?
 ¿Ariompa irimatajero camaintsiri impasonquitempi?
- 11 ¿Ariompa inquenquetsatacotajero queariotatsiri aisati pinintanti
 anta itijacanta camayetaintsiri?
- 12 Anta otsitenitanasotinta, aitaque maaroni ipeacoyeetarori;
 ¿timatsimpa iotacotajerone picameetsati
 aisati pantayetiri caari ineapiniyeeti?
- 13 Iro cantaincha, Novincatsarite, naventimpi,
 ariorica oquitaiteamani noquenquetsatacainpi.
- 14 Notasorentsite, ¿paita pojocantanari?

¿Paita pimanapitsatantanari?

- 15 Ainiroquera nevancaritapaini, nashinoncaapinitaca,
irovetaincha noncameme.
Iro cantaincha namavetaquero covencayevetachari
pitiancacoventaquenari,
meeca te nomatajero.
- 16 Oshequi piquisasanotaca avishimotaquena covencatatsiri,
anaacotanaquena;
- 17 picantani poashinoncaasantaquena maaroni quitaiteripeequi,
oquempetacaró ovoncanaca nija anaanaquena.
- 18 Pishinetaquena yojocanaquena noshanincapee aisati
notsipavintsataniri,
irointi meeca notsipataca tsitenishaari.

Icashiacairiri Tasorentsi David

- 89** ¹ Novincatsarite, noncanteani noncante novampoyeanequi:
“Avirotaque cameetsatasanotatsiri.”
Noncanteani nonquenquetsatacotempi,
avirotaque queariotasanotatsiri.
- ² Noncamantacotempi picantaitatiani pinintanti,
piquearioventiro te pimpashiniyero;
piquempetacaró inquite ocantani otimi.
- ³ Picaratasantaqueri David, yora picoyeane quemisantimpiri,
picantasanotaqueri:
- ⁴ “Naro pincatsaritacayerine pishanicajeitajeari
incanteani impoyetajempi”
- ⁵ Novincatsarite, maaroni pinampirepee inquitequiniri icantacotimpi
piqueariotasanoti,
aisati pimayetaquero caari ineapiniyeeti.
- ⁶ ¡Tasorentsi, tecatsi jitasorentsitatsiri
timatsiri inquitequi quempetempineri!
- ⁷ Pitasorentsitasantaquere catsini, ipincatsayeetiri,
ishoncaquempi pinampirepee inquitequi.
- ⁸ Novincatsarite Tasorentsi, mayetirori maaroni,
apaniro otimimotimpi pitasorenca aisati queariotatsiri.
¡Tecatsi catsini moncaratempine!
- ⁹ Panaacotiro incajare quisaajavetachari,
aisati poimajerentiro otavoncaajare.
- ¹⁰ Poimpiaqueri covencayevetachari incajaresati,
pinquempetacantaqueri camatsiri.
Povaraajeitaqueri pitasorencaqui quisajeivetaquempiri.
- ¹¹ Ora inquite aisati quipatsi irotaque pashi,

- pivetsicayetaqueri maaroni timantayetarori.
- 12 Aisati pinashitacaacaro quirinca jero catonco,
ora toncaaripee Tabor jero Hermón
opampoyeajeiti oquimoshireventasanimpi.
- 13 Pishintsitsanoti aisati panaacotasannotanti,
oquempetaca otimi pijempequi pishintsitantari, aisati pacosanori.
- 14 Picantatiani pipincatsariventanti picantacoventanti
tampatica pimataquero pinintanti, aisati piquearioventanti.
- 15 Notasorensite, iveshireajeita pishanincatajari,
iotatsiri icantacotimpi cameetsa, inquimoshireventempi,
isavicajeiti cameetsa, icarajeitimpi.
- 16 Icantani iquimoshireventasanojeitimpi,
aisati iveshireimentaro piquearioventiri.
- 17 Queariotaque aviro shintsitacairiri, pimatacairi yanaacotanti;
tempa pineshinoncatasanotana,
aiquero pishintsitacaasanojeitanari.
- 18 ¡Iriotaque Atasorensite jocaacoventeerí!
¡Yora iquemisantiri Israel, iriotaque Avincatsarite
cameetsatasanotatsiri!
- 19 Peerani pinijantaca pineanataque
picantaqueri quemisantasanoyetimpiri quearioventimpiri:
“Nocoyeaqueri aparoni neaperotachari, noshanincatajari,
namitacotaqueri yanaacojeitiri itsipapee ipincatsariventanti.
- 20 ¡Iriotaque David, quemisantaquenari, nonashitacaacari.
Nosainatacantaqueri quejitsi cameetsajatatsiri,
ipincatsaritantacari!
- 21 Tecatsi coiteimotearine noncanteani namitacoteri.
¡Narotaque matacayerine, noshintsitacayeri!
- 22 Eiro imatiritsi quisajeitiriri irimanajeivetaririca,
aisati eiro yanaacojeitiritsi caari cameetsajeitatsi.
- 23 Nanaacoteri quisajeitiriri, ¡Eiro itimajeitanajitsi!
Nontsoncajeiteri maaroni tseenquiriri.
- 24 Noncanteani nonintasanoteri aisati nonquearioventeri,
aisati nomatacayeri impincatsaritasanote.
- 25 Nomatacayeri impincatsariventero iipatsite
omponeanaquea incajarequi Mediterráneo
irosati nijaqui Éufrates.
- 26 Incantena: ‘Avirotaque Apa, Notasorensite,
oavisaacotanari aisati jocaacoventanari.’
- 27 Aisati nonquempetacanteri notomi jivatatsiri itimi;
iriotaque pincatsariventerine pincatsariyevetachari
quipatsipeequi.

- 28 Noncanteani nonintasanoteri, noncaratapiniteri,
nomoncarateneri nocantasanotaqueri.
- 29 Yora irishanincajeitajeari iriori incanteani impincatsarite,
ainiroquera otimi inquite.
- 30 Irompa irojocanajerorica noameyevetacariri,
aisati eirorica imatiro nocantacantiriri,
- 31 aisati impeacotanajearorica nocantacantayevetari,
eirorica iquemisantiro nocoacairiri;
- 32 ari noasanquetaimentaqueri ipiatsatata,
aisati noashinoncaimeneri caari cameetsatsi yantayetiri.
- 33 Iro cantaincha, eiro nojoquiritsi David,
noncanteani nonintasanoteri, quiso noyeri.
- 34 Eiro nopeacotarotsi noncarateri,
aisati eiro opeatsi noneanataqueri.
- 35 Tempa nocantasanotaque: ‘Nocameetsatasanotaque:
Eiro namatavitiritsi:
- 36 yora irishanincajeitajeari coajicani,
iriotaque poyeetajearine incanteani impincatsarite,
ainiroquera itimi catsirincaiteri,
- 37 aisati incanteani impincatsarite iquempeta itimi cashiri,
aisati ainiroquera otimi inquite.’ ”
- 38 Iro cantaincha, pojocaqueri pincatsari picoyeavetacari.
¡Piquisaqueri!
- 39 Pipeaqueri picaravetacari quemisantimpiri;
te pincoacayeri impincatsaritaje.
- 40 Pishinecoventaqueri iporoqueetaqueri otantotacoyevetaniri
nampitsipee
aisati piporocacantasanotaqueri maaroni.
- 41 Maaroni avisayetatsiri iqueajeitaque icoshiti,
aisati yaayetaqueri paitapeerica.
Yora saviquimojeitiriri ishirontimentari.
- 42 Pishinetaqueri quisajeitiriri yoancajeitiro iraco,
iquimoshireventajeitiro yanaacotantaque.
- 43 Poveapitsataqueri otsampitini isataamento,
aisati te pamitacoteriji irimanatanteari.
- 44 Te pishinetajeri impincatsaritaje, aisati eiro ipincatsariventantaji;
- 45 te pishineteri iraneasanote osamani,
irointi poashiventaasanotaqueri.
- 46 Tasorentsi, ¿Jaoca oncarate pimpeacotajearo pimanapitsatana?
¿Pincanteanimpa pinquishea, pinquempetearo paamari?
- 47 Novincatsarite, pinquenqueshiretero eiro osamanititsi nanee;
aisati iquempeta atiripee povetsicajeitakeri, yanei capichaji.

- 48 ¡Tecatsi materone iraneasanote, eiro icamitsi catsini!
Aisati ¡tecatsi matachane irojacaoventea irisati, eiro
icamantatsi!
- 49 Novincatsarite, ¿paita caari pinintasanotantajari David
piquempetiri iroaquerani peerani
piquearioventaquero picantasanotaquerini?
- 50 Novincatsarite, pinquenqueshiretajeri quemisantajeitimpiri.
Oshequi atiri icantimataqueri;
iro cantaincha namavetaquero.
- 51 Notasorents site aitaque icantapinijeitaquenari quisajeitimpiri,
aitaque icantapinitaqueriri picoyeaqueri.
- 52 Notasorents site, picantani picameetsatatanotaque.
¡Aitaque oncanteari!

Icantatiani itimi Tasorents irinti atiri, te inquisote

(Ivampoyeane Moisesi)

- 90** 1 ¡Notasorents site, avirotaque jocaacoventanari peerani irosati
meca!
- 2 Pitimitani tequerani povetsiquero toncaaripee aisati tequera
ontimene quipatsi;
peerani catsini, irosati coajica avirotaque Tasorents i.
- 3 Pipeiri atiri impianajea quipatsivane, ariorica pincante:
“Pimpeanajea quipatsivane, tempa aviro atiri.”
- 4 Queario ora caratatsiri mil osarentsipee,
oquempetimotaquempi aparo quitaiteri avisanaintsiri oshaiteji;
aisati oquempetaro avisanaque aparo tsiteniri.
- 5 Paajeitiri atiripee shintsi,
iquempetacaro mishiveerentsi avishitachari,
- 6 aisati iquempetacaro tojari iroaquera shiocatsi;
ariorica onquitaiteamane, otequireaveta cameetsa.
Iro cantaincha ishaavijitanajerica oshimpeshitanaje, oncamanaje.
- 7 Queariotaque ora piisanca otsoncana oimintsaroajeitana.
- 8 Piotasanotaquero nantayetiri caari cameetsatatsi,
tecatsi manimotempine.
- 9 Queariotaque ontsoncajeitena piisanca;
eiro osamaniti nontimajeite, oquempetacaro nanenqui.
- 10 Ocarati 70 nosarents site naneajeiti,
yora shintsitasanotatsiri, oncarate 80 irosarents site.
Iro cantaincha nonquimoshireventavetearo naneantari,
oshequi ashireena antaveerentsi.
Ora osarentsipee intsipaite avishi, aitaque aquempejeitarori.
- 11 ¿Jaanica iotirori oashinoncanti piisanca?

- ¿Jaanica iotirori pitsimaasanota?
 12 Poametasanojeitena jaoca oncarate nanee,
 nomatantearori niotero iotantsi, nosavicanteari cameetsa.
 13 ¿Notasorents site, pinquenqueshireacojeitajena!
 ¿Jaoca oncarate poisamaninqueero?
 ¿Pineshinoncajeitajena, naroei quemisantajeitimpiri!
 14 Ariorica onquitaiteamanaje, piotacaajeitena pinintana,
 irosati nonquimoshireantanajea,
 nonpampoyeacoventempi noncantaitatiyempani.
 15 Pinquimoshiretacaajena maaroni, osarentsipeequi,
 onquempetajeero peerani nashinoncaajeivetaca.
 16 ¿Ponijaajeiteri quemisantajeitimpiri aisati iriori irishanincajeitajeari,
 irineajeiterota pimayetiri aisati pitasorenca!
 17 Irio Atasorents site cavintsaanojeiteene.
 ¿Pintasoncacoventenaro nantayetiri,
 aitaque pimataquero!

Iriotaque Tasorentsi aventapinijeiteari

- 91** ¹Yora aventariri Tasorentsi Inquitequiniri,
 mayetirori maaroni, irojacaacoventeri,
² icantiri: “¿Avirotaque Notasorents site ticaacoventanari,
 noshiretasanotari!”
³ Iriotaque apaniro jocaacoventempine pomerentsitimotimpiri caari
 conijatatsi
 aisati mantsiarentsi oamantatsiri.
⁴ Yamenacoventempi pisavicanteari cameetsa,
 oquempeta teapa osatetari orijani.
 Incanteani irojacaacoventempi oquempeta ashiromeronta.
⁵ Eiro pitsaroacaajeitarotsi covencayetatsiri mapocajeivetempine
 tsiteniriqui,
 aisati chacopipee imanayeetiri quitaiteriqui,
⁶ aisati oashinoncantsi avishimojeitempine tsiteniripeequi;
 aisati tsonquempine catsirincaiteriqui.
⁷ Omavetea intimimotoempi oshequi camajeitatsineri jaocapeerica,
 iro cantaincha avinti tecatsi oajeitempine.
⁸ Irointi pamenacotashiteari, pineeri caari cameetsajeitatsi
 iroashinoncaimentayeeteri yantaqueri.
⁹ Pimataquero paventacari Tasorentsi Inquitequiniri
 jocaacoventimpiri, aisati ticaacoventimpiri,
¹⁰ eiro catsini omapoquimpitsi oashinoncantsi,
 aisati eiro areetatsi mantsiarentsi pivancoqui.
¹¹ Tempa intianquempiri Tasorentsi inampirepee

- inquempoyeacoventempi jaocapeerica pijayeri.
 12 Aisati inquempoyeacoventempi, irancatsatavajempi,
 eiroquea pitsitincatarotsi mapi.
 13 Pinquenimojeiveteari anteariite maniti,
 jeri covencatatsiri, aisati quempiropee.
 14 Icanti Tasorentsi: “Novisaacoteri, tecatsi areetacotearine maaroni,
 tempa inintasanotana, aisati iotasanotana.
 15 Ariorica iraventena namitacoteri,
 noncanteani quiso noyeri;
 nojocaacoventeri pomerentsitimotearine,
 nomatacaasanoteri impincatsariventante.
 16 Noaneasanoteri osamani intime,
 ¡aisati iroveshireimentasanotearo novisaacotajiri!”

Ipampoyeacoventiri Tasorentsi

- 92** ¹ Tasorentsi Inquitequiniri, ocameetsati nompasonquitempi
 aisati nompampoyempiro pampoyeantsi, nompincatatempi.
² Nonquenquetsatacotamanempi aisati ontsitenitanajerica;
 tempa piquearioventiro pinintasanotanti.
³ Nompampoyeantearo poimajencatatsiri
 yoveetsiquetiri arpa jero salterio cameetsajencatatsiri.
⁴ Notasorentsite, poimoshirencantasanotanaro maaroni pantayetiri;
 noquimoshireventiro maaroni pimayetaqueri.
⁵ ¡Antearoite catsini pimatasanoyetiri
 aisati ompomerentsitimotana nontsoteero piquenqueshiretiri!
⁶ ¡Iriniquea caari ojojeitatsi, eiro imatirotsi iriotacotero!
⁷ Ariorica iroshequiajeivetea caari cameetsajeitatsi,
 inquempetearo tojari, aisati irashitaarantavetea,
 iro cantaincha intsoncasanojeitea incantaitatiyempani.
⁸ Irompa avinti Notasorentsite,
 pincanteani pintime anta inquitequi.
⁹ Notasorentsite, queariotasanotaque pintsoncajeitajeri quisajeitimpiri,
 aisati caari cameetsajeitatsi povaraajeiteri jaocapeerica.
¹⁰ Naintiquea aiqero pishintsitacaasanotenari,
 oquempeta ishintsiti vaca,
 aisati pisaitantenaro casancajari noitoqui.
¹¹ Noneeri quisajeitanari oquempetaca ipariaque,
 aisati nonquemero incavintsaajeita caari cameetsajeitatsi.
¹² Irintiquea cameetsajeitatsiri, incanteani iraneasanojeiti
 inquempetearo compiroshipee,
 aisati inquempetearo santaripee timatsiri otishiqui Líbano.
¹³ Aisati panquitachari Ivancoqui Tasorentsi,

teaquitatsiri oyearaiteritequi Inantari Atasorensite.

14 Ompeesatovetanaquea, irosati oitsoquite
aisati irosati oncantea eereshite.

15 Oncamantacoteri yora Tasorensi
iriotaque jocaacoventanari itampaticatasanoti,
te otimimoteriji amatavitantsi.

Iriotaque Tasorensi pincatsarisanori

93 1 ¡Iriotaque Tasorensi pincatsaritanotatsiri!
¡Icantani Itasorensitasanoti aisati ipincatsaritanoti!
Oquempetaca iquitsaatacaro marereamaotatsiri, aisati
oshoncacari itasorenca.

Iriotaque quisotacaaquerori quipatsi, eiro oshevatanta.

2 Peerani, pintantacarori maaroni, irosati picanta pipincatsariti,
jirosati picantani, pitimi!

3 Notasorensite, ora nijapee oquisaajata,
antearo otavoncaajare,

4 iro cantaincha anta jenoqui aviro mayetirori maaroni.
Panaacotasantiro opoimaajaveta incajarepee aisati
otavoncaajare.

5 Notasorensite, ora picantacantiri oqueariotasanoaque.
¡Ocameetsatasanoti Pinantari,
irotaque oanenquirori Pivanco, oncanteani!

Iriotaque Tasorensi cantacoventiriri atiripee

94 1 ¡Ponijantea, Novincatsarite,
aviro Tasorensi piacoventantachari!
2 Avirotaque cantacoventiriri atiripee;
¡pimplateari shemejeitatsiri, poashinoncaimentajeiteri yantayetiri!
3 Notasorensite, ¿jaoca oncarate irojocajero inquimoshirejeite caari
cameetsajeitatsi?

4 Maaroni caari cameetsajeitatsi
iriojeitaque neanatincari, shemetincari,
iriojeitaque jitacantachari irioperotaque.

5 Notasorensite, itsoncaqueri pishanincajeitajari,
¡yoashinoncaajeitaqueri pashitajari!

6 Yoajeitaquero camajimentaaroopee aisati pashinisatipee atiri
jeri jananequipee camayetatsiri iriri, iriniro.

7 Tempa icantajeiti: “Yora Tasorensi iquemisantajeitiri
ishanincajeitaniri Jacoboni,
te irinee aisati te inquenqueshireacojeiteriji.”

8 ¡Pinquemajeitena atiripee caari iojeitatsi!

- ¿Jaoca oncarate piojeitero?
 9 ¿Pijitimpa eiro iquemitsi Tasorentsi?
 tempa irio vetsicaquerori aquemantari.
 ¿Pijitimpa eiro ineitsi?
 tempa iriotaque vetsicaquerori aqui.
 10 ¿Pijitaquempa avirori eiro yoasanquetaimpitsi?
 Tempa iriotaque oametiriri atiripee.
 ¿Pijitaquempa eiro iotirotsi?
 Tempa iriotaque oamejeitiriri atiripee iotantsi.
 11 Yora Tasorentsi iotiri atiri,
 apatiro iquenqueshireashiyetaro caari queariotatsi.
 12 Notasorentsite, iquimoshireti yora poametasanotiri,
 aisati piotacaasanotiri picantacantiri.
 13 Pimatanteari irisavique cameetsa,
 ariorica ompomerentsitimoveteari paitapeerica.
 Irintiquea antayetirori caari cameetsatsi
 inqueecashiteri intijanteariri.
 14 Yora Tasorentsi, eiro yojoquiritsi ishanincajeitajari,
 incanteani quiso iroajeiteri yashijeitajari.
 15 Aisati incantacoventajeri cameetsa icantacoventantapinitinta,
 aisati yora cameetsajeitatsiri irimajeitajero iriori.
 16 ¿Jaanica piacoventenane
 irimanataquenarica caari cameetsajeitatsi?
 17 Eirorica yamitacotaname Tasorentsi,
 aitaque noncamitaqueame.
 18 Iro cantaincha noneantacari irotaintsi nompariye, naventaquempi,
 irosati pamitacotantaquena, tempa pinintasanotana.
 19 Ariorica opoquimotana noquenqueshireyetro pomerentsitimotanari,
 aviro oimoshirencanari aisati quimoshiretacaanari.
 20 Eiro pimatirotsi pincarateri caari cantacoventantatsi cameetsa,
 yora antirori caari cameetsatsi,
 aisati caari moncaratiro picantacantiri;
 21 yora quenquetsatacavacaachari iroanteariri
 caari timatsine irantane aisati cameetsatsi.
 22 Iro cantaincha, yora Tasorentsi iriotaque jocaacoventanari;
 iquempetacaro imperita notsititari.
 23 Iriotaque shineterineri caari cameetsajeitatsi ontsoncajeitajeri irantane.
 ¡Iriotaque Atasorentsite tsoncajeitajerine!

Ampampoyeacoventasanoteri Tasorentsi

95 1 Pimpocajeite, anquimoshirejeite, ampampoyeacoventeri
 Tasorentsi;

- ampampoyeeneri jocaacoventaqueeri aisati oavisaacotaqueeri.
- 2 Tsame anqueajeitanaque Ivancoqui, ampasonquijeiteri
aisati ampampoyeacoventeri pampoyeantsi, ampincatsajeiteri.
- 3 Tempa iriotaque Tasorentsitasanotatsiri,
pincatsariventasanotiriri maaroni tasorentsiyevetachari.
- 4 Icantani yamenacoventiro maaroni otsompoinarequi quipatsi
aisati iriotaque ashitarori otishipee antearoyetatsiri.
- 5 Ora incajare irotaque irashi;
iriotaque vetsicaquerori quipatsi pirijapatsari.
- 6 Pimpocajeite, tsame antiyeroajeitea ampincatsajeiteri Tasorentsi;
antiyeroimentajeiteari Avincatsarite, tempa iriotaque
vetsicajeitaqueeri.
- 7 Iriotaque Atasorentsita, aisati arojeitaque ishanincajeitajari;
iquempetacantajeitaquee irovishatepee.
¡Pinquemajeitero meeca icantempiri:
- 8 “Eiro piquisoshirejeititsi piquempetacantacari anta Meribáqui;
aisati Masaahui anta caaraiteriqui.
- 9 Ineantaquena intacantajeitaquempirini
ineajeivetacaró nomayetaqueri.
- 10 Ocarataque 40 osarentsi noquisajeitaqueri pishanincapeeni.
Nocanti: ‘Yoca atiripee yantashiyetanacaró icoacaashiyetari,
te inquemisanteroji nocantacantiri!’
- 11 Irotaque noquisasanotantacariri, nocantasanotaqueri:
‘¡Eiro meeca pareejeitaro quipatsi
nosavicacantempinemerí cameetsa!’ ”

Ampampoyeaventeriri Tasorentsi iroaquerari pampoyeantsi
(1 Crón. 16.23-33)

- 96** 1 Pimpampoyeaventajeiteri Tasorentsi iroaquerari pampoyeantsi.
Pimpampoyeaventeriri Tasorentsi
maaroni savicayetatsiri quipatsipeequi.
- 2 Pimpampoyeaventeriri Tasorentsi, pincantacoteri: Icameetsati;
pinquenquetsatacotapiniteri quitaiteripeequi
yoavisaacojeitaquempi.
- 3 Pincamantajeiteri maaroni savicayetatsiri nampitsipeequi,
Itasorentsitasanotaque imayetaquero caari inepiniyeeti.
- 4 Itasorentsitasanoti, ocameetsati incantacoyeeteri: Icameetsati.
Ipincatsatanoyeetiri, ¡yanaacotiri tasorentsiyevetachari!
- 5 Yora ijitasorentsiyevetari pashinisatipee atiri, tecatsi irimate,
irintiquea Tasorentsisanori, iriotaque vetsicaquerori inquite.
- 6 ¡Ishipaquireasanotaque catsini isaviquinta!
¡Ainiro itasorenca aisati cameetsatasanotaque anta Inantariqui!

- 7 Pimpincatsateri Tasorentsi maaroni savicayetatsiri nampitsipeequi.
Pimpincatsatero itasorenca aisati icameetsatasanotaque.
- 8 Pimpincatsatasanojeiteri; tempa irotaque icoacaaquempiri,
Pinueajeitero oyaaraiteritequi inantapinitari,
pamajeitaque timimotimpiri pimpashiteariri.
- 9 Pimpincatsateri Tasorentsi anta Inantariqui cameetsatasanotatsiri;
Oameetsati impionquimojeiteari maaroni atiripee.
- 10 Picantajeiteri nampitsipeequiniri:
“¡Iriotaque Tasorentsi Pincatsarisanori!”
Iriotaque quisotacaaquerori quipatsi caari oshevatanta;
¡Cameetsa ipincatsariventiri nampitsipeequiniri,
te irinashitacaaajeiteariji!
- 11 ¡Inquimoshirejeiteta timayetatsiri inquitequi aisati quipatsiqui!
¡Onquisaaateata incajare,
aisati maaroni timantajeitarori!
- 12 ¡Onquimoshireyeteta oantsipee
aisati maaroni timantajeitarori!
¡Ompoimajeiteta timayetatsiri inchatomashiqui,
onquimoshireventeri Avincatsarite pocatsineri!
- 13 ¡Jee, aitaque impocaque impincatsariventeri
maaroni atiri savicantajeitarori quipatsi.
Incantacoventeri cameetsa,
tecatsi irinashitacayea!

Ipincatsaritasanoti Tasorentsi

- 97** 1 ¡Pinquimoshirejeite maaroni quipatsisatipee!
¡Pinquimoshirejeite savicayetatsiri ovoyeshipeequi!
¡Iriotaque Tasorentsi Pincatsarisanori!
- 2 Imanaca mencoriqui tsitenishaatanotatsiri
oshoncacaro ivincatsarimento;
cameetsa ipincatsariventanti,
aisati icantacoventanti tampatica.
- 3 Ojivataqueri paamaritatsiri,
otsoncaqueri shoncajeivetacariri quisajeitiriri.
- 4 Yora porecatsiri itsoteiro quipatsi, iquitaiteacotiro,
¡ariorica iporequi, onica!
- 5 Ora toncaaripee otarancayeti,
oquempetacari icanteetiri cera,
ariorica inquempejite Tasorentsi;
tempa iriotaque ashitarori maaroni quipatsi.
- 6 Maaroni timajeitatsiri inquitequi
iotacaajeitee cameetsa icantacoventanti Tasorentsi;

- maaroni atiripee ineajeitaquero itasorenca.
 7 Iroashiventaajeiteri maaroni pincatsatashiyetariri
 ijitatasorensiyetiri, aisati shemetimentiriri.
 ¡Maaroni tasorensiyevetachari impincatsateri irinti Tasorensi!
 8 Notasorensite, oshequi iquimoshireventaquero picantacantiri
 savicajeitatsiri nampitsiqui Sión,
 aisati savicayetatsiri inampipeequi Judá.
 9 Tempa avirotaque Tasorensi Inquitequiniri,
 pincatsariventirori maaroni quipatsi,
 panaacotasantotiri catsini tasorensiyeevetachari.
 10 Yora Tasorensi inintasanotiri
 caari ninterone catsini caari cameetsatatsi;
 iquempoyeacoventiri maaroni quemisantatsiri,
 eiro ishinecoventiritsi iroyeri caari cameetsajeitatsi.
 11 Ineshinoncatiri Tasorensi cameetsajeitatsiri,
 iquempetacaro tsioronsi;
 iriotaque veshireacaariri atiri savicatsiri cameetsa.
 12 ¡Maaroni cameetsajeitatsiri pinquimoshireventasanojeiteri
 Tasorensi,
 aisati pincantacoteri, icameetsatasanoti!

Yanaacotasantantaque Tasorensi

- 98** 1 Pimpampoyeeneri Tasorensi oaquerari pampoyeantsi.
 ¡Tempa imataquero caari ineapiniyeeti!
 ¡Yanaacotantaque itasorencaqui cameetsatasanotatsiri!
 2 Yora Tasorensi iotacaaqueri atiripee yanaacotantaque,
 yoashinoncaimentaqueri quishiriri yantajeitaqueri;
 ineajeitaquero maaroni atiripee.
 3 Icantani Tasorensi inintajeitaqueri ishanincajeitaniri Israel,
 aisati iquearioventaqueneri icantasanotaqueriri.
 ¡Yora savicayetatsiri ovecaratapaaca quipatsi
 ineajeitaquero yanaacotantaque Atasorensite!
 4 Maaroni atiripee quipatsiquiniri,
 pinquimoshirejeite, pimpampoyeacoventajeiteri Tasorensi;
 ¡Pinquimoshireventasanojeiteri catsini,
 pimpampoyeneri pampoyeantsipee!
 5 Pimpampoyeeneri Tasorensi pampoyeantsi arpaqui
 aisati otsipapee cameetsajencatatsiri.
 6 Pimpampoyeeneri pinquimoshireventeri Tasorensi Pincatsarisanori,
 pimpampoyeacoventanteari tiorentsipee.
 7 Ocameetsati onquisajatea incajare
 aisati maaroni timantayetarori,

- jero quipatsi aisati savicantayetarori;
 8 aisati onquimoshireventeri nijatenipee
 oncarajeitero toncaaripee
 9 onquimoshireventasanoteri Tasorentsi,
 pocatsineri quipatsiqui impincatsariventante.
 Impincatsariventasanoteri cameetsa atiripee,
 eiro inashitacaajeitaritsi.

Ipincatsaritasanoti Tasorentsi yanaacotiri pincatsariyevetachari

- 99** 1 ¡Iriotaque Tasorentsi Pincatsarisanori!
 Itimimoto jenioquiji ishiacantaro inampirepee
 timatsiri ashitacoroqui Cajón.
 Ocameetsati impincatsajeiteri atiripee,
 aisati oniquea quipatsi.
 2 Iriotaque Tasorentsi pincatsariventirori nampitsi Sión
 toncaariquiniri;
 ipincatsariventiri maaroni atiripee.
 3 Ocameetsati incantacoyeeteri: Icameetsati Tasorentsisanori,
 aisati ipincatsayeetiri.
 ¡Icameetsatasanoti Tasorentsi!
 4 Avirotaque Pincatsarisanori, mayetirori maaroni
 pinintasanotiri antirori tampaticatatsiri;
 Avirotaque oametiriri iquempeavacaajeitantari.
 Paacameetsataqueri ishanincapee Jacoboni,
 tampatica picantacoventaqueri.
 5 ¡Pincantacoteri: Icameetsati Atasorentsite
 aisati pintiyeroimentajeitari, pimpincatsatasanoteri!
 ¡Icameetsatasanoti Tasorentsi!
 6 Yora Moieshini jeri Aaróni icarajeitiri quemisantiriri
 Tasorentsi;
 irioquea Samuel icarajeitaqueri cantacojeitiriri: Icameetsati.
 Ariorica yaventari, yamitacotiri.
 7 Iquenquetsatacantacariri Tasorentsi anta mencoriqui,
 imoncarajeitaquero Icantacantiri.
 8 Novincatsarite Tasorentsi, piquemaquerini, pamitacotaqueri;
 tempa pipeacojeitaqueneri caari cameetsatatsi yantajeitaqueri.
 Iro cantaincha aisati poashinoncaimentajeitaqueri
 yantayetaqueri.
 9 Pincantacoteri: Icameetsati Atasorentsite,
 ¡pintiyeroimenteari anta ivancoqui
 timatsiri toncaariqui cameetsatatsiri!
 ¡Icameetsasanaotaque Atasorentsite!

Yovetsicajeitaquee Tasorentsi aisati yashijeitaquee

- 100** ¹ ¡Maaroni savicatsiri quipatsipeequi,
pinquimoshireventajeiteri, pimpampoyeaventeri Tasorentsi!
² Pinquimoshirejeite pimpincatsateri, Tasorentsi.
¡Pimpocashijeiteri, quimojenca piveshireimentasanojeiteari!
³ Piotasanoteri Avincatsarite, iriotaque Tasorentsi;
yovetsicajeitaquee, aisati yashijeitaquee.
¡Arojeitaque ishaninca yashitajari,
iquempetacantaquee ovishapee,
ishentajeitee!
⁴ Pimpocajeite ashitacoroqui, Ivanco,
pimpampoyeajeitapeero pampoyeantsi cantacotiriri:
Icameetsati.
Pinqueajeitapee oyaaraiteritequi.
¡Pimpasonquijeiteri! ¡Pincantajeite icameetsatasanotaque!
⁵ Tempa icameetsatasanotaque Tasorentsi,
icantani inintasanojeitaquee.
Icantaitatiani iquearioventiro icantasanojeitaqueeeri.

Icashiaacaqueriri pincatsari Tasorentsi

(Ivampoyeane David)

- 101** ¹ Nocoaque noncantacotero pinintanti,
aisati picantacoventanti cameetsa.
Nocoaque Tasorentsi, nompampoyempiro pampoyeantsi;
² Nocoaque nosavique cameetsa. ¿Jaoca oncarate pimpocashitena?
Nosavique cameetsa, eiro otimitsi nantane,
aisati onquempetea anta novincatsarimentoqui,
³ eiro catsini noquenqueshiretirotsi nompiatsatea.
Noquisaqueri antayetirori yora jocaquerori iquemisantiri
Tasorentsi, aisati ¡te noncoyeji inquempejitena!
⁴ Eiro noquenqueshiretirotsi narori nompiatsatea;
te noncoyeji catsini nantero caari cameetsatatsi.
⁵ Noimajerenteri manacaarori icantimatiri itsipanampitari;
¡te namavetero ineanatashiyetari shemetatsiri!
⁶ Noneacameetsatiri quemisantasanotimpiri,
iriotaque saviquimotenaneri;
apaniro irantaveetena coasanotatsiri intime cameetsa.
⁷ Irintiquea amatavitantatsiri,
eiro isaviquimotanatsi novincatsarimentoqui;
¡aisati tseyari, eiro catsini nocarajeitiritsi!
⁸ Noncanteami quitaiteripeequi nontsoncajeri narori

maaroni caari cameetsajeitatsi nampitsiquiniri.
 ¡Nojocajeiteri inampiqui Tasorentsi antayetirori caari cameetsata
 tsi!

Iquenquetsatacairi oashiretachari Tasorentsi

- 102** ¹Notasorentsite, pinquemisantero noquenquetsatacaimpiri
 pinquemena antearojenca naventaquempi.
- ²Eiro pimanapitsatana ariorica opomerentsitimotena,
 pinquemena, intsipaite pamitacotena ariorica naventempi.
- ³Tempa irotaintsi nompempa, noquempetacaro cachaa;
 aisati ocatsirincataque notonqui oquempetacaro paamari.
- ⁴Oshequi noashiretasanotaca catsini,
 noquempetacaro tojari oshimpeshiti.
 ¡Te nonquemajero notashe!
- ⁵Matsatonquitanaquena, aveaquena nocavintsaaca.
- ⁶Oshequi noashiretaca,
 noquempetacari mamaro timatsiri caaraiteriqui
 aisati pompori timatsiri otireayetanaquenta pancotsipeeni.
- ⁷Te nomaaje, noquempetacari choriquti,
 timatsiri apaniro otataroqui pancotsi.
- ⁸Icantani quisaquenari icantimatana,
 icantacotaquena novajiroqui iroashinoncaayena.
- ⁹Noashitacaro samampo, noquempetacantaquero tanta,
 aisati nirapinitiri oconoajatacaro nojaqui.
- ¹⁰Piquisaquena, poashinoncaquena,
 oquempetaca poancaquena, pojocantenari quipatsiqui.
- ¹¹Intsipaite nopeanaca, oquempetacaro tsimancaiteri;
 noquempetacaro tojari shimpeshitatsiri.
- ¹²Avintiquea, Notasorentsite, picantani pipincatsariventanti.
 ¡Aisati oncanteani inquenqueshireacoyeetempi!
- ¹³Intsipaite pincavintsaajeitajeri savicayetatsiri nampitsiqui Sión,
 ¡tempa moncarataca pimpeacojeitantajejariri caari cameetsatsi
 yantajeitiri!
- ¹⁴Yora quemisantajeitimpiri inintajeitaquero nampitsini;
 ¡oshequi yoashiretacotacaro tireetaquero!
- ¹⁵Maaroni atiripee savicayetatsiri pashinipeequi quipatsi aisati pincatsaripee,
 impincatsajeiteri Tasorentsi yora cameetsatasanotatsiri,
- ¹⁶ariorica irovetsicantajero aisati nampitsi Sión,
 ironijantasanotero itasorena,
- ¹⁷ariorica inquemeru inquenquetsatacayeri yojoqueetiri,
 eiro iqemashitarotsi icoacotiriri.
- ¹⁸Ocameetsati osanquenatacotea ocapee,

- irineanatacojeitanteorori impoijeitajantsineri coajicani,
incantacotanteariri: Icameetsati Tasorentsi,
aisati iriori caariquera timatsineri.
- 19 Anta inquitequi ocameetsaitetinta
yamenacoventaquee Tasorentsi aca quipatsiqui,
- 20 Iramitacotanteariri yoiminqueeyetiri cavintsaajeitachari,
aisati iroipacaacoventantajeariri icantacoventetiri iroyeeteri;
- 21 irotaque inquenquetsatacotanteariri Tasorentsi
savicajeitatsiri toncaariqui Sión, jero Jerusalén,
aisati incantajeitaqueri: Icameetsati Tasorentsi,
- 22 ariorica irampatotimentajeitari atiripee impincatsajeitanteoriri.
- 23 Yaapitsataquenaro Tasorentsi noshintsire,
icoacaquena eiro naneasanotajitsi osamani.
- 24 Irosati nocantantacari:
“Notasorentsite, eiro poamaashitana
tequerata nanteashipate.”
Picantani pitimi avinti, te pintsoncanetea.
- 25 Peerani piquisotacaquero quipatsi
aisati povetsicaquero inquite.
- 26 Iro cantaincha ontsoncajea maaroni,
oquempeta quitsaarentsi otsonca;
jaisati avirotaque pashinitajerone,
iquempeta quitsaatachari pashini iitsaare;
iro cantaincha avintiquea pincantaitatitempani pintime!
- 27 Eiro pipashinititsi, irosati pincanteani pintime;
eiro pitsoncatsi.
- 28 Pisavicacaasanojeiteri cameetsa irishanincajeitajeari
quemisantajeitimpiri;
anta pinampiqui, incanteani incarajeitempi.

Nompasonquiteri Tasorentsi itasoncacoventaquena

(Ivampoyeane David)

- 103** ¹ Nompasonquitasanoteri Tasorentsi;
Nonquearioventasanoteri, tempa icameetsatasanoti catsini.
- ² Nompasonquitasanoteri Tasorentsi,
eiro nopeacotarotsi catsini icavintsaasanotaquena.
- ³ Iriotaque peacotaquenarori caari cameetsatatsi nantayetiri;
itecatsitacotajanaro maaroni nomantsiarepee.
- ⁴ Yojocaacoventaquena eiro nocamantatsi;
inintasanotaquena, icavintsaasanotaquena.
- ⁵ Ipapinitaquenaro cameetsayetatsiri,
noquempevetantanajariri evancari noshintsitanaji,

- iquempeta ishintsiti paquitsa anteari.
 6 Icantacoventasanotiri Tasorentsi cameetsa yoashinonqueeyetiri,
 yamitacojeitiri.
 7 Iotacaaqueri Tasorentsi Moiseshini, aisati ishanincajeitaniri Israel,
 icantacantiri aisati yantayetaqueri.
 8 Yora Tasorentsi icavintsantasanoti aisati ineshinoncatanti;
 te intsipaite irishemempa, inintasanotanti catsini.
 9 Te incanteani incantimentapinijeiteero antayetiri,
 aisati te iroisamaninquero inquishea.
 10 Te iroasanquetaimentapiniteero caari cameetsatatsi antayetiri;
 11 inintasanojeitiri catsini maaroni pincatsajeitiriri,
 oquempeta inquite antearoite oni anaanaquero quipatsi.
 12 Yojocaacoventajeitaqueero caari cameetsatatsi antayetaqueri,
 oquempetaca areejiqui iquenapai catsirincaiteri irosati iqueanajinta.
 13 Icavintaasaanotiri Tasorentsi pincatsatiriri,
 oquempeta iriri icavintaasaanotiri itomipee.
 14 Tempa iotacotaquee jaoca acantajeitari;
 iojeitaquee arojeitaque quipatsivane.
 15 Arojei, te anquisojeiteji antime,
 aquempetacaro tojari,
 aisati aquempetacaro inchateaquipee tomirisato.
 16 Ariorica ojeaonquiro tampea ojireayetanaque,
 te aneajeroji aisati tecatsi quenqueshireacotajerone.
 17 Irointiquea icantani Tasorentsi inintasanojeitiri pincatsajeitiriri;
 icantani icavintaajeitiri cameetsa yora impoijeitajerine,
 18 yora moncaratirori icoacaaqueriri,
 aisati caari peacotaro iquemisantiro icantacantayetiri.
 19 Yora Tasorentsi isaviqui inquitequi,
 ipincatsariventaquero maaroni timayetatsiri.
 20 ¡Pimpasonquitasanoteri Tasorentsi
 avirojei inampirepee shintsitasanotatsiri!
 Tempa pimocaratiro maaroni icantayetimpiri, piquemisantiri.
 21 ¡Pimpasonquitasanoteri Tasorentsi
 avirojei inampirepee amitacoyetiriri
 antaveetiniriri icoacaayetimpiri!
 22 ¡Pimpasonquitasanoteri Tasorentsi
 maaroni irovetsicaneppee ipincatsariventajeitiri!
 ¡Nompasonquitasanoteri Tasorentsi!

Iveshireimentacari Tasorentsi vetsicaquerori maaroni paitapeerica

104 1 ¡Nompasonquitasanoteri Tasorentsi!
 ¡Notasorentsite, Pitasorentsitasanotaque!

- Oshequi ipincatsatasanoyeetimpi, aisati pishipaqueireasanotaque catsini.
- 2 Piquitaiteasanotaque catsini
pantearoiteacaaquero inquite,
piquempetacantaquero tocoya imaronqueetiro.
- 3 Poaquero Pinantari jenoqui, panaanaquero nija inquitequiniri,
pipeaquero mencori pishiacomento,
aisati pijayetaque jaocapeerica tampeaqui.
- 4 Yora pinampirepee camantacotimpiri iquempejeitacaro tampea,
yora antaveetimpiri iquempejeitacaro paamari.
- 5 Peerani povetsicantacarori quipatsi
otimaque quisotacairori, eiro ovaatsi.
- 6 Ora incajare saanajatatsiri
anaaquero maaroni quipatsi aisati toncaaripee,
oquempevetacaro pashicaronsi.
- 7 Oquemantaquempiri pishintsitsataquero piquempetacaro otirei,
intsipaite oshiaajatanaca.
- 8 Otoncaanaquero toncaaripee irosati oirincaiteayetapaaca,
ojatanaque jaocarica pinintacaaquerori,
9 irosati picantaqueronta: “¡Eiro pavishitsi!”
Eiroquea omatantajatsi aisati anaajero quipatsi.
- 10 Poncaajayetaquero nija omoronajapeequi,
oquenaajayetantanacari toncaaripeequi.
- 11 Ora nijapee irotaque irajeitiri poshiniripee,
coquiyetatsiri aisati aashinopee toncaarisati.
- 12 Anta otsapijapeequi nija
aitaque itimayetiri tsimeripee imencoyeta.
¡Ineyeti aisati yaatayeti inchatopeequi!
- 13 Avirotaque ovariirore incani poneachari jenoqui,
otsincacotantarori quipatsi oshiocantayetari panquirentsipee.
- 14 Pishiocacaayetiro paashitopee yoajeitari virantsipee
aisati panquirentsipee yoajeitari atiripee,
- 15 ora yoajeitari irotaque shintsitacairiri
aisati ovaja oquimoshiretacairi
oquitioncavorotacairi, anaacotiri quejitsi,
- 16 Pitsincacotiro inchatopee, ora santaripee,
pipanquitiri otishiqui Líbano.
- 17 Irotaque yaatantayetari tsimeripee imencoyeta
aisati antearoyetatsiri inchatopee
aitaque itimiri iriori tsomparipee.
- 18 Ora toncaaripee irotaque itimantayetari chiiwopee,
aisati imperitaqui itsitiyetari quiimapee.

- 19 Povetsicaqueri cashiri omoncaratantayetari ishoncapiniyeta
cashiripee,
aisati catsirincaiteri piotacaaqueri inqueantanajeari.
- 20 Ariorica pitsitenitacairo,
aitaque isoquijiri poshiniripee inchatomashiquiniri.
- 21 Yora anteariite maniti yamoroacotiri iovintsane,
icoacotiri Tasorentsi iroyeari.
- 22 Ariorica yoancaapaaja catsirincaiteri
iqueanaji omoroqui imoreapaaja.
- 23 Impoiji iriori atiri ijayetaji yantaveeti,
irosati ontsitenijencaiteanaje.
- 24 ¡Tasorentsi, oshequi catsini pimayetaqueri!
Piotasanoti cameetsa povetsicayetaquero maaroni.
¡Ora quipatsi otimantajeitacaro povetsicayetaqueri!
- 25 Jero iroori inajare antearojatatsiri
itimayeti oshequi catsini shimapee,
antearitasanoyetatsiri aisati irijaniquiyetatsiri.
- 26 Irotaque oquenantari antearoyetatsiri pitotsi,
aitaque ineatsatari covencatatsiri antearitasanotatsiri icanteetiri
Leviatán.
- 27 Yoyeacojeitimpi pimpapiniteri iroyeari
ariorica omoncarata pipapinitanariri.
- 28 Ariorica pipiri, yoajeitaro cameetsayetatsiri iquemasanojeita.
- 29 Eirorica pipajiritsi, intsaroajeite,
paapitsateririca yaneantari,
incamajeite impeajea quipatsi.
- 30 Irosatirica poaneajeiteri,
irosati incantea iraneajeite quipatsiqui.
- 31 ¡Icantani Tasorentsi Itasorentsitasanoti,
aisati yoveshireimentaro yovetsicayetiri!
- 32 Ariorica yameniro quipatsi, onica,
¡ariorica yantiro toncaaripee ocachaajencati!
- 33 Ainiroquera nanei,
nompampoyeeneri pampoyeantsipee Novincatsarite Tasorentsi.
- 34 Icoaque Tasorentsi irineacameetsatitenaro
noquenqueshirejeitiri;
tempa iriotaque apaniro oimoshirencanari.
- 35 ¡Ocameetsati impeajeitajea quipatsiqui
antayetirori caari cameetsatatsi;
eiro itimajeitajitsi caari cameetsajeitatsi!
¡Nopasonquitasanoteri Tasorentsi,
noncantacoteri: Icameetsati!

Imayetaqueneriri Tasorentsi ishanincajeitaniri Israel
(1 Crón. 16.7-22)

- 105** ¹ Pimpasonquijeiteri Tasorentsi,
pincantajeiteri atiripee icameetsataque;
pincamantajeiteri imayetaqueri.
- ² Pimpampoyeeneri pampoyeantsipee pimpincatsateri,
pinquenquetsatacotero maaroni yantayetaqueri.
- ³ Pineacameetsatasanoteri Tasorentsi, icameetsatasanotaque.
Avirojei aventajeitariri Tasorentsi, piveshireimentasanoteari.
- ⁴ Paventajeiteari Tasorentsi, timatsi itasorenca.
Pincanteani paventapinijeiteari.
- ⁵⁻⁶ Avirojei ishanincajeitaniri Abrahamani, quemisantiriri,
aisati ishanincajeitaniri Jacoboni, icoyeajeitaqueri,
pinquenqueshirejeitero maaroni caari aneapinijeiti
imayetaqueri,
aisati icantacantaqueri icamantajeitaqueeri.
- ⁷ Yora Tasorentsisanori, iriotaque Atasorentsite,
pincatsariventirori maaroni quipatsi.
- ⁸⁻⁹ Ariorica ompeeranitananovetanaquea,
eiro ipeacotarotsi icaratantacariri Abrahamani,
aisati icantasanotaqueriri Isaacani,
- ¹⁰ aisati iquearioventaqueneri Israel,
oncanteani ontime.
- ¹¹ Icantantacariri:
“Nompajeyempiro quipatsi Canaán
nocashiacaquempiri, pisavicajeitanteari.”
- ¹² Te irishequitananoveteani,
iquempevetaca pashinisati inajeitaque.
- ¹³ Icantani ijayetaque aparopeequi nampitsi.
- ¹⁴ Te irishinecoventeriji Tasorentsi iroashinoncayeeteri,
irointi icantacoventaqueri pincatsaripeequi.
- ¹⁵ Incantiri: “Eiro pantiritsi nocoyeaneppee aisati
eiro poashinoncaajeitiritsi camantacotanari.”
- ¹⁶ Aisati icantacantaquero otashentsiiteanaque quipatsiqui Canaán,
tecatsi iroajeitajeari.
- ¹⁷ Iro cantaincha itianquitacariri José ijivatanaque,
ipimantaqueri irirentipee iromperanayeetanteariri.
- ¹⁸ Yachacanteetacariri iitiqui carenatsa,
aisati yashitacoyeetaqueri ashivotatsiriqui, yoiminqeetaqueri,
- ¹⁹ irosati omoncaratantaca icamantitacariri José;
iotacaaqueriri Tasorentsi oqueariotasanotaque irineane.

- 20 Yora pincatsari, pincatsariventiriri oshequi atiripee,
yoimisoquijacantajiri.
- 21 Ipeajiri amitacotiriri aisati amenacanterine maaroni ishanincapee
- 22 aisati iroamejeiteri amitacoyetiriri
jeri jivatacantayetatsiri iriojeitanteari.
- 23 Impoiji ijatanaque iriori intacantaqueerini Israel, pajitachari aisati Jacobo,
pashinisati inaque anta Egiptoqui,
isavicaque iipatsitequi ishanincapeeni Cam.
- 24 Yoshequiacasaanotaqueri catsini Tasorentsi ishanincajeitajari;
ineaperotasanojeitaca, yanaacojeitaqueri egiptosati.
- 25 Iro cantaincha icantacashireacaajeitacari egiptosati,
iquisajeitantacariri ishanincajeitajari Tasorentsi,
aisati yamatavitaqueri yora quemisantaqueriri.
- 26 Impoiji Tasorentsi itiancaqueri Moiseshini, quemisantiriri
aisati Aarón, yora icoyeaqueri.
- 27 Imatacaasaanotaqueri yonijaaqueri itasorenca anta caaraiteriqui;
jaisati caari ineapinijeiti iipatsitequi ishanincapeeni Cam!
- 28 Itiancaquero Tasorentsi tsiteniri apataanaca maaroni.
Iro cantaincha egiptosati te inquemisantajeiteroiji irineane.
- 29 Ipeaquero irajantsi nija, icamajeitanaque shimapee.
- 30 Yoshequiacasaanotaqueri mashero,
iqueaquero irosati ivancoqui pincatsari tsonpoina.
- 31 Ineanataque Tasorentsi, itimasanotanaque Egiptoqui shimpoquipee
aisati shineequipee.
- 32 Itiancaquero iriniqui,
opariaque oquempevetacaro incani,
aisati paamari, otsoteaquero iipatsite.
- 33 Otoncapaaquero irovamashitepee, panquirentsi higuera
jero inchatomashitepee egiptoquiniri.
- 34 Ineanataque aisati Tasorentsi, itimanaque tsinaripee;
oshequi catsini inajeitaque, tecatsi materine irioyeeteri.
- 35 Itsoncapaaquero inchatoshitepee aisati maaroni panquirentsipee.
- 36 Anta Egiptoqui yoamaitajeitaqueri itomipee maaroni jivayetatsiri
itimi.
- 37 Yoimishitoajeitaqueri Tasorentsi ishanincajeitaniri Israel,
yaajeitanajiri oshequi catsini oro
aisati quireequi ipayetavaqueriri,
tecatsi aajeitavajerine.
- 38 Yora egiptosati iquimoshireventajeitavajiri ineavajiri ijajeitanaji;
tempa oshequi itsaroasanojeitaque catsini.
- 39 Yoaquero Tasorentsi mencori manavaqueriri
aisati paamaritatsiri tsiotacojeitaqueriri tsiteniriqui.

- 40 Icoacojeitaqueri iroyeari,
ari itiancaqueneri contonapee
aisati maná poneachari inquitequi, iquemajeitacari.
- 41 Icotareaquero imperita, ocontejatanaque nija,
oquenaajatanaque caaraiteriqui oquempetacaró antearoja nija.
- 42 Iquenqueshireaquero cameetsatasanotatsiri
icantasanotaqueriri Abrahamani yora quemisantiriri.
- 43 Aitaque ocantacari yaajeitanajiri Tasorentsi icoyeanepée,
icajemajeitanaque iquimoshiretasanojeitanaque.
- 44 Ipajeitaqueri iipatsitepeeni itsipapee atiri aisati ivanquirepee,
- 45 irotaque inquemisantajeitantarori, icantacantiri Tasorentsi,
aisati irimoncarajeitantarori yoamejeitaqueriri.
¡Icameetsataque Tasorentsi!

Icantani ipiatsajeitaca ishanincajeitaniri Israel

- 106** ¹ ¡Icameetsataque Tasorentsi!
Pimpasonquijeiteri Tasorentsi, tempa icameetsatasanotaque,
icantani inintajeitaquee.
- ² ¿Jaanica materone iriotacotero imataqueri Tasorentsi yanaacotanti?
¿Jaanica materone intsoteero
incantacoteri icameetsasananoti Tasorentsi?
- ³ Iquimoshirejeiti yora antayetirori cameetsatatsiri,
aisati icantani yantajeitiro queariotasanotatsiri.
- ⁴ Notasorentsite, pinquenqueshiretena
ariorica pincavintsaajeitajeri pishanicajeitacari,
aisati ariorica pimpoque poavisaacoteri,
- ⁵ noneanteariri inquimoshirejeite picoyeajeitaqueri,
noncarajeitantariri narori nonquimoshirejeitanaque.
- ⁶ Nantajeitaquero caari cameetsatatsi,
noquempejeitacari intacantajeitaquenaniri,
te noncameetsajeiteji catsini.
- ⁷ Yora intacantajeitaquenaniri te inquenqueshireteroji
pimayetaqueri anta Egiptoqui caari ineapinijeiti;
ipeacojeitacaró pinintasanojeitaqueri
aisati ipiatsajeitaquempi incajarequi Quitioncari.
- ⁸ Iro cantaincha Tasorentsi yoavisaacojeitaqueri,
inijaasanotaqueri itasorenca impincatsasanojeitantariri.
- ⁹ Ishintsitsataquero incajare Quitioncari opirijatanaque,
yanijeitanaquero nianqui
iquempetacantaquero caaraiteri, imonteajeitantanacari.
- ¹⁰ Aitaque ocantacari yoavisaacojeitaqueri;
caari imajeitantari iroimpiavajeri quisajeivetacariri.

- 11 Aajeitaqueri incajare quisajeivetacariri,
itsoncajeitaca maaroni; tecatsi timanajantsine.
- 12 Irosati ishirejeitantanacaro icantasanotaqueriri Tasorentsi;
ipampoyeajeitaqueneri cantacotiriri: Icameetsati.
- 13 Iro cantaincha intsipaite ipeacojeitacaro imayetaqueri Tasorentsi,
te iroyeacoteriji iriotacayeri iquenqueshiretaqueri.
- 14 Anta caaraiteriqui ineantajeivetacari Tasorentsi,
ishintsinajeitaqueri icoacotaqueri impapinijeiteri iroyeari.
- 15 Ari ipaqueri Tasorentsi icoacojeitaqueriri,
iro cantaincha itiancaqueneri mantsiarentsi oamaajeitaqueriri.
- 16 Aisati isavicaajeitaquenta ainiro quisanentimentaqueriri
ijivatacanti Moiseshini jeri Aarón, yora inashitacaacari Tasorentsi.
- 17 Impoiji otencareanaque quipatsi
oniajeitaqueri Datán aisati Abiram jeri icarajeitaqueri.
- 18 Aisati omorequimojeitanaqueri paamari
otaajeitaaqueri maaroni caari cameetsajeitatsi.
- 19 Anta toncaariqui Horeb yovetsicaqueri oro
ishiacantaqueri vacajaniqui ijitasorentsitaqueri,
ipincatsatashjeitacari.
- 20 Yojocanaqueri Tasorentsi yora cameetsatasanotatsiri,
yovetsicashitaca shiacantsi vacajaniqui oarori paashito,
- 21 Ipeacojeitanacari Tasorentsi oavisaacojeivetacariri,
matasanovetacarori paitapeerica caari ineapinijeiti anta
Egiptoqui.
- 22 Imatasanoyevetacaro caari ineapinijeiti
anta ipatsitequi ishanincapeeni Cam
aisati imatasanotaqueri incajarequi Quitioncari.
- 23 Icoasanovetaca Tasorentsi intsoncajeiterime,
iro cantaincha Moiseshini, yora icoyeane,
icantacoventaqueri itsimareacaajari iquisasanovetanaca;
irotaque caari itsoncajeitantari.
- 24 Aisati te incoajeitero quipatsi cameetsatasanotatsiri;
te irishirejeitearoji icantasanovetacariri Tasorentsi.
- 25 Icantimajeitaqueri Tasorentsi anta ivancojaniquipeequi,
te inquemisantajeiteroji icantavetacariri.
- 26 Impoiji icanti: “Nocantani Naneasanoti.
Nocantasanoti: Noamaajeiteri maaroni anta caaraiteriqui,
- 27 aisati nonquempeteri irishanincajeitajeari,
novaraajeiteri inampipeequi
yora quemisantashiyetariri ijitasorentsiyeetiri.”
- 28 Aisati anta toncaariqui Peor,
ipeajeitaca iveranaro ijitasorentsiyeetiri Baal,

- yoajeitacari ivatsa itayeetinirori caari aneatsi.
- 29 Ora yantayetaqueri caari cameetsatsi,
irotaque iquisacantacariri Tasorentsi
itiancaqueneri oashinoncantsi itsoncajeitaca icamajeitaque.
- 30 Iro cantaincha yora Finees yoaqueri cantacaacarori;
irotaque opeantanajari oashinoncantsi.
- 31 Ari ineacameetsataquero Tasorentsi
ora yantaqueri Finees cameetsatsiri,
incanteani inquenqueshiretajero irishanincajeitajeari coajica.
- 32 Aisati iquisacaacari Tasorentsi anta nijaapeequi Meribáquiniri,
iriotaque cantacaajeitacarori ishanincapee,
icantacantantacariri Moiseshini iriori.
- 33 Iquisacaasanotacari ineaveetashitantacari, te irioteji paitarica
icantaqueri.
- 34 Te intsoncajeiteriji pashinipee atiri icantavetacariri Tasorentsi.
- 35 Iro cantaincha iconoajeitanacari pincatsatashijeitariri
ijitasorentsiyetiri,
yantayetanaquero yamejeitari iriori;
- 36 ipincatsatashijeitacaro ijitasorentsiyetiri,
iriojeitaque cantacantainchari yashinoncaajeitantacari.
- 37 Yoajeitakeri itomipee jero irishintopee,
itaaqueneri camaaripee.
- 38 Oshequi irirajani, yoashiyetacari itomipeeni jero irishintopeeni,
yoaquenerori ijitasorentsitashiyetari canaaneopee,
icaariperotaquero quipatsi.
- 39 Aisati icariperojeitaca,
Yojocanaqueri Tasorentsisanori ipincatsatashitanacari
ijitasorentsiyetiri,
yantashiyetacaro maaroni caari cameetsatsi, icoacaashiyetacari.
- 40 Yora Tasorentsi iquisasanojeitakeri ishanincajeivetajari,
te incoajeitajeriji yashijeivetajari;
- 41 yojocanaqueneri pincatsatashijeitariri ijitasorentsiyetiri,
irosati ipincatsariventantacari quisajeitakeriri;
- 42 yoashinoncaajeitakeri quishiriri iperanajeitacari.
- 43 Yoavisacotapinivetacari Tasorentsi,
iro cantaincha ipiatsatapinijeitacaro icantavetacariri,
irointi yantanojeitakeri caari cameetsatsi.
- 44 Iro cantaincha ineakeri yashinoncaajeitaca
aisati iquemaqueri icavintsaaca,
- 45 irosati iquenqueshireantanajaro icantasanotaqueriri:
Ancaratavacaajeitea,
ivashiniajiro, te inquisajeitajeriji;

- tempa oshequi inintasanojeitiri,
 irotaque icavintsaajeitantajariri.
- 46 Aisati icantashireacaajeitacari anaacojeivetacariri,
 yaacameetsajeitajiri cameetsa.
- 47 ¡Poavisaacojeitajena, Notasorentsire!
 ¡Poimpiajeitajena noipatsitequi nosaviquimojeitapaajeariri
 nampitsipeequiniri,
 noncantacojeitantapaajempiri: Picameetsati,
 nonquimoshirejeitapaaje!
- 48 ¡Icameetsatasanotaque Tasorentsi,
 Itasorentsire Israel, incantaitiyempani intime!
 ¡Incantajeite maaroni: “Aitaque incanteari!”
 ¡Icameetsataque Tasorentsi!

Icantani Tasorentsi inintajeitee

- 107** ¹ Pimpasonquijeiteri Tasorentsi;
 tempa icameetsatasanotaque,
 icantani inintasanojeitaquee.
- ² Irotaque pincantajeiteri oca,
 maaroni yoavisaacojeitajiri Tasorentsi,
 yoashinoncaajeivetacari quisajeitiriri,
- ³ aisati yoipiajeitajiri savicayevetainchari
 jaocapeerica nampitsipeequi.
- ⁴ Yaniijeitaque ipeajeitaca caaraiteriqui,
 te irineeroji avotsi jatantachari nampitsiqui irisavicajeitanteari;
- ⁵ aaqueri itashe aisati imire; irotaintsi incamajeiteme.
- ⁶ Ineantacarori opomerentsitimojeitacari, yaventacari Tasorentsi.
 Impoiji yoavisaacotajiri yashinoncaajeivetaca.
- ⁷ Yonijaaajiri avotsi cameetsatsiri irareetantearori nampitsi
 irisavicajeitanteari.
- ⁸ Pimpasonquijeiteri Tasorentsi;
 tempa inintasanojeitaquee,
 yamitacojeitaqueri atiripee.
- ⁹ Iquemacaajeitacari miretatsiri aisati tasheatsiri.
- ¹⁰ Itimajeitaque caravosoqui tsitenishaatatsiri,
 yoisoyetaqueri carenatsaqui, yoashiretasanotaca.
- ¹¹ Iro yashinoncaajeitantacari, ipiatsajeitaca,
 te irineacameetsatero icantacantaqueri Tasorentsi Inquitequiniri,
- ¹² Irotaque ishinecoventantacariri Tasorentsi iperanasanoyeetacari,
 opomerentsitimotasanajeitacari, tecatsi amitacojeiterine.
- ¹³ Ineajeitantacarori, irosati yaventantacari Tasorentsi.
 Ari yoavisaacotajiri yashinoncaajeivetaca.

- 14 Yoimisotoajiri caravosoqui tsitenishaatsiri
aisati yoisoreacotajiri carenatsaqui.
- 15 Pimpasonquijeiteri Tasorentsi;
tempa inintasanojeitaquee,
yamitacojeitaqueri atiripee.
- 16 Icarajayetaquero ashitacorontsi vetsicachari bronze,
aisati icarajayetaquero apataroquitatsiri ashiro.
- 17 Imantsiyetanaque aisati yashinoncaimentajeitacaro
yantaqueri caari cameetsatsi.
- 18 Ipincayetanaquero maaroni oanarontsi,
irotaintsi incamajeiteme.
- 19 Ineantacarori opomerentsitimojeitacari, yaventacari Tasorentsi.
Ari yoavisaacotajiri yashinoncaajeivetaca.
- 20 Apatiro ineanataque, irosati yoaviscotantajari,
¡Te incamajeite!
- 21 Pimpasonquijeiteri Tasorentsi; tempa inintasanojeitaquee,
yamitacojeitaqueri atiripee.
- 22 Poajeiteneri picashiacayetiriri, pimpasonquitanteariri,
quimoshire pincantea pinquenquetsatacojeitero imayetaqueri.
- 23 Ijataque incajarequi pimantajeitsiri,
iquenacojeitanaque antearopeequi pitotsi,
- 24 Aitaque ineajeitaqueriri yovetsicayetaqueri Tasorentsi caari
ineapiniti,
- 25 Ineanatantacari Tasorentsi,
irosati omapocantanaca tampea
antearoite otavoncaare;
- 26 oancaajatanaca jenoqui,
aisati opiapaaja ishaaviji incajarequi.
Ineajeitantacarori covencatatsiri,
te irineaperotanajeaji.
- 27 Itaataatanaque, iquempejeitanacari shinquitincari.
Tecatsi ojitanajea ioyevetari.
- 28 Ineantacarori opomerentsitimojeitacari,
yaventacari Tasorentsi. Ari yoavisaacotajiri.
- 29 Yoimajerentajiro tampea, ocameetsajatanaji,
aisati opeanaja otavoncaare.
- 30 Ineajeitantajarori omajerejatanaji,
iquimoshiretasanojeitanaji.
Ari yaacotanajiri Tasorentsi anta ovaatapinita icoajeitaqueri.
- 31 Pimpasonquijeiteri Tasorentsi; tempa inintasanojeitaquee,
yamitacojeitaqueri atiripee.
- 32 ¡Piquenquetsatacoteri ariorica irampatojeitea ishanincajeitajari!

- ¡Pincantacojeiteri: Icameetsati, irampatojeitearica
jivatacantayetatsiri!
- 33 Yora Tasorentsi ipashinitacairo nijapee, opeanaja caaraiteri,
aisati omotoajapee, opeanaja pirijapatsari.
- 34 Ora quipatsi cameetsavetachari ipashinitacairo catiopatsari;
tempa oshequi yantayetaquero caari cameetsatsi
savicantajeitarori.
- 35 Aisati ipashinitiro caaraiteri omotija;
aisati pirijapatsavetachari otimantanajaro amotoajapee.
- 36 Aitaque isavicajeitiri tasheajeitatsiri,
aisati yovetsicajeitaquero inampipee.
- 37 Ipanquiveetaque panquirentsipee aisati irovamashite,
aisati yaaviiyetiro oshequi oitsoquipee.
- 38 Itasoncaventaquero Tasorentsi,
yoshequiacaasanotaqueneri, ivacatepee.
- 39 Ariorica icaamaaranti, eiro ishequitanaajitsi
irio cantacaarori quisaqueriri yoashinoncaaquero, aisati
opomerentsitimotasanotacari,
- 40 yora Tasorentsi te irineacameetsateri oashinoncantajeitatsiri,
yoipeasanojeitiri caaraiteriqui; te iriotajeroji avotsi.
- 41 Irintiquea coiteajeivetatsiri vashiretachari,
yoshequiacaajeitiri ishanincapee,
iquempetacantaquero ovishapee.
- 42 Irineantajeitaquerorica yora cameetsajeitatsiri, inquimoshirejeite.
Irintiquea caari cameetsajeitatsi, irimajeretashijeitea.
- 43 Yora quenqueshireachari cameetsa
iotiro inintsanotanti Tasorentsi.

Nocoasanotaque noveshireimentempi

(Ivampoyeane David)

(Sal. 57.7-11; aisati 60.5-12)

- 108** ¹Notasorentsite, nocoashiretasanotaque
nompampoyeacoventempi.
¡Meeca nompampoyero!
- ² Meeca nompampoyeantearo arpa aisati salterio.
¡Ariorica onquitaiteamane nompampoyeacoventempi!
- ³ Notasorentsite, noncantacotempi: Picameetsati, pampoyeantsiqui,
inquemajeitena pashinisatipee atiri.
- ⁴ Tempa pinintasanotanti catsini, anaacotaquero inquite,
aisati oquempeta piqueariotasanoti.
- ⁵ Notasorentsite, avirosavicatsiri anta inquite jenoqui.

- ¡Ora pitasorenca otsoteaquero maaroni quipatsi!
- 6 ¡Poavisaacojeitena pitasorencaqui!
Piquemaquena nocantimpiri
¡Pojoacaoverteri pinintajeitiriri!
- 7 Anta Pinantariqui picantasanotaquena:
“Nonquimoshirete nanaacotantaquerica,
nompaarantayeteri nocoyeajeitaqueri quipatsi Siquem
aisati oirincaiteacotapai Sucot.
- 8 Ora quipatsi Galaad aisati savicantajeitaroniri
jeri ishanincapeeni Manasés nashijeitacari.
Yora ishanincapeeni Efraín
irio ticaacoventajeiterine ishanincapee,
yora ishanincapeeni Judá nocoyeaqueri pincatsariyetatsineri.
- 9 Yora ishanincapeeni Moab aisati Edom
iriojeitaque noveranaro, nanaacojeitaqueri.
Antearojenca nonquimoshirejeite nanaacotantaque Filisteopee.”
- 10 ¿Jaanicampa aanaquenane nampitsiqui tantotacotachari?
¿Jaanicampa jivatanaquenane inampiqui ishanincapeeni Edom?
- 11 Iro cantaincha Notasorents site, pojocaquena;
¡tee quiso poajeitajena nomanajeitanteariri quisajeitanari!
- 12 Pintasoncacoventena nanaacojeitanteariri quisajeitanari;
tempa tecatsi irimataque atiri iramitacovetenarica.
- 13 Intasoncacoventeerica Tasorents i,
ari amajeitaquero pomerentsitimoyeveteeneri;
Iriotaque tsoncajeiterine quisajeiteeri.

Yaventacari Tasorents i impiacoventeari

(Ivampoyeane David)

- 109** ¹Notasorents site, eiro piquemashitarots i
noquenquetsatacaimpiri.
- ²Yora tseeyajeitachari icantimataquena
icantacotashitana caari cameetsajeitatsi.
- ³Oshequi icantanataquena, iquisashitaquena,
tecatsi nantavetea.
- ⁴Nonintajeivetari, icantimatashitaquena,
iro cantaincha namanacoventiri.
- ⁵Yoashinoncaaquena, naacameetsavetari,
aisati nonintajeivetari, iquisashitaquena.
- ⁶Nocoaque pincantashireacayeari caari cameetsatatsi
cantacoventerineri iriori,
aisati incantacotanteariri amitacotiriri;
- ⁷incantacoventanteariri timatsi irantane,

- iroasanquetayeri cantacoventavetariri.
- 8 ¡Eiro itimasanotitsi osamani
aisati intime itsipa aajeroneri timimotiriniri!
- 9 ¡Irampanirojeitanaqueta itomipeeni, tecatsi iririntajeari
aisati ijinani camajimentaaro onanaque!
- 10 Yora itomipeeni inquenquenayete incoacotantayete paitapeerica;
aisati irojoqueeteri ivanconiqui tireanaintsiri.
- 11 Yora papinitiriri quireequi yamanapinitiniri
iraanaquerota maaroni yashiyevetaniri,
aisati pashinisatipee ivanquirepeeni ishintsiventavetaroni.
- 12 Eiro itimitsi cavintsayerine iriori
aisati itomipeeni yojocajeitanaqueri.
- 13 Intsoncajeiteata irishanincajeivetajeari, impeajeitea incanteani;
tecatsi quenqueshireacotajerine.
- 14 Incanteani inquenqueshiretero Tasorentsi
yantayetiri iririni caari cameetsatatsi;
aisati eiro catsini ipeacotarotsi antayetiri irinironi.
- 15 Incanteani, inquenqueshireacojeitero yantayetiri
aisati eiro iquenqueshireacoyeetajiritsi.
- 16 Te catsini inquenqueshireteroji incavintsaajeiteri coiteaveeyetatsiri,
caari jocaacoventacha jeri ashinoncaayetachari
yoijanataqueri irosati yoantacari.
- 17 Irisati coanontacaro yoamaimatanti, iroamaimayerita iriori;
te incoyeroji tasoncacoventantsi. ¡Eiro meeca itasoncaventiritsi!
- 18 Ontsonquerita oashinoncantsi
oquempeta pashicarontsi opashicanti;
onqueanaquerita itsomontequi aisati itonquipeequi
oquempeta nija jeri quejitsi.
- 19 ¡Ontsonquerita oquempeta pashicarontsi opashicanti,
aisati oashinoncayerita oquempeta shiticatsaquirontsi!
- 20 ¡Aitaque pincanteriri Tasorentsi quisajeitaquenari
aisati maaroni cantimajeitanari!
- 21 Novincatsarite, ponijantero pitasorena,
pincavintsayena, impincatsatanteetempiri.
¡Poavisaacotena; tempa pinintasanotanti!
- 22 Oshequi nocoiteaveetaque aisati nashinoncaaca,
ocantimonentaquena noshirequi.
- 23 Aiquero nojatatii, opeimotaquena noshintsitini,
noquempetacaro tsimancaiteri,
aisati tsinari orairi tampea.
- 24 Te noimateaji pioncanaquena noyeritopeequi;
matsatanaquena, tecatsi noaqueari.

- 25 ¡Narotaque ishirontimentari atiri,
ineanarica, itecainata icaveana!
- 26 Novincatsarite Tasorentsi, pamitacotena,
poavisaacotena; tempa pinintasanotanti.
- 27 Iriojeitanajeta, avirotaque oavisaacotajanari.
- 28 Omaveteata incantimatena;
pintasoncacoventena avinti.
Ocameetsati impashiventaajeitanaquea;
naintiquea piquimoshiretacaasanotaje.
- 29 ¡Impashiventasanotanaqueata quisajeitaquenari!
¡Ontijanaquearita oquempeta pashicaronsi opashicanti!
- 30 Nompasonquitasanoteri Tasorentsi;
noncantacoteri: Icameetsati,
inquemajeitena oshequi atiripee.
- 31 Tempa irio amitacotiriri coiteaveeyetatsiri,
aisati yojoacaoverteri, eiro yoantaritsi oashinoncaavetariri.

Yora Tasorentsi ipincatsaritacaasanotaqueri pincatsari

(Ivampoyeane David)

- 110** ¹Yora Tasorentsi icantaqueri novincatsarite:
“Pisavique aca novincatsarimentoqui nacosanoriqui,
irosati noncantacaashiretanteari quisajeitimpiri
impincatsatempi.”
- ²Anta nampitsiqui Sión icoacaaquempi Tasorentsi
pimpincatsariventajeiteri maaroni quisajeitaquempiri.
- ³Ariorica panaacojeitaqueri quisajeitimpiri,
iroijajeitanajempi pishanincapee.
Anta toncaariqui cameetsatatsiri
aiquero pijatatiye pevancarite quitaiteripeequi,
oquempeta ocajashiiteamani oshiocacairo tojaripee.
- ⁴Aisati icantasanotaque Tasorentsi Inquitequiniri, eiro
ipashinitirotsi:
“Aviro antaveetenaneri, pincantaitatiyempani, iquempetani
Melquisedec.”
- ⁵Quiso yoaquempi Tasorentsi iracosanoriqui;
Ariorica omoncarataquea inquisasanotea,
intsoncajeiteri pincatsariyevetachari;
- ⁶incantacoventeri atiripee iroashinoncayeri,
impiojeiteri camayetatsineri,
aisati intsoncajeiteri pincatsaritatsiri maaroni quipatsipeequi.
- ⁷Anta avotsiqui irirero nija osanteni,
impoiji irishintsitanaje aisati.

Ancantacoteri Tasorentsi, ocameetsati imayetaqueri

- 111** ¹ ¡Icameetsataque Tasorentsi!
 Noncantashiretasanote: Icameetsati Tasorentsi,
 yapatojeitanta atiripee cameetsajeitatsiri,
 aisati maaroni savicajeitatsiri.
- ² Imatasanotaquero Tasorentsi caari aneapiniti;
 yora nintajeitirori icoasanotiro iriotacotero.
- ³ Ocameetsatasanotaque yantayetaqueri,
 icantani icantacoventanti cameetsa.
- ⁴ Oncanteani inquenqueshireacoyeetero imayetaqueri.
 Icavintsantasanoti Tasorentsi, aisati ineshinoncatanti.
- ⁵ Ipapinitiri yoari pincatsajeitiriri;
 icantani iquenqueshiretiro icaratavacantacari.
- ⁶ Yonijaasanotaqueri ishanincatajari imayetaqueri itasorencaqui,
 ipajeitaqueri iipatsiteni pincatsatashijeitariri ijitasorentsiyetiri.
- ⁷ Ora yantayetiri otampaticasanotaque aisati oqueariotaque;
 ocameetsati ashiretasanotearo icantacantayetiri,
- ⁸ oncantaitiyempani ontime,
 oqueariotasanotaque aisati otampaticataque.
- ⁹ Yoipacaacoventajiri ishanincajeitajari,
 aisati icantasanotajiri incanteani incaratavacaajea.
 Yora Tasorentsi icameetsatasanoti, aisati ipincatsayeetiri.
- ¹⁰ Ariorica ancoyero iotantsi, ocameetsati ampincatsateri Tasorentsi.
 Yora pincatsatiriri timatsi iquenqueshireantari cameetsa.
 ¡Ocameetsati ancanteani ancantacoteri: Icameetsati!

Itasoncaventiri Tasorentsi pincatsatiriri

- 112** ¹ ¡Icameetsataque Tasorentsi!
 Iquimoshireti pincatsatiriri Tasorentsi,
 ineacameetsatiro icantacantayetiri.
- ² Yora irishanincasanojeitajeari atiri cameetsatatsiri,
 intasoncacoventeeteri,
 aisati irimatanteari impincatsariventante.
- ³ Ontimimotasanoteri ivancoqui irashiyeteari
 aisati incanteani impashitantea cameetsa.
- ⁴ Yora cameetsatatsiri, aisati cavintsantatsiri,
 iquempetacaro tsiorontsi,
 quitaiteacotiriri atiri tsiteniriqui,
- ⁵ Yora atiri cameetsatatsiri, ipashitantanta yamanapiniyeetiririca
 aisati yamenacantiro cameetsa ipimantayetiri,
- ⁶ irotaque irimatantearori paitapeerica,

- eiro opomerentsitimotaritsi
 aisati incanteani inquenqueshireacoyeeteri.
 7 Te intsaroacayearoji icamanteeyetiriri covencayetatsiri,
 icantani irointi ishiresanotari Tasorentsi.
 8 Icantani ishiresanota, tecatsi iramaayetea;
 te intsaroyeji, irointi itseenquiri quisajeitiriri.
 9 Ipayetiri quireequi coiteaveeyetatsiri,
 icantani ipashitantayeta cameetsa.
 Impincatsajeitiri ishanincapee, irineacoyeteriri.
 10 Yora caari cameetsajeitatsi irineaquerorica imayetaqueri,
 inquisasanovetanaquea, irantsicanaajitanaquea;
 iro cantaincha tecatsi incanteri.
 Irointiquea ompeajeitea icoashiyetaniri yantayetiniri.

Aveshireimenteari Tasorentsi, icavintsaasanojeitaquee

- 113** ¹ ¡Icameetsati Tasorentsi!
 ¡Maaroni quemisantajeitiriri Tasorentsi, pincantacoteri:
 Icameetsati!
 2 ¡Icameetsataque Tasorentsi
 meeca aisati incantaitiyempani!
 3 Maaroni savicayetatsiri acaqueroca aisati antaqueronta,
 incantacojeiteri: ¡Icameetsati Tasorentsi!
 4 Yora Tasorentsi ipincatsariventiri maaroni savicayetatsiri
 quipatsiqui.
 ¡Itasorentsitsanotaque yanaanaquero inquite!
 5 Tecatsi quempetearine Tasorentsisanori, Atasorentsise,
 ipincatsaritanotaque inquitequi.
 6 Iro cantaincha yamenacoventiro inquite aisati quipatsi.
 7 Yora Tasorentsi iveshireacaari caari jocaacoventacha,
 aisati yamitacotiri coiteaveeyetatsiri,
 eiro yashinoncantatsi,
 8 Impoiji yoisavicajiri itimajeitinta pincatsariyetatsiri,
 yora jivatacairiri ishanincapee.
 9 Ora tsinane shiravarovetachari, yoimoshirencajiro,
 itimayetanaji otomipee aisati otimaji ovancosanori.
 ¡Icameetsataque Tasorentsi!

Iquenqueshiretiro iponeajeitantajarori Egiptoqui

- 114** ¹ Peerani iponeajeitantajarori ishanincajeitaniri Israel
 Egiptoqui nampitsinentsiqui,
 2 anta iipatsitequi ishanincapeeni Judá,
 aitaque otimaqueri Inantari Tasorentsi,

- aisati aitaque ipincatsariventantiri ishanincajeitaniri Israel.
- 3 Iquempejitantacarori ishanincajeitaniri Israel incajare,
otencareajatanaque;
aisati iroori nija Jordán opiaajatanaca catonco.
- 4 ¡Ora toncaaripee aisati otishipee oshevayetanaca,
oquempetanacari imitajapiniti ovishajaniquipee!
- 5 Incajare, ¿paita pitencareajatantanacari?
Nija Jordán, ¿paita pipiaajatantanacarori catonco?
- 6 Toncaaripee aisati otishipee,
¿paita pishevatanacari piquempetanacari imitaji
ovishajaniquipee?
- 7 ¡Pimpioque, quipatsi, pintsaroacayempari Tasorentsisanori,
Itasorentsite Jacoboni!
- 8 Ipeaquero imperitapee incajare.
Aisati ipeaquero amotoajayeti nija.

Itimi Atasorentsite inquitequi

(Sal. 135.15-20)

- 115** ¹Notasorentsite, avirotaque nompincatsatasanoteri;
eiro nopincatsatashijeitajatsi narosati;
Nompincatsatimentempiro pinintanti, aisati piquearioventanti.
- 2 ¿Paitampa irisampitantenari yora pincatsatashijeitariri
ijitasorentsiyetiri:
“Jaocame pitasorentsite?”
- 3 Yora Notasorentsite ainiro inquitequi,
imatasanoyetiro maaroni icoaqueri irantayeteri.
- 4 Yora pincatsatashijeitariri ijitasorentsiyetiri,
irisati vetsicashiyetaro oro jero plata.
- 5 Otimaveta ovante, te oneaveeteji;
otimaveta oqui, te oneanteji;
- 6 otimaveta oyempita, te onquemeji;
otimaveta oirina, te onquemencateji;
- 7 otimaveta acopee, te ajiriqueji;
otimaveta oitipee, te aniiteji;
¡te catsini omatea oneanate otsanoqui!
- 8 Aisati iquempejeitacaro iriori vetsicayetirori,
iquemisantashitacaro.
- 9 Avirojei ishanincajeitaniri Israel, pishiretasanoteari Tasorentsisanori;
tempa yamitacojeitaquee aisati iticaacoventajeitaquee.
- 10 Avirojei antaveetiniriri Tasorentsi, pishiretasanoteari;
tempa yamitacojeitaquee aisati iticaacoventajeitaquee.
- 11 Avirojei pincatsatiriri Tasorentsi, pishiretasanoteari,

- yamitacojeitaquee aisati iticaacoventajeitaquee.
 12 ¡Yora Tasorentsi iquenqueshireacojeitaquee,
 intasoncacoventajeitajee maaroni!
 intasoncacoventee arojei ishanincajeitaniri Israel;
 intasoncacoventajeiteri antaveetapinitiniriri Ivancoqui;
 13 intasoncacoventajeiteri pincatsajeitiriri,
 yora pincatsaritatsiri aisati caari pincatsaritatsi.
 14 Ocameetsati iroshequiacaajeri Tasorentsi pishanincajeitajeari
 aisati irishanincajeitajeari iriori pitomipee.
 15 Ocameetsati intasoncacoventajeitempi Tasorentsi
 yora vetsicaquerori inquite aisati quipatsi;
 16 Ora inquite irotaque irashi Tasorentsi;
 ora quipatsi ipajeitaqueri atiripee.
 17 Yora camajeitaintsiri eiro imatajirotsi incantacotajeri:
 Icameetsati Tasorentsi.
 18 Arojeiquea ainti, ancantacoteri meeca: Icameetsati Tasorentsi,
 ancantaitatitempani.
 ¡Icameetsataque Tasorentsi!

Ipsonquiti incamaqueme

- 116** ¹Nonintiri Tasorentsi;
 tempa iquemaquero noacotiriri,
²Noncanteani nonquenquetsatacayeri;
 tempa iquemapinitana.
³Irovetaincha noncameme, ocantimonentasanotanaquena,
 ari noashiretasanotanaca catsini,
 oshequi notsaroasanotanaque,
 noquemaatsitasanotaca.
⁴Irosati noquenquetsatacantacari Tasorentsi,
 nocantasanotaqueri iroavisaacotena.
⁵Yora Tasorentsi itampaticatasanoti, ineshinoncatanti,
 aisati oshequi icavintsanti.
⁶Yora Tasorentsi ishentiri caari neaperojeitacha.
 Noneantacari narori te noshintsitanaje, yoavisaacotaquena.
⁷Meeca nosavicaji cameetsa;
 tempa icavintsaaquena Tasorentsi.
⁸Yojocaacoventaquena noncamaqueme,
 ipeajanaro noashireveta,
 aisati te irishinetenaji nashinoncaasanotea.
⁹Noncanteani nonquemisantasanoteri Tasorentsi
 ainiroquera nocaratiri aneajeitatsiri.
¹⁰Noshiretacari Tasorentsi, omavetaquea nocanti:

“Opomerentsitimotaquena.”

- 11 Ainiroquera ocantimonetaquena, nocantasanotanaque:
 “Maaroni atiri irinti tseeyari.”
- 12 ¿Paita nompinatajeriri Tasorentsi oshequi itasoncacoventaquena?
- 13 Nompashiteari ovaja nompasonquitanteariri yoavisaacotaquena,
 aisati nonquenquetsatacayeri.
- 14 Nomoncarateneri nocashiacaqueriri Tasorentsi,
 noncarajeiteri ishanincajeitajari.
- 15 Oshequi ocantimontari Tasorentsi
 ineiririca icamajeiti nintajeitiriri.
- 16 Notasorentsite, narotaque quemisantimpiri,
 aisati narotaque otomi quemisantimpiri;
 poavisaacotajana, yoashinonqueevetaquena.
- 17 Ocameetsati noyempiri virantsipee nompasonquitantempiri,
 aisati nonquenquetsatacayempi.
- 18 Nomoncaratempiro nocashiacaquempiri,
 noncarateri pishanincajeitajari
- 19 anta oyaaraiteritequi Ivanco Tasorentsi,
 timatsiri nampitsiqui Jerusalén.
 ¡Icameetsataque Tasorentsi!

Aveshireimentasanoteari Tasorentsi, inintasanojeitaquee

- 117** ¹Avirojei, maaroni atiripee nampitsipeequiniri,
 pincantacojeiteri Tasorentsi: Icameetsati;
²tempa inintasanojeitaquee catsini.
 ¡Iquearioventiro icantasanotaqueeri, icantaitatiani!
 ¡Icameetsataque Tasorentsi!

Ocantani icavintsanti Tasorentsi

- 118** ¹Pimpasonquijeiteri Tasorentsi;
 tempa icameetsati, icantaitatiani inintasanotanti.
- ²Arojei ishanincajeitaniri Israel, ancantajeite:
 “Icantani Tasorentsi inintanti.”
- ³Aisati incantajeite iriori antaveetapinitatsiri Ivancoqui:
 “Icantani Tasorentsi inintanti.”
- ⁴Aisati incante pincatsajeitiriri:
 “Icantani Tasorentsi inintaanti.”
- ⁵Opomerentsitimotantaquenari, naventanacari,
 iquemaquena aisati yoavisaacotaquena.
- ⁶Quiso yoaquena Tasorentsi; caari notsaroanta,
 ¿jaoca incantenari atiri?
- ⁷Quiso yoaquena aisati yamitacotana,

- ¡noneajeiteri intsonqueeteri quisajeitanari!
 8 Ocameetsati ashiretasanoteari irinti Tasorentsi,
 eiro ashirejeitaritsi atiri.
 9 Ocameetsati ashiretasanoteari irinti,
 eiro ashirejeitaritsi neaperoyevetachari atiripee.
 10-11 Maaroni nampitsipeequiniri ishoncajeitaquena iroashinoncayena,
 iro cantaincha imatacaaquena Tasorentsi, notsoncajeitaqueri.
 12 Ishoncajeitaquena iquempetacari sanipee iquisasanojeivetaca;
 iro cantaincha intsipaite icatsimareanaji,
 oquempetacaro amorecatsiri otsivaqui totseequimashi.
 ¡Imatacaaquena Tasorentsi notsoncajeitaqueri!
 13 Imanajeivetaquena, oquempetaca itatsincajeitaquena iroimpariyena;
 iro cantaincha yamitacotaquena Tasorentsi.
 14 Irotaque nopampoyeacoventantariri;
 tempa iriotaque shintsitacaanari.
 Iriotaque oavisacotanari
 15 Anta ivancopeequi quemisantiriri Tasorentsi,
 iquimoshirejeiti ipampoyeacoventiro yanaacojeitantaque, icanti:
 “¡Imatasanotiro Tasorentsi itasorencaqui!
 16 ¡Imatasanotiro Tasorentsi caari aneapiniti,
 yanaacotanti!”
 17 ¡Eiro nocamitatsi, naneavaquetsita
 nonquenquetsatacotantearori imataqueri Tasorentsi!
 18 Yoashinoncaasanovetaquena,
 iro cantaincha te irishinetenaji noncame.
 19 ¡Pashitareenaro ashitacoropee ivanco Tasorentsi,
 nocoi nonqueanaque nompasonquiteri!
 20 Irotaque irashitacoro Tasorentsi;
 aitaque inqueajeiterori quemisantajeitiriri.
 21 Notasorentsite, nopasonquitasanotimpi;
 pamitacotaquena, tempa avirotaque oavisacotanari.
 22 Ora mapi cameetsacotari
 vojocaqueri vetsicajeitirori Inantari Tasorentsi;
 iro cantaincha opeanaja otincami.
 23 Iriotaque Tasorentsi mataquerori, irotaque avajeitantanacarori
 cavaco.
 24 Irotaque oca quitaiteri imatantacarori Tasorentsi.
 Ocameetsati meeca anquimoshiretasanojeite aisati avereajeitea.
 25 ¡Notasorentsite, nocoi poavisaacojeitena!
 ¡Nocoi pisavicaaajeitena cameetsa!
 26 ¡Cameetsataque yora pocatsineri intianqueri Tasorentsi!
 Anta Ivancoqui ancantari Tasorentsi intasoncacoventajeitempi.

- 27 ¡Iriotaque Tasorentsi Avincatsarite, oimoshirecajeiteene!
 Pintearo piveshireimentajeiteari
 aisati paajeitanaque compiroshipee
 anta oshevatapeequi altar.
- 28 Oshequi nopasonquitimpi,
 aisati nocantacotero pimatasanojetaqueri;
 tempa avirotaque Notasorentsite.
- 29 Pimpasonquijeiteri Tasorentsi;
 tempa icameetsatasanoti, icantani inintasanojetaquee.

Yoveshireimentacaro icantacantiri Tasorentsi

— 1 —

- 119** 1 Inquimoshirejeite caari timantsine irantane,
 irointi iquemisantasanotiro yoametantiri Tasorentsi.
- 2 Inquimoshirejeite quenqueshiretirori icantacantiri,
 icantani icoashiretasanotiri,
- 3 yora caari antayetiro caari cameetsatatsi;
 aisati quearioventirori icoacairiri Tasorentsi.
- 4 Avirotaque cantacantaquerori irimoncaratasanoyeetero
 picantacantiri.
- 5 ¡Cantenane irosati noncantea nonquemisantero picantacantiri!
- 6 Tecatsi nompashiventimenteari
 ariorica nonquemisantero picantacantiri.
- 7 Noncantacoshireasanotempi: Picameetsati,
 ariorica niotasanotanaquero picantacantiri queariotatsiri.
- 8 ¡Nocoasanotaque nomoncaratero picantacantiri!
 ¡Eiro pojocanatsi catsini!

— 2 —

- 9 ¿Paita iranteri evancari irisavicanteari cameetsa?
 ¡Inquemisantasanotero ocantayetiri pineane!
- 10 Nocoashiretasanotaquempi;
 eiro pishinetanatsi nompeacotearo picantacantiri.
- 11 Noquenqueshiretapinitiro pineane,
 eiro nantimotantimpirotsi caari cameetsatatsi.
- 12 ¡Notasorentsite, picameetsatasanoti!
 ¡Poametasanotenaro picantacantiri!
- 13 Nonquenquetsatacotero
 maaroni picantacantiri picantasanojetaqueri.
- 14 Oshequi oimoshirenquena picantacantiri,
 anaacotiro maaroni timimoyevetenaneri.

- 15 Noncanteani nonquenqueshiretero picantacantiri
aisati nomatasanotero picoacaanari.
16 Oshequi noquimoshireventiro picantacantiri;
eiro catsini nopeacotarotsi pineane.

— 3 —

- 17 ¡Poaneasanotena; tempa naro quemisantimpiri,
nonquemisantasantearori pineane!
18 Piotacaasanotena nonquenqueshiretantearori
cameetsayetatsiri poametantiri.
19 Naro pashinisati aca quipatsiqui,
eiro pimanapitsatanarotsi picantacantayetiri.
20 Nocantani nopomerentsiventaro quitaiteripeequi
nocoasanotaque niotero picantacantiri.
21 Picantimentiri shemejeitatsiri aisati caari cameetsatatsi
yora jocajirori picantacantiri.
22 Pinijantareacoventena icantimatana aisati itseencana;
tempa noquemisantiro picantacantiri.
23 Incoasanoyevetea neaperojeitachari iroashinoncayena;
tempa narotaque quemisantimpiri
noncanteani nonquenqueshiretero picantacantiri.
24 Oshequi noquimoshireventiro picantacantayetiri;
tempa irotaque oametanari.

— 4 —

- 25 Irotaintsi noncame, nocoli poaneajena,
pimoncaratero picantasanotaquenari.
26 Nocamantasanotaquempiro nantayetaqueri
aisati pamitacotaquena.
¡Poametasanotenaro picantacantiri!
27 Piotacaasanotena, nomatantearori picantacantiri,
aisati nocoasanotaque nonquenqueshiretero pimayetaqueri caari
ineapiniyeeti.
28 Oshequi niraaca opomerentsitimotaquena,
pishintsishireacayena, pimoncaratenaro picantaquenari.
29 Pojocaacoventena, eiro notseeyantatsi,
pincavintsayena, poametenaro picantacantiri.
30 Nocoanontacaro nosavicanteari cameetsa,
aisati nocoasanotiro picantacantiri.
31 Notasorentsiti, quiso noaquero picantacantiri;
¡eiro pishinetanatsi nompashiventea!
32 Nonquearioventasanotero nomoncaratero picantacantayetiri;

tempa oshequi oquimoshiretacaquena.

— 5 —

- 33 Notasorensite, poametasanotenaro ocantayetiri picantacantiri;
tempa nocoasanotaque noncanteani nonquemisantero,
irosati overantapempa.
- 34 Piotacaasanotena nomatantearori poametanari.
¡Nonintashireasanoti nonquemisantero!
- 35 Pimatacayenaro ocantayetiri picantacantiri;
tempa irotaque quimoshiretacaanari.
- 36 Pincantacaashiretena noncoasanotero picantacantiri,
eiro nocoantarotsi naantayetearo caari picoacaana.
- 37 Eiro pishinetanatsi nonquenqueshireteri ijitasorensitashiyeetari,
iointi poaneasanotena nonquearioventantearori picoacaanari.
- 38 Pimoncaratenaro picantasanotaquenari,
ora picantaqueriri pincatsajetimpiri.
- 39 Pinijantareacoventena notsaroaque icantimayeetana,
tempa ocameetsatasanotaque picantacantiri.
- 40 Nocoasanotaquero picantacantayetiri.
¡Poaneasanotena; tempa aviro cameetsatasanotatsiri!

— 6 —

- 41 Notasorensite, ponijaasanotenaro pinintana aisati poavisaacotena;
pimoncaratero picantasanotaqueri.
- 42 Irotaque nancanteariri cantimatanari;
tempa noshiretacaro pineane.
- 43 Eiro paapitsatanarotsi pineane queariotasannotatsiri
noneanatantearo;
tempa irotaque noshiretacari picantacantiri.
- 44 ¡Nocoaque nantapinitero poametaquenari,
noncantaitiyempani!
- 45 Irotaque nontimanteari cameetsa;
tempa noquemisantaquero picantacantiri.
- 46 Nonquenquetsateneri pincatsariyetatsiri picantacantiri;
eiro nopashiventacaarotsi nonquenqueshiretero.
- 47 Tempa nonintasanotaquero picantacantayetiri,
oshequi noquimoshireventasnotiro.
- 48 Nonintasanotiro picantacantiri, nocoasanotiro,
aisati oshequi noquenqueshireacotasnotiro.

— 7 —

- 49 Pinquenqueshiretajero pineane picantaquenari,

- irotaque matacaaquenari noshiretantaquempiri;
 50 Irotaque oimoshirencanari noashirevetaca,
 niotaque ari poaneajena, tempa picantasanotaquena.
 51 Icantani icantimataquena shemejeitatsiri,
 iro cantaincha te nompeacotearo poametaquenari.
 52 Notasorensite, noquenqueshiretasanotiro peerani picantacantiri,
 irotaque oimoshirencanari.
 53 Yora caari cameetsajeitatsi jocanjirori poametantiri;
 iquisacaasanotaquena.
 54 Ora picantacantiri nopampoyeacoventaquero,
 aca quipatsiqui, nosavicantashitacari.
 55 Notasorensite, noquenqueshiretimpi tsiteniriqui.
 ¡Nocoaque nomatero poametantiri!
 56 Irotaque picoacaanari: nonquemisantero picantacantiri.

— 8 —

- 57 Notasorensite, aviro nocoasanotiri apaniro,
 nocantasanotimpi nomatero ocantayetiri pineane.
 58 Nocoashiretaque nantempiro pinintiri;
 paacameetsatena, pimoncaratero picantaqueri.
 59 Noquenqueshireacotaja jaoca nocantari,
 impoiiji noquemisantajiro picantacantiri.
 60 Noshintsiventaquero, te noisamaninquero
 nomataquero picantacantiri.
 61 Ishoncajevetaquena caari cameetsajeitatsi,
 icoaveta iroashinoncajena;
 iro cantaincha te nompeacotearoji poametantiri.
 62 Nianquiitene notinaaja nopasonquitimentimpiro
 queariotasanotatsiri picantacantiri.
 63 Narotaque tsipavintsatariri pincatsajeitimpiri,
 aisati yora moncarajeitirori picantacantiri.
 64 Tasorensi, pitsoteayetiro maaroni quipatsiqui pinintasanotanti;
 ¡poametenaro picantacantayetiri!

— 9 —

- 65 Notasorensite, picavintsaquena,
 pimoncaratiro picantaquenari,
 66 Poametasanotena nonquenqueshiretea cameetsa, niotantearori
 queariotatsiri;
 tempa noshiretasanotacaró pineane.
 67 Tequerani poashinoncajena, oshequi nantayetaquero caari
 cameetsatatsi,

- iro cantaincha meeca noquemisantasanotiro pineane.
 68 Aviro cameetsatasananotsiri matasanotirori cameetsayetatsiri,
 ¡Poametasanotenaro picantacantayetiri!
 69 Yora cantimatantatsiri, icantacotashiyetaquena;
 iro cantaincha nomoncaratasanotiro picantacantiri.
 70 Te irimateroji inquenqueshirejeitero tampaticatatsiri;
 naintiquea noquimoshireventiro poametanari.
 71 Ocameetsataque poashinoncaquena,
 irotaque niotantacarori picantacantayetiri.
 72 Ocameetsatimotaquena pineane poametaquenari,
 anaacotiri shequiasanovetachari oro aisati plata.

— 10 —

- 73 Tempa avirotaque vetsicaquenari;
 piotacaasanotena niotantearori picantacantayetiri
 74 Yora pincatsajetimpiri inquimoshirejeite ariorica irineaquena;
 tempa noshiretasanotacaró pineane.
 75 Tasorentsi, niotaquero ocameetsatasanotaque picantacantiri,
 aisati piqueariotaque, poashinoncantaquenari.
 76 ¡Pinintasanotaquena, irotaque oimoshirencanari,
 pimoncarataquero picantasanotitaquenari!
 77 Piotacaasanotenaro queario pineshinoncatana,
 nocoaque poaneajena;
 tempa noquimoshireventiro poametantiri.
 78 Poashiventayeri shemejeitatsiri;
 tempa yoashinoncaashitaquena, tecatsi nantavetea.
 Naroquea nainti nocoasanotaque nonquenqueshiretero
 picantacantiri.
 79 Nocoaque incarajeitena pincatsajetimpiri,
 yora iojeitirori picantacantiri.
 80 Noninti noncameetsashiretimentero picantacantayetiri,
 tecatsiquea nompashiventimenteari.

— 11 —

- 81 Nocoasanotaque poavisaacotena,
 ¡tempa noshiretacaró pineane!
 82 Macotapaaquena nocatsijaquitanaque noquiqui;
 tempa osamani noyecovetaquempi pimoncaratenaro
 picantasanotaquenari.
 Nocanti: “¿Jaoca oncarate pimpoque poimoshirenquena?”
 83 Omavetaquea nanteashipatasanotaque
 tecatsi nomataje, aisati ipeacoyeetanaquena;

- iro cantaincha te nompeacotero picantacantayetiri.
 84 ¿Jaoca oncarate noyeacotempi?
 ¿Jaoca oncarate pincantacovenanteariri oijanajeitaquenari?
 85 Yora cantimatantajeitatsiri, caari quemisantiro poametantiri,
 irointi icoaque iroashinoncayena;
 oquempetaca iquiashitaquena omoro navoqui.
 86 ¡Pamitacotena; tempa yoijanatashiyeetaquena,
 tecatsi nantavetea!
 ¡Ora picantacantayetiri oqueariotasanotaque maaroni!
 87 Irovetaincha noncameme aca quipatsiqui,
 iro cantaincha te nompeacotearo picantacantiri.
 88 Poaneasanotena, pimincaratero pinintanti,
 impoiji nomincaratero picantacantiri.

— 12 —

- 89 Tasorentsi, ora pineane oncantaitiyempani;
 ocantani ontime inquitequi.
 90 Picantani pimincaratiro pantayetiri,
 poasantaquero quipatsi, oquisotantanacari.
 91 Maaroni povetsicayetaqueri ocantani otimi,
 omoncarataca maaroni picantacantiri;
 tempa avirotaque iranteneri maaroni picoacaaqueriri.
 92 Eirome oimoshirencaname picantacantiri,
 ari oamaaquenamo oashiretantsi.
 93 Eiro catsini nopeacotaro picantacantayetiri;
 tempa irotaque oaneaquenari.
 94 ¡Poavisaacotena; tempa narotaque pashitacari,
 noquemisantaquero picantacantiri!
 95 Yora caari cameetsajeitatsi yoyeaquena iroyena,
 iro cantaincha noquemisantasanotiro picantacantiri.
 96 Niotasanotaque ontsoncajea paitapeerica,
 irointiquea picantacantayetiri oncanteani ontime.

— 13 —

- 97 ¡Oshequi nonintasanotiro poametanari!
 ¡Aisati noquenqueshiretapinitiro maaroni quitaiteriqui!
 98 Ora picantacantayetiri, noncanteani nashitearo;
 oshequi iotacaasanotaquena, anaacotiri quisajeitanari.
 99 Niotasanotiro nanaacotiri maaroni oamejeivetanari;
 tempa noquenqueshiretasanotiro picantacantiri.
 100 Niotasanotiro nanaacotiri aisati anteashipatasanotatsiri;
 tempa noquemisantasanotiro picantacantayetiri.

- 101 Nojocaquero maaroni caari cameetsatatsi,
nomatantearori nomoncaratero pineane.
- 102 Te nompeacotearoji picantacantayetiri;
tempa avirotaque oametanarori.
- 103 Ora picantasanotaquenari ocameetsatasanoti catsini,
anaacotiri ipochati ija pitsi.
- 104 Ora picantacantayetiri, iotacaasanotaquena,
irotaque caari nonintantaro maaroni yantayeetiri tseeyjeitachari.

— 14 —

- 105 Ora pineane iotacaana nosavique cameetsa,
oquempetacari tsiorontsi aisati quitaiteri onijanaro avotsi.
- 106 Nocantasanotaque, aitaque nomoncarataquero:
“Nomatempio queariotasanotatsiri picantacantiri.”
- 107 Tasorentsi, oshequi opomerentsitimotaquena.
¡Nocoaque poaneajena, pimoncaratero picantaqueri!
- 108 Pineacameetsatero noncantacotempi: Picameetsati,
aisati poametenaro picantacantayetiri.
- 109 Ocantani omapocaquena covencatatsiri noncamanteari,
iro cantaincha te nompeacotearo poametanari.
- 110 Yora caari cameetsajeitatsi icoaque iroashinoncajena,
iro cantaincha te nompeacotearo picantacantiri.
- 111 Irotaque nashitacari picantacantayetiri, oncantaitiyempani ontime;
irotaque oimoshirencanari.
- 112 Nocoashiretaque nomatero picantacantiri,
noncantaitiyempani, irosati ovecarantaroriqui.

— 15 —

- 113 Te noneacameetsateri tseyari, shiacantavetachari iquemisanti,
irointi noneacameetsati poametanari.
- 114 Avirotaque naventari, jocaacoventanari;
noshiretacaro pineane, pimoncaratiro picantiri.
- 115 ¡Avirojei caari cameetsatatsi, pinijantareena,
nocoasanotaque nomoncaratero icantacantiri Notasorentsite!
- 116 Pishintsitacaajena; pimoncaratero picantiri, naneasanotantanajeari;
¡Eiro pamatavitanatsi, tempa noyecotaquero picantiri!
- 117 Pamitacotena, navisacotantajeari,
irotaque nomoncaratantearori picantacantayetiri, noncantaitiyempani.
- 118 Te pineacameetsateri peacojeitarori picantacantiri;
tempa te oncameetsate iquenqueshirejeitiri.
- 119 Yora caari cameetsajeitatsi pojocajeitaqueri, piquempetacantaqueri
cajara;

irotaque noneacameetsatarori nainti picantacantayetiri.
 120 Oshequi nopioncaque notsaroacaaquempi,
 irotaque nopincatsatantacarori picantacantayetiri.

— 16 —

121 Te catsini nojoqueroji nantero cameetsatsiri,
 eiro pishinecoventanatsi iranaacotena quisajeitanari.
 122 Aviro amenacoventenane nontimanteari cameetsa;
 te noninte iroashinoncayena cantimatantajeitsiri.
 123 Macotapaaquena nocatsijaquitaque noquiqui noyecotaquempi
 poavisaacotena,
 aisati noyecotaquempi pisavicacaajena cameetsa,
 pimincaratero picantitacari.
 124 Pincavintsayena; tempa pinintasanotana.
 ¡Poametasanotenaro picantacantayetiri!
 125 Narotaque quemisantimpiri, piotacaasanotena,
 nocoí niotasanotero picantacantiri.
 126 Tasorentsi, moncarataca poashinoncante;
 tempa ainiro oshequi piatsajeitacarori poametantiri.
 127 Irotaque nonintantacarori nainti picantacantiri,
 ocameetsatasanotaque anaacotiri iyoshitachari oro.
 128 Irotaque nomatantatarori picantacantayetiri,
 te noninteroji catsini yantayeetiri tseyachari.

— 17 —

129 Ocameetsatasanoti picantacantayetiri,
 irotaque noquemisantantarori.
 130 Yora oametantirori pineane iotacanti,
 oametasanotiri atiri caari iotatsi.
 131 Nocoasanotaque catsini niotero picantacantiri.
 132 Pamenacoventasanotena pineshinoncatena,
 piquempetiri maaroni nintasanotimpiri.
 133 Pimatacayena nantasanotero ocantiri pineane,
 eiro pishinetanatsi omperanatena caari cameetsatsi.
 134 Pojocaacoventena yoashinoncaaquena atiripee,
 tempa nocoaque nomoncaratero picantacantayetiri.
 135 Nocoaque quiso poyena, pintasoncacoventena;
 tempa narotaque quemisantimpiri,
 aisati poametasanotenaro picantacantiri.
 136 Oshequi niraaca amaraatanaque nojaqui;
 tempa te impincatsayeetero poametantiri.

— 18 —

- 137 Notasorensite, aviro cameetsatatsiri
aisati otampaticati picantacantiri.
- 138 Maaroni picantacantayetiri ocameetsataque
aisati oqueariotaque catsini.
- 139 Oshequi notsaneacoventacaro pineane, ocantimonentaquena;
tempa ipeacotasanojeitacaro quisajeitanari.
- 140 Ora picantasanotaqueri, noneaquero oqueariotasanaotaque;
irotaque nonintantarori, tempa naro quemisantimpiri.
- 141 Tecatsi nojitaquea aisati itsenqueetana,
iro cantaincha te nompeacotearo picantacantiri.
- 142 Picantani picantacoventanti cameetsa
aisati poametantiri oqueariotasanoi.
- 143 Oshequi opomerentsitimotana aisati noquenqueshireaca,
iro cantaincha oquimoshiretacaasanotana picantacantayetiri.
- 144 Ora picantacantiri ocantani ocameetsasasanoi,
piotacaasanotena nosavicanteari cameetsa.

— 19 —

- 145 Notasorensite, nocajemasanotimpi: “¡Pamitacotena,
tempa nocoasanoti nomoncaratero picantacantayetiri!”
- 146 Aviro nocajemiri, pamitacotena,
nomatantearori nomoncaratero picantacantayetiri.
- 147 Tequerata onquitaiteaje notinaa nocoacotimpi pamitacotena;
tempa noshiretasanaotacaro pineane.
- 148 Maaroni tsiteniriqui nosaaquiti,
noquenqueshiretiro picantasanotanari.
- 149 Notasorensite, pinquemena noquenquetsatacainpi;
tempa pinintana.
Poaneasanotajena, pimoncaratenaro cameetsayetatsiri.
- 150 Iquempejijeitaquena oijanataquenari caari cavintsaajeitantatsi,
te incoyeroji inquemisantero poametantiri.
- 151 Iro cantaincha, Notasorensite, pitimi quempeji
aisati oqueariotasanaotaque maaroni picantacantiri.
- 152 Peerani niotaquero picantacantayetiri;
oncantaitiyempani ontime.

— 20 —

- 153 Pineaquena oshequi nashinoncaaca, pojocaacoventajena;
tempa te nompeacotearo poametantiri.
- 154 Pinticaacoventena aisati poavisaacotena;

- poaneajena, pimoncaratero picantaquenari.
 155 Te catsini pamitacoteriji caari cameetsajeitansi;
 tempa te inquemisantero picantacantiri.
 156 Tasorentsi, oshequi picavintsantasanoti,
 poaneajena, pimoncaratenaro picantasanotiri.
 157 Oshequi quisajeitanari oashinoncantatsiri,
 iro cantaincha te nompeacotearo picantacantiri.
 158 Te namaveteri aacantantajeitatsiri
 yora caari quemisantiro picantacantiri.
 159 Notasorentsite, piotasanotana nonintasanotiro picantacantayetiri.
 ¡Poaneajena; tempa pinintana!
 160 Maaroni pineane oqueariotasanoti,
 oncantaitatitempani onttime maaroni picantacantiri.

— 21 —

- 161 Yora neaprojeitachari yojianajeitaquena, tecatsi nantavetea;
 iro cantaincha nopincatsashiretiro pineane.
 162 Oshequi noquimoshireventiro picantasanotiri,
 oquempeta intimimotasanotena pinatasanoyetachari.
 163 Noquisanentiro tseeayantsi, te namavetero,
 irointiquea nonintasanotiro poametantiri.
 164 Maaroni quitaiteripeequi nocantacotimentimpro:
 ocameetsati picantacantiri,
 165 Yora nintasanotirori poametantiri,
 iquimoshirejeiti isaviqui cameetsa;
 tecatsi oashinoncayerine.
 166 Tasorentsi, noyeadotimpi poavisaacotena;
 tempa nantaquero picantacantayetiri.
 167 Noquemisantaquero maaroni picantacantiri,
 nonintashiretasanotiro catsini.
 168 Noquemisantasanotiro picantacantayetiri;
 tempa piotasanotiro maaroni jaoca nocantari nosaviqui.

— 22 —

- 169 Tasorentsi, pinquemisantero antearojenca noquenquetsatacaimpi.
 ¡Piotacayena, pimoncaratero pineane!
 170 Nocoaque pinquemisantero noquenquetsatacaimpiri.
 ¡Pojoacaoventena pimoncaratero picantiri!
 171 Pimatacaasanotenaro noncantacotempi: Picameetsati;
 tempa aviro oametaquenarori picantacantayetiri.
 172 Ocameetsati nompampoyeacoventero picashiacaanari;
 tempa ocameetsatasanoti maaroni picantacantiri.

- 173 Intsipaita pamitacotena;
tempa nocoyeanontacaro picantacantiri.
- 174 ¡Tasorentsi, nocoasanoti poavisaacotena!
¡Oshequi noquimoshireventaquero poametantiri!
- 175 Nocoaque naneaje noncantacotantempiri: Picameetsati,
nocoaque amitacotena cameetsatsiri poametanari.
- 176 Nopeaca noquempetacari ovisha iquenashita.
¡Pimpoque poavisaacotena;
tempa te nompeacotearoji picantacantayetiri!

Iquenquetsatacairi Tasorentsi opomerentsitimotacari

- 120** ¹ Ariorica opomerentsitimotana,
noquenquetsatacairi Tasorentsi,
ari yamitacotana.
- ² Notasorentsite, pojocaacoventenaro
itseeയാashaíyetanari, yora amatavitantatsiri.
- ³ Avirojei tseeயajeitachari,
¿jaoca incanteetempiri iroashinonqueetempi?
- ⁴ ¡Irishinetempi inquentempi manajeitachari!
¡Ontayempi amorecajencatatsiri caari tsivacanetatsi!
- ⁵ ¡Naroquea oshequi nashinoncaaca,
nosavicashiyetaca nampitsiqui Mésec,
aisati nosaviquimotaqueri savicayetatsiri nampitsiqui Quedar!
- ⁶ Oshequi nosaviquimotaqueri caari coajeitatsi irisavicajeite cameetsa,
- ⁷ ¡Ariorica noneanatacotiro aacameetsatavacantsi,
iriori ineanajeitiro irimanatavacaajeitea!

Iriotaque jocaacoventimpiri Tasorentsi

- 121** ¹ Ariorica namenajeitiro maaroni toncaaripee, nosampita:
“¿Jaoca inquenapeeri amitacotenane?”
- ² Iriotaque Tasorentsi amitacotenaneri,
yora vetsicaquerori inquite aisati quipatsi.
- ³ ¡Eiro catsini ishinetimpitsi pashinoncaeya!
¡Eiro catsini ipeacotimpitsi yora quempoyeacoventimpiri!
- ⁴ Eiro catsini ipeacotaro
yora quempoyeacoventiriri ishanincajeitaniri Israel.
- ⁵ Iriotaque Tasorentsi quempoyeacoventimpiri;
iriotaque aisati ticaacoventimpiri,
quiso oajimpiri iramitacotantempiri.
- ⁶ Yora catsirincaiteri eiro itaimpitsi quitaiteriqui,
aisati cashiri eiro avishimotimpitsi paitapeerica tsiteniriqui,
- ⁷ Yora Tasorentsi inticaacoventempi maaroni covencatatsiri,

inquempoyeacoventempi eiro picamantatsi.

- 8 Incanteani meeca inquempoyeacoventempi
jaocapeerica pijayeteri.

Iveshireimentaro nampitsi Jerusalén

(Ivampoyeane David)

122

¹ Noquimoshireti ariorica icanteetena:

“¡Tsame ajate Ivancoqui Tasorentsi!”

- 2 ¡Meeca acatiimotapaacaro iqueantapiniyeetaroriqui
nampitsi Jerusalén!
- 3 Irotaque yovetsicanteetacarori irampatotapinijeitanteari
maaroni ishanincajeitaniri Israel.
- 4 Aitaque impocajeiteri maaroni ishanincajeitajari Tasorentsi,
incantacotanteariri: Icameetsati;
tempa irotaque icantaqueriri ishanincajeitaniri Israel.
- 5 Aitaque otimiri ivanco pincatsari David,
icantacoventapinitantari cameetsa,
- 6 Pincantashiretasanojeite:
“Nocoi irisavicajeite cameetsa
savicantajeitarori nampitsiqui Jerusalén,
eiro opomerentsitimotaritsi nintajeitirori;
- 7 Nocoi irisavicajeite cameetsa tsompoina otantotacoroqui,
tecatsi oajeiterine ivancopeequi pincatsari.”
- 8 Meeca noncanteri noshanincasanoripee
aisati tsipavintsajeitanari:
“Nocoacaquempi pisavicajeite cameetsa.
- 9 Aisati ora Ivanco Atasorentsite,
nocoaque intasoncacoventero.”

Ishiretasanotari Tasorentsi

123

¹ Aviro Tasorentsi, pincatsaritatsiri inquitequi,

noyecatimpi noquenquetsatacaimpi.

- 2 Iquempeta nampirentsi yoyecatiri nampitariri
aisati iroori tsinane oyeacotiro nampitarori,
aisati noquempejeitacari narori noyecosanojeitimpi,
Notasorentsite, pineshinoncatena.
- 3 Pincavintsaajeitena Tasorentsi, pincavintsayena;
te namavejeitero icantimajeitana quisaquenari.
- 4 ¡Oshequi catsini nashinoncaaca
ishirontimentajeitaquena ashitaarantincari,
aisati ipincajeitaquena shemejeitatsiri!

Tasorentsi, oavisacotiriri ishanincajeitaniri Israel

(Ivampoyeane David)

- 124** ¹ ¿Jaocame ancanteameri eirorica yamitacoteeme Tasorentsi?
 Pancajeite avirori ishanincajeitaniri Israel.
² “Eirorica yamitacojeiteeme Tasorentsi,
 ipocashijeitantaqueeri atiri imanajeitaquee,
³ itsoncajeitaqueeme, iroajeitee maaroni;
 tempa itsimaasanovetaquee catsini.
⁴ ¡Iquempejeivetacaro quimoja
 aajeitaqueeme maaroni, antsitiajeitaque!
⁵ ¡Aajeitaqueeme omotoncane covencajatatsiri,
 antsitiajeitaque!”
⁶ ¡Icameetsataque Tasorentsi;
 te irishinecoventeeji intsoncajeitee!
⁷ Ashiapitsajeitacaro covencatatsiri
 aquempetacari yora tsimeeri yarapitsatiro oashirentsi covintsari.
 Oquempetaca opesanaque iroashire,
 irosati ashiajeitantanaca.
⁸ Iriotaque Tasorentsi amitacojeiteeri;
 yora vetsicaquerori inquite aisati quipatsi.

Tasorentsi iticaacoventiri ishanincajeitajari

- 125** ¹ Yora shiretasanotariri Tasorentsi incanteani inquemisante,
 oquempeta toncaari Sión, ocantaitatiani otimi.
² Oquempeta toncaaripee oshoncayetacaro nampitsi Jerusalén,
 aitaque iquempetari Tasorentsi iticaacovenitiri meeca
 ishanincajeitajari,
 aisati incantaitatiyempani;
³ Yora pincatsari caari cameetsatsi,
 eiro icantani impincatsariventante quipatsiqui
 ipajeitaqueriri Tasorentsi ishanincajeitajari,
 eiroquea yantantarotsi caari cameetsayetatsi.
⁴ Tasorentsi, pintasoncacoventeri atiri savicatsiri cameetsa,
 yora cameetsashirejeitatsiri.
⁵ Irintiquea antajeitirori caari cameetsatsi,
 poashinoncaajeiteri incarajeiterita itseencaririnte.
 ¡Nocoaque irisavicajeite cameetsa ishanincajeitaniri Israel!

Yoipiantajariri Tasorentsi inampiqui

- 126** ¹ Yoipiajeitantajanari Tasorentsi nampitsiqui Sión,
 oquempetimotaquena nomishitaca.

- 2 Oshequi noquimoshirejeitanaji, antearojenca noquimoshirejeitaji.
Aisati icantajeiti pincatsatashijeitariri ijitasorensiyetiri:
“¡Yora Tasorensi imatasanotaqueneri ishanincajeitaniri Israel caari
ineapiniyeeti!”
- 3 Queario, imatasanotaqueero Tasorensi caari ineapiniyeeti,
oshequi aquimoshiretasanojeitaque.
- 4 ¡Tasorensi, poashiniajero,
pisavicacaajeitajena cameetsa aisati;
oquemmeta opashiniti caaraiteri ariorica oparii incani!
- 5 Yora panquiveejeitatsiri iriraajeivetea,
iraavajeitaquerorica, incajemajeite inquimoshirete.
- 6 Omavetaquea iriraajeivetea inquijacoterorica oitsoquipee
impanquiteri,
iro cantaincha impiajeitaje inquimoshirete impampoyeajeite,
iraamajeitaquero tirico oisopatirentsi iravinajeitaquero.

Iriotaque Tasorensi payeteerori maaroni

- 127** ¹Eirorica icantacantiro Tasorensi ovetsiquempa pancotsi,
irantsipetashitearo irantaveetero vetsicajeitirori.
Eirorica iticaacoventiro Tasorensi nampitsi,
yatsipetashita yamenacoventiro yora shentajeitirori.
- ²Patsipetashita picantani pantaveejeiti quitaiteriqui irosati ishaaviniji,
pipomerentsiventiro poajeiteari.
Tempa yora Tasorensi ipaajeitiri inintajeitiri cameetsa, imaoreajeiti.
- ³Yora atomipee aisati ashintopee timimojeitaqueeri,
iriotaque itasoncacoventaqueeri Tasorensi.
- ⁴Yora atomipee aisati ashintopee
timayetanaintsiri evancarijeitantapaacari;
iquempejeitacaro ichacopitepee manajeitachari.
- ⁵¡Inquimoshirejeite yora atiri otimimotiri oshequi ichacopitepee
quempetariri yoca!
Eiro yoashiventantaritsi quisajeitiriri
ariorica impiacoventea anta cantacoventantatsiriqui.

Itasoncacoventiri pincatsatiriri Tasorensi

- 128** ¹Pinquimoshirete aviro pincatsatiriri Tasorensi,
aisati piquemisantiri.
- ²Poajeitearo oitsoquipee pipanquiyetiri,
pinquimoshirejeite, aisati pisavique cameetsa.
- ³Anta pivancoqui, ora pijina
onquempetearo ova timasanotatsiri ocavi;
yora pitomipee pincarajeiteri poacaajeiteari,

- inquempejetearo orivo iroaquera shiocajempequitatsi.
 4 Aitaque oncanteari intasoncacoventeri Tasorentsi pincatsatiriri.
 5 ¡Nocoaque intasoncacoventempi Tasorentsi anta toncaariqui Sión!
 ¡Nocoaque pineero intasoncacoventeri savicajeitatsiri nampitsiqui
 Jerusalén
 maaroni quitaiteriqui ainiroquera pane!
 6 ¡Nocoaque pineajeiteri picharinepee!
 ¡Nocoaque irisavicajeite cameetsa ishanincajeitaniri Israel!

yoipacaacoventanti Tasorentsi

- 129** ¹ Oshequi opomerentsitimotaquena nevancaritantapaaniri.
 Ocameetsati meeca irampiitajero ishanincajeitaniri Israel:
² “Peerani nevancaritantapaacari,
 oshequi opomerentsitimotaquena,
 iro cantaincha tecatsi anaacotenane.
³ Ipasayeevetaquena notapiiqui, icharincaquena,
⁴ iro cantaincha icameetsataque Tasorentsi,
 yojocaacoventaquena yoashinoncaavetaquena
 yora caari cameetsajeitatsi.”
⁵ ¡Impashiventasanojeiteata aisati irishiajeitanaqueta
 yora quisajeitiriri nampitsiquiniri Sión!
⁶ ¡Inquempejetearota tojari shiocatsiri otataroqui pancotsi,
 ora shimpeshitatsiri tequerarica intoqueetero!
⁷ Aisati inquempetearo tojari caari inecameetsati
 yora aviitirori tirico aisati oisoatiyetirori,
⁸ ora tojari, yora avisayetatsiri te incantero:
 “Intasoncacoventempi Tasorentsi.”
 Narojeiquea nainti nocantacoventajeitimpi Tasorentsiqui, intasoncac
 oventajeitempi.

Ishiretasanotacari Tasorentsi

- 130** ¹ Notasorentsite, naventasanotimpi;
 oquempetimotoaquena notimaque tsoompoina ocovencaiteti.
² ¡Pinquemisantero nocantimpiri, pamitacotena!
 ¡Nocajemaquempi naventimpi!
³ Notasorentsite, ari pinquenqueshireacotenarome
 caari cameetsatatsi nantayetiri,
 ¿Jaonica materone iramavetero incatiimotempi?
⁴ Iro cantaincha avinti pipeacotaquenaro,
 irotaque nompincatsatantempiri.
⁵ Noyeacotasantotiri Tasorentsi,
 aisati noshiretasanotaro irineane.

- 6 Noyeacosanotiri irinti Tasorentsi,
nanaacotiri shentacoventantatsiri yoyeiro onquitaiteanaje.
- 7 Aisati pinquempejeitea avirori ishanincajeitaniri Israel;
poyeacotasanoteri irinti Tasorentsi;
tempa inintasanojeitaquempi,
aitaque irojocaacoventasanojeitaquempi.
- 8 ¡Iriotaque oavisaacojeitempirone caari cameetsayetatsi pantajeitiri!

Ishiretasanotacari Tasorentsi iquempetacari jananequi

(Ivampoyeane David)

- 131** ¹Notasorentsite, te noshemeshireteji,
te nojitacantashiyeteaji niotasanoi,
te noshemetimenteroji paitapeerica nomayevetari
aisati te noncoasanoyeteroji caari nomati niotacotero.
- ²Irointiquea nomajereti, cameetsa nosaviqui;
noquempetacari jananequi
iroaquera yojoquiro yatsoti otsompitiri iriniro.
¡Aitaque noquempetacariri narori!
- ³Avirojei ishanincajeitaniri Israel,
poyeacoteri meeca Tasorentsi, irosati pincanteani.

Icashiacaasanotaqueriri Tasorentsi David

(2 Crón. 6.41-42)

- 132** ¹Tasorentsi, pinquenqueshireteri David,
aisati maaroni pomerentsitimoyetacariri;
- ²aisati pinquenqueshiretero icantasanotaquempiri,
avirotaque Tasorentsi mayetirori maaroni,
yora iquemisantiri Jacoboni.
- ³“Eiro noqueirotsi novancoqui,
aisati eiro nonareatsi nomacoreanteari,
⁴eiro nomatsioquitsi nomanteari capichaji,
⁵eirorica noneitatsi Pancotsi irinanteariri Tasorentsi,
mayetirori maaroni, iquemisantiriri Jacoboni.”
- ⁶Anta nampitsiqui Efrata aitaque noquemacotajirori Cajón
otimantari Icantacantiri Tasorentsi,
aitaque noneajirori iroanequi Jaar.
- ⁷Ari nocantajeiti: “¡Tsame ajajeite Inantariqui Tasorentsi!
¡Antiyeroashijeitapempari!”
- ⁸Novincatsarite, pimpoque aca toncaariqui
pincaratapaajero Cajón otimantari pitasorenca, pinantapaajero.
- ⁹¡Nocoacaqueri antaveeyetatsiri Pivancoqui,
irantajeitero cameetsayetatsiri,

- aisati yora quemisantimpiri
incajemajeite inquimoshirete!
- 10 Tempa pinintasanotaqueri David, yora quemisantimpiri,
eiro pipeacotaritsi yora pincatsari picoyeaqueri.
- 11 Yora Tasorentsi icantasanotaquerini David;
eiro opeatsi catsini:
- 12 “Yora pishanincajeitajeari coajicani
irio poyetajempineri impincatsaritaje.
Ariorica irimoncaratero nocantasanotaqueriri,
jero nocantacantayetiri noamejeiteriri,
aisati inquempetajea itomipee iriori,
impincatsaritaje pivincatsarimentoqui, incataitatiyempani.”
- 13 ¡Yora Tasorentsi, icoyeaquero toncaari Sión intimanteari!
- 14 Tempa icanti: “Irotaque oca toncaari
nocoasanotiri nontimantearo, noncanteani.
- 15 Nontasoncacoventero oca nampitsi
ontimasanote oanarontsi iroajeiteari coiteaveetatsiri.
- 16 Nomatacaasanojeiteri antaveeyetatsiri Novancoqui,
noncantacaajeiteari incajemajeite inquimoshirete yora
quemisantajeiterone.
- 17 Aitaque nomatacaasanoteriri irishanincatajeari David,
impincatsaritanote;
nomataquero novetsicaqueneri quempetarori tsiomentotsi
irashi pincatsari nocoyeaqueri.
- 18 Yora quisajeiterineri, noncantacaajeiteari impashiventajeitea,
irintiquea iriori nontasoncacoventeri impincatsariventante
cameetsa.”

Iquimoshirejeiti quemisantatsiri iquempeavacaajeitaca

(Ivampoyeane David)

- 133** 1 ¡Ocameetsatasanotaque catsini
ariorica iquempeavacaajeita quemisantatsiri,
isavicajeiti cameetsa, yaacameetsatavacaajeita!
- 2 Oquempetacaro casancajari isainayeetantariri iitoqui
antaveeyetatsiri Tasorentsi Ivancoqui,
aisati amaraatanaqueri ishipatonaqui
irosati itsanoqui overapaaca iitsaare.
- 3 Aisati oquempetacaro incanijenca poneachari otishiqui
Hermón,
opariajencatapaaque aisati toncaaripeequi Sión.
Aitaque oponeari itasoncacoventanti Tasorentsi,
iraneantajeiteari osamani.

Intasoncacoventajeitempi Tasorentsi

- 134** ¹ ¡Tsame, maaroni quemisantajeitiriri Tasorentsi,
savicajeitatsiri ivancoqui tsiteniripeequi,
pincantacojeiteri Tasorentsi: Icameetsati!
- ² ¡Poancajeitero pacopee Inantari!
¡Pincantacojeiteri Tasorentsi: Icameetsati!
- ³ ¡Nocoaque intasoncacoventajeitempi Tasorentsi anta nampitsiqui
Sión;
tempa iriotaque vetsicaquerori inquite aisati quipatsi!

Imatasanoyetaqueri Tasorentsi caari ineapiniyeeti
(*Sal. 115.4-11*)

- 135** ¹ ¡Icameetsataque Tasorentsi!
¡Pincantacojeiteri Tasorentsi: Icameetsati!
pincantacoteri; avirojei quemisantajeitiriri; Icameetsati.
- ² savicajeitatsiri ivancoqui Atasorentsite aisati oyaaraiteritequi.
- ³ Ocameetsati pincantacojeiteri: Icameetsati;
tempa iriotaque cameetsatasanotatsiri.
Pimpampoyeajeiteneri pampoyeantsipee;
tempa iriotaque cavintsantasanotatsiri.
- ⁴ Tempa icoyeaqueri Jacoboni, pajitachari aisati Israel,
ishanincatasanotajari.
- ⁵ Niotasanotaqueri Atasorentsite, Itasorentsitasanoti,
yanaacotasanotiri maaroni ijitasorentsitashiyeetari.
- ⁶ Imatasanotiro Tasorentsi paitapeerica icoiri,
anta inquitequi jero aca quipatsiqui
aisati incajarequi sanajatatsiri.
- ⁷ Itimacairo mencori otsoteiro maaroni quipatsi
aisati imatacairi porecatsiri ayotantari ompariye incani, aisati
itampeatacairo.
- ⁸ Iriotaque oamaitajeitaqueriri itomipeeni egiptosati jivayevetachaniri
itimi,
aisati ivirapee jivayetatsiri itimi.
- ⁹ Yonijantaquero itasorenca Egiptosanoriqui
itiancaqueneri pincatsari jeri amitacoyevetariniri caari
ineapinijeiti.
- ¹⁰ Yoamaajeitaqueri savicayevetachari nampitsipeequi
aisati yoamaajeitaqueri pincatsaripeeni neaperoyevetachaniri:
- ¹¹ yora Sihón, ivincatsariteni amorropee,
aisati Og, pincatsariventironiri Basán
aisati maaroni pincatsariyevetachaniri quipatsiqui Canaán.

- 12 Ora iipatsitepeeni pincatsariyevetachaniri,
ipajeitaqueri ishanincajeitajari,
yora ishanincajeitaniri Israel, isavicantajeitacari.
- 13 Tasorentsi, picantani pitimi;
pincanteani inquenqueshireacoyeetempi.
- 14 Yora Tasorentsi cameetsa icantacoventajeitiri ishanincajeitajari,
icavintsaajeitiri quemisantajeitiriri.
- 15 Yora pincatsatashijeitariri ijitasorentsiyetiri,
irisati vetsicashiyetaro oro jero plata,
- 16 Otimaveta ovante, te oneaveete,
otimaveta oqui, te oneeji
- 17 aisati oyempita, te onquemeji,
te aneimateji catsini.
- 18 Aisati iquempejeitacaro iriori vetsicayetirori
aisati quemisantashitacarori.
- 19 Avirojei ishanincajeitaniri Israel,
pincantacojeiteri Tasorentsi: Icameetsati.
Avirojei antaveeyetiniri Ivancoqui,
pincantacojeiteri: Icameetsati.
- 20 Avirojei ishanincapeeni Leví,
pincantacojeiteri Tasorentsi: Icameetsati.
Avirojei pincatsajeitiriri Tasorentsi,
pincantacojeiteri: Icameetsati.
- 21 Icameetsataque Tasorentsi anta toncaariqui Sión,
yora savicatsiri nampitsiqui Jerusalén.
¡Icameetsataque Tasorentsi!

Icantani Tasorentsi inintasanojeitaqueri ishanincajeitaniri Israel

- 136** 1 Pimpasonquijeiteri Tasorentsi; tempa icameetsatasanoti;
tempa icantani inintasanojeitaquee.
- 2 Pimpasonquijeiteri Tasorentsi,
yora anaacotasannotiriri ijitasorensitashiyeevetari;
tempa icantani inintasanojeitaquee.
- 3 Pimpasonquijeiteri Tasorentsi,
yora pincatsariventiriri pincatsariyevetachari;
tempa icantani inintasanojeitaquee.
- 4 Yora matasanoyetirori apaniro paitapeerica caari aneapinijeiti;
tempa icantani inintasanojeitaquee.
- 5 Yora vetsicaquerori inquite,
otimasannotiri iotantari;
tempa icantani inintasanojeitaquee.
- 6 Yora antearoiteacaquerori quipatsi otimantacari incajarequi;

- tempa icantani inintasanojeitaquee.
- 7 Yora vetsicaqueriri catsirincaiteri aisati cashiri;
tempa icantani inintasanojeitaquee.
- 8 Yora vetsicaqueriri catsirincaiteri ivoreatsiri quitaiteeriqui;
tempa icantani inintasanojeitaquee.
- 9 Yora vetsicaqueriri cashiri aisati impoquiroppee quitasantetatsiri
tsiteniriqui;
tempa icantani inintasanojeitaquee.
- 10 Yora oamaitajeitaqueriri itomipeeni egiptosati jivayetatsiniri itimi;
tempa icantani inintasanojeitaquee.
- 11 Yora oimishitoajeitajiriri Egiptoqui ishanincajeitaniri Israel;
tempa icantani inintasanojeitaquee.
- 12 Yora matasanotaqueriri itasorencaqui paitapeerica;
tempa icantani inintasanojeitaquee.
- 13 Yora, tencareajataquerori incajare Quitioncari;
tempa icantani inintasanojeitaquee
- 14 Yora monteacaajeitaqueriri ishanincajeitaniri Israel incajarequi
nianqui;
tempa icantani inintasanojeitaquee.
- 15 Yora omitsiticojeitaqueriri pincatsarini aisati manajeitacharini
incajarequi Quitioncari;
tempa icantani inintasanojeitaquee.
- 16 Yora aajeitanajiriri ishanincajeitajari caaraiteriqui;
tempa icantani inintasanojeitaquee.
- 17 Yora oamaajeitaqueriri pincatsariyetatsiniri irioperoyevetachaniri;
tempa icantani inintasanojeitaquee.
- 18 Yora oamaajeitaqueriri pincatsariyetatsiniri
neaperotasanojevetachaniri;
tempa icantani inintasanojeitaquee.
- 19 Yora camaaqueriri Sihón ivincatsariteni amorreopee;
tempa icantani inintasanojeitaquee.
- 20 Yora camaaqueriri Og pincatsariventironiri Basán;
tempa icantani inintasanojeitaquee.
- 21 Yora paarantajeitaqueriri iipatsitepeeni pincatsariyevetachaniri;
tempa icantani inintasanojeitaquee.
- 22 Yora pajeitaqueriri isavicajeitancari ishanincajeitaniri Israel, yora
quemisantiriniri;
tempa icantani inintasanojeitaquee.
- 23 Yora quenqueshireacojeitajeeri icantatiani ashinoncaajeitavetacari;
tempa icantani inintasanojeitaquee.
- 24 Yora jocaacoventajeitaqueeri yoashinoncaajeivetaquee quisajeiteeri;
tempa icantani inintasanojeitaquee.

- 25 Yora pajeitiriri yoapinijeitari atiripee aisati iquempejeitaqueri iriori
poshiniripee;
tempa icantani inintasanojeitaquee.
- 26 ¡Pimpasonquijeiteri Tasorentsi inquitequiniri!
tempa icantani inintasanojeitaquee.

Isavicantajeitacani ishanincajeitaniri Israel nampitsiqui Babilonia

- 137** ¹ Nosavicantajeitacani otsapijaqui nija Babiloniaquiniri,
oshequi niraapinijeitacani noquenqueshiretapinijeitaquero
nonampi Sión.
- ² Anta nampitsiqui otimi inchatopee shiocayetapaatsiri, ipajiyeetiro
álamo,
aitaque nocasayeacoyetironiri arpapee.
- ³ Yora aajeitanaquenari, peranajeitaquenani aitaque icantajeitanari:
“¡Pimpampoyeajeite pinquimoshirejeite;
Nocoajeiti nonquemero pipampoyeapinijeitiniri pinampiqui Sión!”
- ⁴ ¿Jaoca noncanteari nompampoyeacoventashiveeteari Tasorentsi aca
pashiniqui nampitsi?
- ⁵ ¡Ariorica nompeacotaquearo nonampini Jerusalén,
oncameetsateme nonquisopacotanaque nacosanoriqui!
- ⁶ ¡Aisati eirorica noquenqueshirejeitajirotsi nonampi Jerusalén,
nonquimoshireventearori,
oncameetsateme ompatacanaquea nonene notapivantequi!
- ⁷ Novincatsarite, pinquenqueshirejeiteri yora edomitapeeni
ineantajeitacarori nampitsi Jerusalén itireeyetaquero
otantotacoyevetaniri;
tempa icantajeiti: “¡Pintsoncasanojeitero catsini,
pintireaasanojeitero, tecatsi timanajantsine!”
- ⁸ ¡Avirojei savicantarori Babilonia, coajica intsoncasanoyeetempi avirori!
¡Inquimoshirete oashinoncaajeitempineri
piquempejeitaquena narori poashinoncasanojeitaquena!
- ⁹ ¡Inquimoshirete aajeiterineri pitomipee
impishoncajeiteri imperitaqui, intsirajajeiteri!

Ipasonquitiri Tasorentsi

(Ivampoyeane David)

- 138** ¹ Tasorentsi, nocoashiretasanotaque nompasonquitimpi;
nompampoyempiro pampoyeantsipee,
irineajeitena tasorentsiyevetachari.
- ² Aisati nontiyeroimentempi, nomontetacotearo Pivanco
poameetsatiri,
nompasonquitimentempiro pinintajeitaquena,

- aisati oqueariotaque picantasanotiri.
 Tempa avirotaque Tasorentsisanori oaquerori pineane,
 panaacotaquero maaroni timayetatsiri.
- 3 Ariorica naventaquempi, pamitacotana,
 aisati pishintsitacaasanotaquena.
- 4 Maaroni pincatsariyetatsiri quipatsiqui,
 incantacojeitempi: Picameetsati,
 ariorica inquemacojeitero picantasanotaque.
- 5 Incantacojeiteri Tasorentsi, ocameetsajeiti yovetsicaqueri,
 tempa Itasorentsitsanotaque catsini.
- 6 Omavetaca isaviqui Tasorentsi jenoqui,
 yamenacoventiri caari shemejeitatsi;
 irintiquea shemejeitatsiri inijantareiri.
- 7 Ariorica noneero covencayevetachari,
 pojocaacoventana, eiro nocamanta;
 ponijaanaro pitasorenca aisati poavisaacotana
 inquisavetearica quisajeitanari.
- 8 ¡Yora Tasorentsi irimoncaratero cameetsa iramitacotena!
 Notasorentsite, picantani pinintasanotana.
 ¡Pimoncaratasanotero pintacari poavisaacotena!

Iotasanotiro Tasorentsi maaroni

(Ivampoyeane David)

- 139** ¹Notasorentsite, pitsoteaquero piotaquena jaoca nocantari;
² Piotasanotiro paitapeerica nantayetiri,
 omavetaquea pitimi areejiqui,
 piotiro paita noquenqueshireyetiri.
- 3 Piotasanotana jaocapeerica nojayevetari,
 piotasanotiro maaroni nantayetiri.
- 4 Notasorentsite, piotacotiro paitarica noncanteri,
 tequerata noneanateji.
- 5 Pitsoteaquero maaroni piticaacoventasanotana,
 pishoncaquena, pamenacoventana.
- 6 Ora piotantari ocameetsatasanotaque,
 eiro nomatirotsi catsini nontsoteero.
 ¡Antearoite catsini, eiro nomatirotsi niotero!
- 7 ¿Ariompa nomatero nojatapitsatero Pishire areejiqui?
 ¿Ariompa nomatea noshiapitsatemi areejiqui?
- 8 Ariorica nojateme anta jenoqui, aitaque pitimiri.
 Aisati ariorica nojateme tsompoinaqui quipatsi,
 aitaque aisati pitimiri.
- 9 Ariorica nojateme naranaque anta iquenapai catsirincaiteri,

- aisati nosavicavetearica overaapaacanta incajare, iqueanajinta
catsirincaiteri,
- 10 irosati pincantea quiso poyena,
eiro pojocantsi pitasorencaqui.
- 11 Ariorica nonquenqueshiretea nomanapitsatempime tsiteniriqui,
ariorica ompeavetanaquea tsiteniri quitaiteri, oshoncavetena
- 12 ora tsitenishaatsiri, eiro nomatirotsi omanena,
tempa ora tsiteniri onconijatasanote, onquempetearo quitaiteri.
¡Ora tsiteniri aisati quitaiteri te ompashinitimotempiji!
- 13 Avirotaque vetsicaquenari maaroni novatsapeequi;
aisati pivetsicaquena otsomontequi ina.
- 14 Oshequi nocantacotimpi: Picameetsati;
noanaquero cavaco;
tempa ocameetsataque pimayetaqueri.
¡Irotaque notacotasantaqueri!
- 15 Te nomanimotempiji noqueveantanacari novatsaqui,
ainiroquera novetsicanaca, tecatsi iotacotenane,
avintiquea plotacotaquena nontime.
- 16 Pineasanotaquena povetsicantaquenari
aisati pisanquenatacotitacaroni maaroni ocapee
pisanquenarequi.
Piotitacaro jaoca oncarate nanee,
tequeratsitani ontmeji novatsa.
- 17 Notasorents site, eiro nomatirotsi notacotero piquenqueshiretiri:
¡Ora piotantari tecatsi catsini materone iriotacotero!
- 18 Ariorica noncoavetea nomoncaratero
eiro nomatirotsi notacotero, anaanaquero impanequi;
ariorica nontsonquerome nomoncaratero maaroni,
irosati noncantea quiso noyempi.
- 19 Notasorents site poamaajeiteri caari cameetsajeitatsi,
pinijantareacoventenari oayeripee,
- 20 yora cantimajeitimpiri avirori;
tempa yatsipetashijeitacaro ipiatsajeitaquempi.
- 21 Notasorents site;
¿tempa noquishiri yora quisajeitaquempiri avirori,
aisati nopinquiri yora piatsajeitimpiri?
- 22 ¡Noquisashireasotaqueri catsini,
iriojeitaque nojitaqueri quisajeitanari!
- 23 Notasorents site, piotasanotena jaoca nocantashiretari,
pineantena, piotasanotero noquenqueshireantari;
- 24 piotana nantashiyetarorica caari cameetsatatsi;
poametena irointi nantapinitero queariotasanotatsiri.

Icantiri Tasorentsi inticaacoventajeiteri

(Ivampoyeane David)

- 140** ¹Notasorentsite, pojocaacoventena yora caari cameetsajeitatsi, aisati pinticaacoventena caari neashitantacha,
²quenqueshiretirori irantayetero caari cameetsatsati, icantani intaro yantavacaapinijeita.
³Ora inene otsaampiti, oquempetaro iraji quempiro, ora ineanayetiri, oashinoncanti aisati amanti, oquempetacaro iyepiare maranque.
⁴Notasorentsite, pojocaacoventena, eiro imatantanatsi caari cameetsajeitatsi; pojocaacoventena eiro imatantanatsi caari neashitantacha, yora quenqueshirejeitirori jaoca incanteari iroashinoncantenari.
⁵Yocapee shemejeitatsiri icoapinijeitaque iroashinoncayena; oquempetaca imaroncaquero charija, aisati yoashitaquena shivitsa avotsiqui.
⁶Nocantaqueri Tasorentsi:
 “¡Avirotaque Notasorentsite, pinquemenateemi nocajemimpi, naventimpi!
⁷Tasorentsi, oavisaacotanari mayetirori maaroni; avirotaque jocaacoventanari irimanayeetenarica.”
⁸Tasorentsi, eiro pishinetiritsi caari cameetsajeitatsi irimatero irantayeteri, eiro pishinetiritsi aiqero irijatatiye inquenqueshiretero jaoca incantajeitenari.
⁹¡Yora shoncajeitaquenari ishemejeiti, ompocashiterita oashinoncantsi irashinoncaimentajearota irisati, iquenqueshiretiri irantayeteri!
¹⁰Oashinoncajeiterita paamari ontaajeitapeerita, ojoqueri omoropeequi, eiro imatajatsi irisoquiaje.
¹¹Eiro itimajeitantanajatsi aca quipatsiqui tseyaripee, oijanaterita oashinoncantsi caari neashitantacha, onsonquerita.
¹²Niotaqueri Tasorentsi icantacoventiri cameetsa coiteaveeyetatsiri; aisati yojocaacoventiri opomerentsitimoyetari.
¹³Yora cameetsajeitatsiri incantacotempi: Picameetsati.
 ¡Aisati cameetsashirejeitatsiri irisaviquimojeitempi pipincatsaritinta!

Noquenqueshiretapinitimpi

(Ivampoyeane David)

- 141** ¹Notasorentsite, aviro naventari.
 ¡Shintsini pimpoque!

- ¡Pinquemero ariorica noquenquetsatacaimpi!
 2 Pineacameetsatero noquenquetsatacaimpiri;
 oquempeta pineacameetsajencatiro casancapatsatsiri
 itaapiniyeetimpiri;
 aisati noanquimotimpirorica naco,
 oquempetacaro itaapiniyeetimpiri ishaaviniji virantsi.
 3 Notasorensite, pishentenaro novante
 ariotica noneanate.
 4 Pojocaacoventena, eiro noquenqueshireantarotsi nantero caari
 cameetsatsi;
 eiro pishinetanatsi nantashiyetearo caari cameetsayetatsi
 aisati eiro nocaratiritsi iroajeitearica caari cameetsajeitatsi.
 5 Ocameetsatimotana iroasanquetayena cameetsatsiri,
 aisati incantimentenaro nantayetiri, iroametantenari.
 Oquempeta isainatantaquenaro casancajari, eiro nopiatsataritsi,
 oncantimonentavetena, aiquero nojatatiye namanapinite.
 6 Yora jivatacaajeitiriri caari cameetsajeitatsi iroariyeejeiteri
 imperitaqui,
 aitaque iriojeitanaqueri atiripee ocameetsasasotaque noneane
 nocantavetariri.
 7 Ora itonquipeeni ojocaveetanaquea itiminta itijaari quipatsiqui
 inquempetanaquearo inquichayeeterorica quipatsi.
 8 Novincatsarite, avirotaque Tasorensi noquenqueshiretiri,
 avirotaque naventapinitari, eiro pojocanatsi.
 9 Pojocaacoventena icoacaashitacari caari cameetsajeitatsi,
 iroashinoncayena;
 oquempetaca yoashitaquena oashirentsi.
 10 Ocameetsati irashinoncaimentajearota irisati yantayetiri,
 naintiquea aiquero nojatatiye nonquemisantasanotempi.

Aviro Tasorensi naventapinitacari

(*Ivampoyeane David*)

- 142** ¹Shintsijenca naventacari Tasorensi,
 nocantasanotiri: “Pincavintsayena.”
 2 Ariorica opomerentsitimotana,
 naventacari Tasorensi;
 nocamantaqueri oshequi nashinoncaaca,
 ariorica noashiretasanotaca catsini.
 3 Novincatsarite, piotaquena jaocarica nojayetiri:
 anta avotsiqui noquenayeti
 yoashitaquena oashirentsi.
 4 Nocoayevetaca amitacotenane,

- tecatsi pocatsine amitacotenane.
 ¡Tecatsi piacoventenane!
 ¡Tecatsi quenqueshireacotenane iramitacotena!
 5 Aviro Notasorentsite naventacari; nocantasanotimpi:
 “Avirotaque ticaacoventanari
 aisati avirotaque paquenarori maaroni timimoyetanari.”
 6 Notasorentsite, pinquemero nocantimpiri;
 tee noshintsitanajeji, pojocaacoventena,
 oshequi yoijanajeitaquena quisajeitanari,
 yanaacotaquena ishintsiti irinti.
 7 Pojocaacoventajenaro pomerentsitimotaquenari,
 noncantacotantajempiri: Picameetsati.
 Yora cameetsajeitatsiri incarajeitena
 ariorica irineaquena pisavicacaajana cameetsa.

Aviro, Tasorentsi, noshiretasanotari

(Ivampoyeane David)

- 143** 1 Notasorentsite, pinquemena noquenquetsatacainpiri.
 ¡Panquenaro; tempa aviro cameetsatatsiri aisati queariotatsiri!
 2 Eiro picantimentanarotsi nantaqueri;
 tempa naro quemisantimpiri;
 aca quipatsiqui, te intimeji cameetsatimotempine.
 3 Yora quisajeitanari yoijanajeitaquena,
 yoashinoncaasanotaquena catsini.
 Ishintsinatana yoiminqueana omoroqui tsitenishaatsiri,
 noquempevetacari camitainchari peerani.
 4 Oshequi noashiretasanotaca catsini,
 ocantimoshireaquena.
 5 Noquenqueshiretiro peerani, maaroni pimayetaquero.
 6 Noanquimotimpiro naco, naventimpi,
 nocoasanotimpi, noquempetacaro quipatsi pirijatatsiri.
 7 ¡Notasorentsite, pamitacotena intsipaite;
 tempa irotaintsi noncamashitea!
 ¡Eiro pitsaneapitsatanarotsi pamitacotena!
 Tempa ari nonquempetaqueari camayetatsiri.
 8 Ariorica oquitaiteapiniti piotacayenaro pinintasanotana;
 tempa noshiretasanotimpi.
 Piotacayena jaoca noncanteari nontime cameetsa;
 tempa avirotaque naventari pimpenaro nocoayetiri.
 9 Notasorentsite, pojocaacoventenari quisajeitanari;
 avirotaque naventari, pinticaacoventena.
 10 Poametasanotena nantantempirori picoacaanari;

- tempa avirotaque Notasorentsire.
 ¡Nocoaquero Pishire cameetsatatsiri ontimacayena cameetsa!
 11 Notasorentsire, pimoncaratero picantasanotiri. ¡Poaneajena!
 ¡Tempa aviro cameetsatatsiri,
 pojocaacoventenaro pomerentsitimotaquenari!
 12 ¡Tempa aviro queariotatsiri, pintsoncajeiteri quisajeitaquenari!
 ¡Pintsoncasanojeiteri maaroni;
 tempa naro quemisantimpiri!

Ipasonquitaqueri pincatsari Tasorentsire

(*Ivampoyeane David*)

- 144** 1 ¡Cameetsatasanoaque Notasorentsire,
 iriotaque jocaacoventanari!
 Iriotaque oametanari jaoca noncanteari nomanatea.
 2 Iriotaque queariotatsiri tsipatapinitanari, jocaacoventanari,
 notsititari eiro ineanteetanatsi, oipacaacoventanari;
 iriotaque nojocaari, ticaacoventanari,
 iriotaque cantacashiretiriri atiripee ipincatsatantanari.
 3 Notasorentsire, ¿jaoca ijitari atiri piquenqueshireacotantariri, aisati
 pineacameetsatantariri?
 4 Yora atiri iquempetaro anenqui;
 iquempetacaró tsimancaiteri intsipaite avishi.
 5 Notasorentsire, pisoquijanaque inquitequi, paniireapee;
 pincatiapeero toncaaripee, oncachaajencatanajeta.
 6 Pimporecacayeri porecatsiri onquempetanaquea imanayeetiro
 chacopipee,
 poimishiajeitantariri quisajeitimpiri.
 7 Ponijayenaro pitasorenca poneachari jenoqui;
 poavisaacotena yoashinoncaaquena pashinisati atiri,
 iquempejeitacaró antearoite incajare;
 8 iriotaque tseyajeitachari vancashitarori iracosanori,
 icantashita: “Nomoncaratero nocantiri”.
 9 Notasorentsire, nocoli nompampoyempiro iroaquerari pampoyeantsi,
 nompampoyeacoventantempiro salterio.
 10 Avirotaque matacagiriri yanaacotanti pincatsariyetatsiri;
 aisati pojocaacoventaqueri David, yora quemisantimpiri.
 11 Poavisaacotena, eiro yoanteetanatsi.
 Pojocaacoventena, eiro yanaacotantanatsi pashinisati,
 yora tseyajeitachari vancashitarori iracosanori;
 icantashiveeta; “Nomoncaratero nocantiri”.
 12 Yora notomipee aiqero ijatati iquimoyeti;
 iquempejeitacaró shiocayetatsiri;

ora noshintopee oquempetacaro otincamipee pancotsi quisotacairori.

13 Ora noquempoyeantarori panquirentsipee,
ojaasanotaca paitapeerica oanarontsiyetatsiri.

Aisati iriori novishatepee
ishequiasanotanaque catsini noashitomashitepeequi.

14 Maaroni novacatepee ontsomonteyetanaque,
omoncaratiro ontimanteariri, tecatsi jocatsine.

Cameetsa catsini nosavicajeiti nonampiqui, te nontsaroajeiteji.

15 ¡Iquimoshirejeiti atiripee otimimoyetiri maaroni ocapee!
¡Iquimoshirejeiti yora yashitajari Tasorentsi Pincatsari!

Ocameetsati incantacojeiteri atiripee: “¡Icameetsati Tasorentsi!”

(Ivampoyeane David)

145 ¹Notasorentsite, nonquenquetsatacotempi: Pipincatsaritananoti,
noncanteani noncantacotempi: Picameetsati.

²Nompasonquitempi quitaiteeripeequi,
noncanteani noncantacotempi: Picameetsati.

³Yora Tasorentsi imatasanoyetiro maaroni,
ocameetsati ancantacoteri: Icameetsati.
Eiro amatirotsi ayotacotasanoteri.

⁴Yora antearipee iroamejeiteri itomipee,
incantacojeitempi ocameetsataque povetsicayetaqueri;
inquenquetsatacojeitero pimatasanoyetaqueri pitasorencaqui.

⁵Inquenquetsatacojeitempi pipincatsaritananoti catsini;
aisati narori nonquenquetsatacoteri pimayetaqueri caari
ineapinyeeti.

⁶Inquenquetsatacojeitero pimatasanoyetaqueri pitasorencaqui,
ipincatsatimenteetimpiri,
aisati narori nonquenquetsatacoteri pimatasanoyetaqueri.

⁷Aisati inquenquetsatacoyeetero picameetsatasanotaque catsini,
aisati incajemasanoeyeete, incante: “Aviro cameetsatasanotatsiri.”

⁸Yora Tasorentsi, icavintsantasanoti catsini,
te irishemanteaji inintasanotanti catsini.

⁹Yora Tasorentsi icameetsatimotaquee maaroni;
aisati yamenacoventiro yovetsicayetiri.

¹⁰¡Notasorentsite, ocameetsati onijantacotempi maaroni
povetsicaqueri!

¡Incantacotempi quemisantajeitimpiri: Picameetsati!

¹¹¡Inquenquetsatacojeitero pipincatsariventanti,
ocameetsatasanotaque!

¡Inquenquetsatacojeitero pimatasanoyetaqueri pitasorencaqui!

¹²¡Iriotacaajeiteri atiripee

- pimatasanoyetaquero paitapeerica pitasorencaqui
aisati ocameetsatasanotaque pipincatsariventanti!
- 13 Pincanteani Pimpincantsarite, pimpincatsariventajeiteri maaroni
atiripee, pincantaitatitempani.
- 14 Yora Tasorensi yamitacotiri yoashinonqueetiri,
aisati yoimoshirenquiri oashirejeitachari.
- 15 Avirotaque yoyeacojeitiri atiripee,
pimpajeiteri iroajeiteari,
omoncaratearica pipapinitantariri.
- 16 Aisati pinquempejeitiri iriori poshiniripee,
pimpasanojeiteri iroajeiteari, pinquemacaapinijeitari.
- 17 Yora Tasorensi, icameetsatasanotaque,
ocameetsataque maaroni yantayetiri.
- 18 Yora Tasorensi iquempejitari maaroni quenquetsatacaasanotiriri
cameetsa.
- 19 Imoncaratiniri pincatsajeitiriri icoajeitiri,
ariorica icantiri, iramitacoteri,
iquemiri aisati yoavisacojeitiri.
- 20 Yora Tasorensi yojocaacoventiri nintajeitiriri;
irintiquea caari cameetsajeitatsi, itsoncajeitiri.
- 21 ¡Ocameetsati noncantacoteri Tasorensi: Icameetsati!
¡Aisati inquempejeitea maaroni,
incantacoteri: Icameetsati Tasorensi,
meca aisati incantaitatitempani!

Ocameetsati yantayetaqueri Tasorensi

- 146** ¹ ¡Icameetsataque Tasorensi!
Noncantashiretacoteri Tasorensi: Icameetsati.
- ² Noncantacoteri Tasorensi: Icameetsati, ainiroquera nanei,
nompampoyeneri pampoyeantsipee Notasorensite ainiroquera
notimi.
- ³ Eiro pishiretashitaritsi atiripee irioperoyevetachari,
eiro imatirotsi iroavisaacotante,
- ⁴ Ariorica incamaque, impeanajea quipatsi
aisati ompeanajea iquenqueshireyevetari paitapeerica
irantayetemeri.
- ⁵ Iquimoshirejeiti yamitacotiri Itasorensite Jacoboni,
aisati shiretasanotariri Itasorensite.
- ⁶ Iriotaque vetsicaquerori inquite, quipatsi
jero incajare aisati maaroni timantajeitarori.
Icantani imoncaratiro irineane.
- ⁷ Cameetsa icantacoventiri yoashinonquejeitiri

- aisati ipapinijeitiri yoajeitati tasheajeitatsiri.
 Yora Tasorentsi yoipacaacoventiri yoiminqueeyetiri caravosoqui.
 8 Yamenacaajiri maviteajayevetachari,
 yoveshireacaajari yoashinonqueetiri,
 inintasanotiri atiripee cameetsajeitatsiri.
 9 Yora Tasorentsi vojocaacoventajeitiriri pashinisatipee
 aisati ipapinijeitiri coiteimojeitariri camayetatsiri iriripee, iriniro
 jero camajimentaaroopee.
 Irintiquea caari cameetsajeitatsi, ipomerentsitacaajeitari, eiro
 itimitsi cameetsa.
 10 Incanteani impincatsariventante Pitasorentsite nampitsiqui Sión.
 Maaroni osarentsipeequi impincatsaritanote catsini.
 ¡Cameetsataque Tasorentsi!

Ocameetsatasanoti ampampoyeaventasanoteri Tasorentsi

- 147** ¹ ¡Cameetsataque Tasorentsi!
 ¡Ocameetsati ampampoyeeneri pampoyeantsipee
 Atasorentsite!
 Iriotaque ampampoyeacotasanoteri cameetsajenca.
 2 Yora Tasorentsi irovetsicacantajero nampitsi Jerusalén,
 aisati irampatojeitajeri ishanincajeitaniri Israel
 jayevetainchari jaocapeerica.
 3 Ishintsishiretacaajiri oashirejeivetainchari,
 aisati iveshireacaajari yoashinonqueevetacari.
 4 Iotiri impoquiroppee jaoca icarajeitiri,
 aisati ipajiyetaqueri aparopeeni.
 5 Itasorentsitasanotaque Atasorentsite,
 imatananoyetiro paitapeerica itasorencaqui;
 ora iotantari otsoteiro maaroni.
 6 Yora Tasorentsi ishintsishiretacairi caari shemejeitatsi;
 irintiquea caari cameetsajeitatsi, yoashinoncaasanojeitiri.
 7 Pimpampoyeacoventeri Tasorentsi, pimpasonquiteri,
 aisati pimpampoyeeneri pampoyeantsipee Atasorentsite arpaqui.
 8 Iriotaque mencorisheacairori jenoqui
 oariapinitirori incani quipatsiqui,
 ishioacacayetiro paashitopee toncaaripeequi.
 9 Ipajeitiri poshiniripee yoapinijeitari
 aisati irijanipee tsimeeripee ariorica yaventajeita.
 10 Te irineacameetsateriji Tasorentsi cavaayo shintsitatsiri,
 aisati iriori atiripee shintsivetachari,
 11 irintiquea ineacameetsatasanoti pincatsajeitiriri;
 yora shirejeitarori queario inintasanotanti.

- 12 Aviro savicajeitatsiri nampitsiqui Jerusalén aisati Sión,
pincantacoteri Pitasorentsiti: Icameetsati.
- 13 Tempa iriotaque ticaacoventajeitaquempiri
aisati itasoncaventajeitaqueri pitomipee pinampiqui.
- 14 Iriotaque savicacaajeitimpiri cameetsa piipatsitequi,
aisati itimacaasanotimpuro tirico cameetsatasanotatsiri, poajeitari.
- 15 Ineanataque Tasorentsi, otsoteanaquero maaroni quipatsiqui.
- 16 Iriotaque tianquirori pariajencatatsiri catsincari, oquempetacaro
iviti ovisha,
aisati itimacairo sharaca, oquempetacaro quipatsivane.
- 17 Yovariiro iriniqui, oquempetacaro mapiquijaniqui,
ora catsincaiteri oquisotacairo nija.
- 18 Ariorica ineanataji ovejaanaja catsincaiteri,
aisati ijeoncacairo tampea, oshiaajatantanajari iroori nija.
- 19 Iotacaaqueri ishanincajeitaniri Israel
irineane aisati icantacantiri.
- 20 Te inquempeteariji pashinisatipee atiri,
te iriotacajeiteriji icantacantayetiri.
¡Icameetsataque Tasorentsi!

Maaroni yovetsicajeitiri Tasorentsi oinijantiri icameetsati

- 148** ¹ ¡Icameetsataque Tasorentsi!
¡Aviro timayetatsiri inquitequi jenoqui,
pincantacoteri Tasorentsi: Icameetsati!
- 2 ¡Avirojei maaroni inampirepee aisati manajeitachari inquitequiniri,
pincantacoteri Tasorentsi: Icameetsati!
- 3 ¡Avirojei catsirincaiteri, cashiri, impoquiropee quitasanteyetatsiri,
picantacoteri Tasorentsi: Icameetsati!
- 4 ¡Aviro inquite aisati nija timatsiri jenoqui;
picantacoteri Tasorentsi Inquitequiniri: Icameetsati!
- 5 Pincantacoteri Tasorentsi: Icameetsati;
tempa ineanataque otimantayetacari maaroni;
- 6 itimacaaquero oncantaitatitempani ontime
aisati icantacantaqueri, eiro opashinitajitsi.
- 7 ¡Avirojei timajeitatsiri quipatsiqui,
pincantacojeiteri Tasorentsi: Icameetsati!
¡Maaroni covencatatsiri timatsiri incajarequi,
aisati incajare saanajatasanotatsiri!
- 8 ¡Porecatsiri aisati iriniqui, catsincari aisati mencorijenca
aisati tampea antearotasanotatsiri, moncaratirori icantiriri!
- 9 ¡Toncaaripee, otishipee, maaroni santaripee
aisati inchatopee oitsoquiyetatsiri!

- 10 ¡Poshiniripee, virantsipee, coquiyetatsiri,
vanquiyetachari aisati noshicayetachari!
- 11 ¡Pincatsariyetatsiri savicayetatsiri maaroni nampitsipeequi!
¡Maaroni atiripee aisati maaroni jivatacantayetatsiri
nampitsipeequi!
- 12 ¡Shiramparipee, tsinaneppee, evancaripee, evancaropee,
anteashparipee aisati anteashparopee!
- 13 ¡Pincantacoteri maaroni Tasorentsi: Icameetsati!
¡Tempa apaniro Itasorentsi Inquitequiniri!
¡Ipincatsaritanoti, ipincatsariventasanojeitiro inquite aisati
quipatsi!
- 14 Imatacaasanojeitaqueri ishanincajeitajari ipincatsariventanti.
¡Maaroni quemisantajeitiriri Tasorentsi, ishanincajeitaniri Israel
yora icaratiri!
Ocameetsati incantacoteri: Icameetsati.
¡Icameetsataque Tasorentsi!

Iriotaque Tasorentsi Pincatsarisanori vetsicayetirori maaroni

- 149** ¹ ¡Icameetsataque Tasorentsi!
Pimpampoyeajeiteneri Tasorentsi iroaquerari pampoyeantsi;
pincantacoteri: Icameetsati isavicajeitinta quemisantiriri.
- ² Pinquimoshirejeite ishanincajeitaniri Israel
savicajeitatsiri nampitsiqui Sión;
tempa iriotaque Tasorentsi vetsicaquempiri, Pivincatsarite.
- ³ Pincantacoteri: Icameetsati: pimijamijajeite,
pimpampoyeeneri pampoyeantsipee
arpapeequi aisati panteretapeequi.
- ⁴ Tempa Tasorentsi iquimoshireventiri ishanincajeitajari;
ineacameetsatiri caari shemejeitatsi,
imatacairi yanaacotantajeiti.
- ⁵ Pinquimoshirejeite quemisantiriri Tasorentsi, panaacojeitantaque;
aisati nareatsiri imamentoqui, pimpampoyee pinquimoshirete.
- ⁶ Ocameetsati pincantacoteri Tasorentsi: Icameetsati,
aisati pajiriquero sataamentotsi tsampimentatsiri apiiteroqueti,
- ⁷ pimpiajeitantariri pincatsatashijeitariri ijitasorentsiyetiri
poashinoncantariri nampitsipeequiniri,
- ⁸ poisotantariri carenatsa shintsitatsiri pincatsaripee
aisati jivatacantatsiripee,
poashinoncaasanotanteari tenatatsiri carenatsa,

- 9 omoncaratanteari irineayeteri sanquenatacotainchari
oashinoncantsi.

¡Irotaque impincatsayeetanteariri maaroni quemisantatsiri!
¡Icameetsataque Tasorentsi!

Aveshireimentasanojeiteari maaroni Tasorentsi

- 150** ¹ ¡Icameetsataque Tasorentsi!
¡Pincantacoteri Tasorentsi: Icameetsati anta Inantariqui!
¡Pincantacoteri: Icameetsati,
ipincatsaritaque anta inquitequi!
- ² ¡Pincantacoteri: Icameetsati,
imayetaqueri maaroni itasorencaku!
¡Pincantacoteri: Icameetsati, itsoteaquero maaroni!
- ³ ¡Pincantacoteri: Icameetsati, pintioteri tiorentsi!
¡Pincantacoteri: Icameetsati;
pantacotero arpa aisati salterio!
- ⁴ ¡Pincantacoteri: Icameetsati,
pimijamijatacayero paneretapee!
¡Pincantacoteri: Icameetsati,
pisoncatero soncarentsipee aisati neayeetatsiri!
- ⁵ ¡Pincantacoteri: Icameetsati,
pimposhero ashromencaripee cameetsajencatatsiri!
¡Pincantacoteri: Icameetsati,
pantacotero poimajencatasannotatsiri!
- ⁶ ¡Maaroni neayeetatsiri, irotaque
pincantacotanteariri Tasorentsi: Icameetsati!
¡Icameetsataque Tasorentsi!